

تَثنِيَه - كِتابِ تَورات - بَخْشِ پَنْجُم

پیشگفتار

تَثنِيَه، پَنْجُمِين و آخِرِين كِتابِ تَورات أَسته. دَ امزى كِتاب مُوسى بَلَدِه دَفعَه دَوْم شَريعت ره تَشْرِيُع و بِيان مُونه تا نسلِ نَوِ إِسرائِيل از احْكَام و دَسْتُورَاي خُداوند باخْبر شُنه و زِندَگى خُو ره مُطابِق ازوا پِيش بُيره. امي شَريعت ره مُوسى دَفعَه اوّل بَلَدِه نسلِ پِيشَنِه إِسرائِيل دَ كُوهِ سِينا تَشْرِيُع و بِيان كُدد تا اُونا ره از احْكَام و دَسْتُورَاي خُداوند باخْبر كُنه.

مَوضُوع هَاي برجسْتِيه امزى كِتاب ازى قرار أَسته:

وختِيَّكِه مُوسى سُخْنَرانِي و نصِيحَت هَاي خُو ره خلاص کد، خُدا دَ مُوسى اَمر کد که دَ بَلَه کوهِ نِبو دَ قِيلِي پِيسَگه بُر شُنه تا ازْونَجِي تمامِ سَرْزَمِين وَعده شُدَه ره بِنَگَره. مُوسى از اَمرِ خُدا اِطَاعَت کده دَ قِيلِي پِيسَگه بُر شُد و ازْونَجِي تمامِ سَرْزَمِين وَعده شُدَه ره دِيد و بعد اُزو فَوت کد.

كتابِ تَثنِيَه يکي از كِتاب هَاي عَهْدِ قدِيم أَسته که عِيسَى مسيح و ياراي شَي دَ عَهْدِ جَديَد

کَلُوتَر از هشتاد دفعه از آیه های شی نقل قَول کده.

فهرستِ عنوانها

يادآوری واقعه های گذشته (۱:۱)

انتخاب کدون قاضی ها (۹:۱)

جاسوسی از سرزمین کِنعان (۱۹:۱)

سرکشی قَوم (۲۶:۱)

سرگردانی دَ بیابو (۱:۲)

پیروزی دَ بَلَه پادشاهِ حِشبون (۲۶:۲)

پیروزی دَ سِرِ پادشاه باشان (۱:۳)

تقسیم زمینا (۱۲:۳)

منع شُدون مُوسی از داخِل شُدو دَ کِنعان (۲۳:۳)

مُوسی مردم ره دِ اطاعت کدو تشویق مُونه (۱:۴)

منع کدون بُت پرستی (۱۵:۴)

خاص بُودون خُدای إسرائیل (۳۲:۴)

شارای پناهگاه (۴۱:۴)

يادآوری شریعت (۴۴:۴)

دَ حُکم (۱:۵)

حُکم بُزرگ (۱:۶)

اخطار دَ باره گمراهی (۱:۷)
خُداوند ره پُرمُشت نَكْنِيد (۱:۸)
اخطار دَ باره مغُرور شُدو (۱:۹)
نتيجه نافرمانى از خُداوند (۷:۹)
دُولَوح سنگى نَو (۱:۱۰)
ترس از خُداوند (۱۲:۱۰)
آجرِ اطاعت از خُداوند (۸:۱۱)
خُداوند ره دَ جاي عِبادت كُنيد كه او إنتخاب مُونه (۱:۱۲)
اخطار دَ باره پَرسٽيشِ خُدايونِ دِيگه (۱:۱۳)
چيزاي پاك و نَجَس (۱:۱۴)
دَ باره دَه-يگ (۲۲:۱۴)
سالِ بخشيدونِ قرض ها (۱:۱۵)
تقديمِ کدونِ اوّلبارى چارپايا (۱۹:۱۵)
عِيدِ پَصَح (۱:۱۶)
عِيدِ هفته ها (۹:۱۶)
عِيدِ چپري ها (۱۳:۱۶)
تعيین کدونِ قاضى ها (۱۸:۱۶)
بُت پَرسٽى نَكْنِيد (۲۱:۱۶)
قضاياوتِ قاضى ها و پيشوايو (۸:۱۷)

مُقرَرات بَلِدِه پادشاه (۱۴:۱۷)

حق لَاوِيَا و پیشوایو از هدیه ها (۱:۱۸)

اخْطَار َبَارِه کارای نفرات انگیز (۹:۱۸)

وعده ظهورِ یگ نَبِی رقمِ مُوسَى (۱۵:۱۸)

شارای پناهگاه (۱:۱۹)

قانون َبَارِه شاهِد (۱۵:۱۹)

مُقرَرات بَلِدِه جنگ (۱:۲۰)

مُقرَرات بَلِدِه قتلی که قاتِل معلوم نَبَشَه (۱:۲۱)

مُقرَرات بَلِدِه توى کدو قد خاتُونِ اسِير (۱۰:۲۱)

حقِ باچه اوّلباری (۱۵:۲۱)

باچه یاغی (۱۸:۲۱)

دستُورای دِیگه (۲۲:۲۱)

مُقرَرات َبَارِه رابِطِه زَن و شُوی (۱۳:۲۲)

مُقرَرات َبَارِه کسای که َجَمَاعَت داخِل شُدَه نَمِيتَنَه (۱:۲۳)

پاک-و-مُقدَّس نِگاه کدونِ خَيْمَه گاهِ نِظامَى (۹:۲۳)

احکامِ مُختَلِف (۱۵:۲۳)

هدیه های حاصلِ نَو و دَه-یگ (۱:۲۶)

پیرَوی از احکامِ خُداوند (۱۶:۲۶)

قُربانگاه َكوهِ عیال (۱:۲۷)

نالَت ها از کوهِ عیبال (۹:۲۷)

بَرَكَت بَلَدِه إِطَاعَتْ كُنِينَه ها (۱۱:۲۸)

نالَت بَلَدِه نَا إِطَاعَتَنِي (۱۵:۲۸)

خُداوند عهد خُو ره قد إِسْرَائِيل تازه مُونه (۱۱:۲۹)

نِتِيجَه پس أَمَدُو سُونِ خُدا (۱۱:۳۰)

إِنْتِخَابِ زِندَگَى يَا مَرَگَ (۱۱:۳۰)

خُدا بَلَدِه يوشِع وَظِيفَه مِيدِيه (۱۱:۳۱)

خاندونِ احکامِ تَورَات (۹:۳۱)

سُرُودِ مُوسَى (۳۰:۳۱)

خُداوند مُوسَى ره از مَرَگ شى باخبر مُونه (۴۸:۳۲)

دُعَای بَرَكَتِ مُوسَى بَلَدِه قَوْمِ إِسْرَائِيل (۱۱:۳۳)

فَوَتِ مُوسَى (۱۱:۳۴)

يادآوری واقعه های گذشته

۱ ای توره های آسته که مُوسَى دَ او طرفِ دریای اُردُن دَ اواری، یعنی دَ داشتِ رُوی دَ رُوی منطقه سُوف، دَ مینکلِ پاران و توفِل، لابان، حَصِيرَوت و دِیزَهَب دَ تمامِ إِسْرَائِيل گفت.^۲ از کوهِ حوریب تا قادِش-برنیع، از راهِ کوهِ سعیر سَفِرِ یازده روزه آسته.^۳ دَ روزِ اولِ ماهِ یازدَهِم سالِ چُلم، مُوسَى قد بنی إِسْرَائِيل توره گفت، امُو رقم که خُداوند دَزو امر کُدد

که قد ازوا گپ بِزَنَه.^۴ ای واقعه بعد از شِکست دَدون سِیحون پادشاهِ اموریا که دَ حِشبون حُکمرانی مُوكد و عوج پادشاهِ باشان که دَ عَشتاروت دَ منطقهِ اِدرَعی حُکمرانی مُوكد، رُخ دَد.^۵ دَ او طرفِ دریای اُرْدُن دَ سرزمینِ موآب، مُوسیٰ اینی شریعت ره دَ بیان کدو شُد و گفت:

“خُداوند، خُدای مو دَ حوریب قد ازمو گپ زَدَه گفت: شُمو دَ امزی کوه غَدر کَلو مَندید.^۶ پس آلی آماده شُده کوچ کُنید و دَ کوهِستونِ اموریا و پَگِ منطقه های گِرد-و-بر شی داخل شُنید: دَ داشت، دَ کوهِستو، دَ دامنه ها، دَ جنوب و دَ بَغلِ دریا، یعنی دَ سرزمینِ کِنعانیا و امچنان دَ لِبنان تا دریای کُله که دریای فرات آسته.^۷ اینه، ما امی سرزمی ره پیشِ روی شُمو ایشتم؛ پس داخل شُنید و سرزمینی ره که ما، خُداوند بَلِدَه بابه کَلونای شُمو ابراهیم و اسحاق و یعقوب قَسم خوردم که دَزوا و بعد ازوا دَ اولادِ ازوا مِیدیم، تَصرُف کُنید.^۸

إِنتِخابِ كَدونِ قاضى ها

دَ امزُو غَیت ما دَز شُمو گفتُم: ما تنهای خُو نَمِيتُنُم بارِ مسْئُولیت شُمو ره دَ دوش خُو بِگِیرُم.^۹ خُداوند، خُدای شُمو تعداد شُمو ره کَلو کده، دَ اندازه که شُمو امروز مثل سِتاره های آسمو کَلو آستید.^{۱۰} خُداوند، خُدای بابه کَلونای شُمو، شُمو ره هزار چند کَلوتَر کُله و بَرکت بِدیه، امُو رقم که دَز شُمو وعده کده.^{۱۱} لیکِن ما چطُور مِيتُنُم تنهای خُو بارِ^{۱۲}

مشکلات و جنجال شُمو ره د دوش خُو بِگِيرم؟^{۱۳} پس آدمای دانا و فامیده و نامتو ره از طایفه های خُو انتخاب کُنید تا اونا ره د بَلِه شُمو رهبر تعیین کنم.^{۱۴} و شُمو د جواب مه گفتید: 'امی چیز ره که تُو گفتی، خُوب آسته که انجام بَدی.^{۱۵} اوخته رهبرای طایفه های شُمو ره که آدمای دانا و نامتو بُود گرفته د بَلِه شُمو رهبر تعیین کُدم، تا اونا سرکردۀ های هزار نفری، سرکردۀ های صد نفری، سرکردۀ های پنجاه نفری، سرکردۀ های ده نفری و مسئولین طایفه های شُمو بَشه.^{۱۶} و د امزُو غَیت د قاضی های شُمو امر کده گفتُم: 'د بَین ېرارون شُمو که جنجال پَیدا مُوشه، گوش بِگِيريد و د بَین دُو ېرار إسرائیلی مُنصِفانه قضاوت کُنید، امچنان د بَین يگ إسرائیلی و بیگنِه که قد ازو زِندگی مُونه.^{۱۷} د قضاوت کدو طرفداری نَکُنید، توره آدم غریب و دَولَتمَند ره یگرقم گوش بِگِيريد و از هیچ انسان ترس نَخورید، چراکه قضاوت شُمو از طرفِ خُدا آسته. هر دعوای که حل کدون شی بَلِه شُمو غَدر مشکل بَشه، او ره د پیش ازمه بَیرِيد تا بِشتوم.^{۱۸} خلاصه، د امزُو غَیت تمام چیزای ره که لازم بُود انجام بَدید، ما دَز شُمو حُكم کُدم.

جاسوسی از سرزمین کِنعان

اوخته مو از کوهِ حوریب کوچ کدی و از پَگ امزُو بیابونِ کله و ترسناک که شُمو دیدید از راه کوهستانِ آموری ها د سَفر خُو ادامه دَدی، امو رقم که خُداوند، خُدای مو دَز مو امر کُدد. وختی د قادِش بَرنیع رسیدی،^{۲۰} ما دَز شُمو گفتُم: 'شُمو د کوهستانِ آموری ها

رسِیدید، دَ جایی که خُداوند، خُدای مو دَز مو مِیدیه. ^{۲۱} اینه، خُداوند، خُدای شُمو امی

سرزمی ره پیشِ رُوی شُمو ایشته. پس باله شُنید و تَصَرُّف کُنید، امُو رقم که خُداوند،
خُدای بابه کلونای شُمو دَز شُمو گُفتہ؛ ترس نَخورِید و وَحشت زَدہ نَشُنید. ^{۲۲}

اوخته پگ شُمو دَپیش مه آمدہ گُفتید: بیه که چند نفر ره پیشلوون خُو رَیی کنی تا د
باره امزُو سرزمی بَلَدِه مو جاسُوسی کُنه و دَ باره راهی که مو باید بوری و دَشارای که
باید داخل شُنی دَز مو خبر بَیره. ^{۲۳} امُو توره شُمو خوش مه آمد؛ اوخته ما دوازده نفر ره
از مینکل شُمو گِرفتم، از هر طایفه یگ نفر. ^{۲۴} اونا رَیی شُدہ دَ کوهِستو بُر شُد و تا دَرِه
اِشکول رفته دَ باره امزُو سرزمی جاسُوسی کد ^{۲۵} و از میوہ شی قد خُو گِرفته دَپیش ازمو
آورد و دَز مو خبر دَدہ گُفت: سرزمینی ره که خُداوند، خُدای مو دَز مو مِیدیه، یگ
سرزمین خُوب آسته. ^{۲۶}

سرکشی قَوم

لیکن شُمو نَخاستید که دَ اونجی بورِید، بَلکه از امِرِ خُداوند سرپیچی کدید؛ ^{۲۷} و دَ
خیمه های خُونِق کده گُفتید: ازی که خُداوند از مو بَد مُویره، مو ره از سرزمین مِصر
بُرو آورد تا مو ره دَ دِست اموریا تسلیم کده نابُود کُنه. ^{۲۸} آلی مو کُجا شُنی؟ بِرارون مو،
مو ره کمِدل کده گُفت: "امُو مردم از مو کده قَویَّتَر و قد بِلندرَ آسته؛ شارای ازوا کَله یه
و دیوال های شی تا آسمو مِیرسه، و اولاًدِه عناق ره ام دَ اونجی دیدی." ^{۲۹} اوخته ما دَز

شُمو گُفتُم: وَحَشَتْ زَدَه نَشْنِيد و ازوَا ترس نَخُورِيد. ^{٣٠} خُداوند، خُدای شُمو که پیشلوون شُمو موره، او بَلَدِه شُمو جنگ مُونه، فقط امُو رقم که دَپیش چیم شُمو دَمِصر بَلَدِه شُمو جنگ کد. ^{٣١} و دَبِبابو ام دِیدِید که خُداوند، خُدای شُمو، دَتمام راه که سَفَر کَدید شُمو ره دَبغل خُو گِرفته اُورد، مِثْلِ که يگ نفر باچه خُو ره دَبغل خُو گِرفته میره، تا وختیکه دَامزی جای رَسِیدِید. ^{٣٢} لیکِن با وجودِ امزی کارا، شُمو دَخُداوند، خُدای خُو اِعتماد نَکِدِید، ^{٣٣} دَامْزُو که دَوختِ شاو دَآتش و دَغَيْتِ روز دَآُور پیش پیش شُمو مورفت، تا راهِ شُمو ره بَلَدِه شُمو نِشو بَدیه و يگ جای ره بَلَدِه خَیمه زَدو بَلَدِه شُمو پَیدا کُنه.

^{٣٤} وختی خُداوند تورای نَسَنْجِیده شُمو ره شِنید، او قار شُد و قَسَم خورده گفت: ^{٣٥} هیچ کُدَم امزیا، حتی يگ نفر ام امزی نسلِ شرِیر امُو سرزمینِ خُوب ره که قَسَم خوردم که دَبابه‌کَلونای شُمو مِیدِیم، نَمِینگره، ^{٣٦} غَير از کالیب باچه یَفْنَه؛ او امُو سرزمی ره مِینگره و ما امُو سرزمی ره که دَز شی رفتُد، دَزُو و أَولادِه شی مِیدِیم، چراکه او قد تمام دِل-و-جان خُو از خُداوند پَیرَوی کد.

^{٣٧} بخاطِر از شُمو خُداوند دَبَلِه ازمه ام قار شُدَه گفت: تُو ام دَأُونجی داخل نَمُوشی؛ ^{٣٨} بَلَكِه یوشع باچه نُون که دِستیار تُو آسته، دَأُونجی داخل مُوشه؛ پس از و حمایت کُو، چون او امُو سرزمی ره نصِيبِ بنی اِسرائیل مُونه. ^{٣٩} و نِلغه‌گون شُمو که دَبارِه ازوَا گُفتید اسِیر مُوشه، امُو بچِکِیچای شُمو که اِمروز خُوب و بَد ره فرق نَمِيتَنَه، اُونا دَأُونجی داخل

۴۰ مُوشه؛ ما امُو سرزمی ره دَزوا مِیدیم و اونا صاحبِ اُزو مُوشه. لیکن شُمو دَور خورده از راهِ دریای سُرخ پس دَ بیابو کوچ کُنید.

۴۱ اوخته شُمو دَ جواب مه گفتید: 'مو دَ ضِدِ خُداوند گُناه کدے. مو رفته جنگ مُونی، امُو رقم که خُداوند، خُدای مو دَز مو امر کده. ' پس هر کُدم شُمو سلاحِ جنگی خُو ره گرفتید و آماده شُدید که دَ منطقه کوهستانی بورید. ۴۲ ولے خُداوند دَز مه گفت: 'بلدِه ازوا بُگی که نَروید و جنگ نَکنید، چراکه ما دَ مینکل شُمو نِیستم؛ اگه نَه، از پیش دشمنای خُو شِکست مُوخورید. ۴۳ و ما دَز شُمو گفتُم، ولے شُمو گوش نَکدید، بلکه از امرِ خُداوند سرپیچی کدید و سرزوری کده دَ کوهِستو بُر شُدید. ۴۴ و آموریای که دَ امزُو کوهِستو زِندگی مُوكد دَ خلاف شُمو بُر شُد و شُمو ره رقمِ خیلِ زمبور پیش کد و شُمو ره از سَعیر تا حُرما تار-و-مار کد. ۴۵ اوخته شُمو دَور خوردید و دَ حُضورِ خُداوند چخرا کدید، مگم خُداوند آواز شُمو ره نَشِنید و دَ فرباد شُمو گوش نَداد. ۴۶ امزی خاطر شُمو بلده روزای کلو دَ قادِش مَنَدید؛ یعنی، تا زمانی که دَ بیابو بُودید.

سرگردانی دَ بیابو

۲ اوخته مو پس دَور خوردی و از راهِ دریای سُرخ دَ بیابو سَفر کدی، امُو رقم که خُداوند دَز مه گفتند و بلده روزای کلو دَ گِرد-و-بَر کوهِستون سَعیر سرگردو بُودی. ۲ دَ امزُو

غَيْت خُداوند دَز مه گفت: ^٣ شُمو دَ گِرد-و-بَر امزى كوهِستو غَدر گلو سرگردو شُدید؛ آلى سُون شمال بوريد. ^٤ و دَ مردمَ امر کده بُگى: "شُمو از سرحدِ بِرارون خُواولاِدِ عيسو که دَ سعِير زِندگى مُونه تير مُوشِيد. أونا از شُمو ترس مُوخوره؛ پس غَدر هُوش خُوا ره بِكِيرِيد که قد ازوا جنجال نَكْنِيد، چون از زمِينِ ازوا دَ اندازه يگ قفِ پاي ام دَز شُمو نَمِيدِيم، چراكه كوهِستونِ سَعِير ره دَ عنوانِ مُلكِيت دَ عيسو دَديم. ^٥ خوراك ره ازوا دَ نقره خِريده بُخوريده و آوره ام ازوا دَ نقره خِريده وُچى كُنِيد، ^٦ ^٧ چون خُداوند، خُداي شُمو، شُمو ره دَ تمامِ کاراي دِست شُمو بَركت دَده؛ او راهِ رفتون شُمو ره دَ امزى بِبابون کله مِيدَنه. دَ امزى چِل سال خُداوند، خُداي شُمو قد شُمو بُوده و شُمو دَ هيچ چِيز مُحتاج نَبُودِيد. پس مو از سرحدِ بِرارون خُوا ولاِدِ عيسو که دَ سَعِير زِندگى مُونه، دور خوردي و راهِ دشت ره که از ايلت و عِصيون-جابَر تير مُوشه ايله کدى و از راهِ بِبابون موآب سَفر کدى.

اوخته خُداوند دَز مه گفت: موآب ره آزار-و-آذىت نَكُو و أونا ره دَ تَنگ نَكُو که جنگ کُنه، چون از زمِينِ ازوا هيچ چِيز شى ره دَ عنوانِ مُلكِيت دَز شُمو نَمِيدِيم، چراكه ما منطقه عار ره دَ عنوانِ مُلكِيت دَ ولاِدِ لوط دَديم. ^٩

-- ايمى ها که يگ قَومِ قَوى و کله بُود و مثلِ عناقيا قد های بِلنَد دَشت، ساپق دَ اونجى زِندگى مُوكد. ^{١٠} أونا ام مثلِ عناقيا از جَمِ رِفائيَا حِساب مُوشُد، ليکِن موآبيَا أونا ره ايمى ها کُوى مُوكد. ^{١١} عَيْنِ رقم حوريَا ساپق دَ سَعِير زِندگى مُوكد، ولے أولاِدِ عيسو أونا ره

ازونجی بُر کد؛ آرے، اونا حوریا ره از پیشِ رُوی خُو نابُود کد و دَ منطقه ازوا جای-دَ-جای شُد، امُو رقم که إسرائیل دَ سرزمینی که خُداوند دَ عنوانِ مُلکیت دَزوا دَده بُود، جای-دَ-جای شُد. --

۱۳ و خُداوند گفت: آلی باله شُدہ از دَرِه زارِد تیر شُنید. پس مو از دَرِه زارِد تیر شُدی.
۱۴ از زمانیکه از قادِش بَرنیع حَرکت کدی تا زمانیکه از دَرِه زارِد تیر شُدی، سی و هشت سال ره دَرِر گِرفت، تا پِگِ مردای جنگی امزُو نسل از مَنِه خیمه‌گاه از بَین رفت، امُو رقم که خُداوند دَ باره ازوا قَسم خوردد. ۱۵ دَ حقِیقت دِستِ خُداوند دَ خِلافِ ازوا بُود تا اونا ره از مَنِه خیمه‌گاه کامِلاً از بَین بُبره.

۱۶ وختیکه پِگِ مردای جنگی امزُو نسل از مینکلِ قَوم از بَین رفت، ۱۷ اوخته خُداوند دَز مه گفت: ۱۸ امروز تُواز عار که سرحدِ موآب آسته باید تیر شُنی. ۱۹ وختیکه دَ پیشِ اولادِ عمون رسیدی، اونا ره آزار-و-آذیت نَکُو قد ازوا جنجال نَکُو، چون از زمینِ اولادِ عمون هیچ چیز شی ره دَ عنوانِ مُلکیت دَز شُمو نَمیدیم؛ ما اُوره دَ اولادِ لوط دَدیم.

۲۰ -- اُم سرزمینِ رِفائیا حِساب مُوشُد و رِفائیا سابق دَ اونجی زِندگی مُوكد؛ لیکن عمونیا اونا ره زَمْزمی ها کُوی مُوكد. ۲۱ اونا یگ قَومِ قَوی و کَثِه بُود و مِثلِ عَناقیا قد های بِلند دَشت، مگم خُداوند اونا ره از پیشِ رُوی عمونیا نابُود کد و عمونیا اونا ره بُر کده دَ منطقه ازوا جای-دَ-جای شُد. ۲۲ خُداوند عَینِ کار ره بَلَدِه اولادِ عیسَو که دَ سَعِیر

زِندگی مُونه، انجام دد: او حوریا ره از پیشِ رُوی ازوا نابُود کد و اونا تَنِست که حوریا ره بُر کُنه و اولاًدِه عیسَو تا امروز د جای ازوا بُود-و-باش مُونه.^{۲۳} عَوّی ها که د آغِيلا تا غَزه زِندگی مُوكد، د وسیله کَفتوریا که از کَفتور آمدُد نابُود شُد و کَفتوریا د منطقه ازوا جای-د-جای شُد. --

و خُداوند گُفت: الی باله شُده کوچ کُنید و از دَرِه آرنون تیر شُنید. اینه، ما سِیحون اموری، پادشاهِ حِشبون ره قد سرزمین شی دِستِ از شُمو تسلیم کدیم. پس د تَصرُف کدونِ سرزمین ازو شروع کُو و قد ازو جنگ کُو.^{۲۴} امروز ما شروع کده ترس و وَحشت شُمو ره د بَلِه تمامِ قوم های زیر آسمو قرار میدیم؛ وختی اونا آوازِه شُمو ره بِشنوه، اونا د لَرْزه موقته و از ترس شُمو دِست-پیچه مُوشه.

پیروزی د بَلِه پادشاهِ حِشبون

اوخته قاصِدا ره از بیابونِ قِدیموت د پیشِ سِیحون پادشاهِ حِشبون قد اینی پیغامِ صُلح آمیز رَیی کده گُفتُم:^{۲۵} مو ره بیل که از سرزمین تُو تیر شُنی؛ مو د راهِ عُمومی موری و طرفِ راست یا چپ تاو نَمُوخوری.^{۲۶} خوراک ره د نُقره بَلِدِه مو سَودا کُو تا بُخوری و آو ره د نُقره دَز مو بَدی تا وُچی کنی؛ فقط دَز مه اجازه بَدی که پای-پیده از مُلک تُو تیر شُنم،^{۲۷} امُورقم که اولاًدِه عیسَو که د سَعِیر زِندگی مُونه و موآبیا که د عارِ زِندگی مُونه دَز مو اجازه دد. مو ره بیل تا از دریای اُرْدُن د سرزمینی تیر شُنی که خُداوند، خُدای مو دَز مو

^{۳۰} مَكْمَ سِيِحُونْ پادشاھ حِشْبُونْ نَهَايَتَ كَه مو از مُلَكْ شَى تِيرْ شُنْيَ، چراکه خُداوند،
خُدَائِي شُمو روح اُزو ره لَجُوج و دِل شَى ره سخت كُددَتَا او ره دِسْتِ از شُمو تسلِيمَ كُنه،
امُو رقم كه امروز ام شُمو مِيدَنَيد.

^{۳۱} خُداوند دَزَمَه گُفت: 'اينه، ما تسلِيمَ كدونِ سِيِحُونْ و سرزمِين شَى ره دَزْ تو شُروعَ كديم؛
پس امي آلى دَتَصْرُفَ كدونِ سرزمِين اُزو شُروعَ كُو.' ^{۳۲} اوخته سِيِحُونْ قد پَكِ نفَرَاي خُو
دَخِلافَ مو بُرْ شُدَ و بَلَده جنَگَ دِيَاهَصَ أَمَدَ، ^{۳۳} و خُداوند، خُدَائِي مو او ره دِسْتِ از مو
تسليِيمَ كد و مو او ره قد باچه هَاي اُزو و تمام قَومَ شَى زَدَى. ^{۳۴} دَامْزُو غَيَتِ پَكِ شارَاي
ازو ره گِرفتَي و دَهْ شارَ مَرَدا، خاتُونَوْ و بچِكِيچَا ره نابُودَ كَدَى؛ يِكِ نفرَ ره ام زِنَدَه
نَهَايَتَي. ^{۳۵} ليِكِنْ چارپِيا ره دِعنوانِ وُلجه بَلَده خُو گِرفتَي و مال-و-دارايِ شارَاي ره كَه
تَصْرُفَ كُددَى، آورَدى. ^{۳۶} از عَرَوَعِيرَ كَه دَبَغَلِ دَرَه آرنونَ أَسْتَه و شارَى كَه دَدَرَه يَه تَا
جلعاد، هيچ آغِيل نَتَنَىستَ كَه دَبَراَبِرِ از مو مُقاِمَتَ كُنه؛ خُداوند، خُدَائِي مو پَكِ ره دَزَ مو
تسليِيمَ كَد. ^{۳۷} مَكْمَ دَسرزمِينِ أولادِه عمَونَ، دَأَطْرافِ دَرَه يَبُوقَ، دَشارَاي كوهِستَوْ و دَهْ
جايَيَ كَه خُداوند، خُدَائِي مو، مو ره مَنَعَ كُددَ، نزِدِيكَ نَشَدَى.

^۱ بعد اُزو دور خوردی و د راه خو ادامه دده طرف باشان رسی شدی، و عوج پادشاه باشان قد تمام نفرای خو د خلاف مو بُرد تا د ادرعی قد مو جنگ کنه. ^۲ اوخته خداوند دز مه گفت: اُزو ترس نخور، چون ما او ره قد پگ نفرای اُزو و سرزمین شی د دست از تو تسلیم کدیم. د حق اُزو امو کار ره کو که د حق سیحون پادشاه آموری ها کدی که د حشبون زندگی مُوكد. ^۳ پس خداوند، خدای مو عوج پادشاه باشان ره ام قد تمام نفرای شی د دست ازمو تسلیم کد. مو او ره تا غیتی زدی که اُزو هیچ کس زنده نمند. ^۴ د امزو غیت پگ شارای اُزو ره گرفتی و شاری نمند که ازوا نگرفته بشی، آرے، مو شصت شار، یعنی تمام منطقه آرجوب ره که مملکت عوج د باشان بود، گرفتی. ^۵ پگ امزیا شارای دیوالدار بود که دیوال های بلند و درگه های پُشت بنددار دشت، علاوه از آغیلای بے دیوال که غدر کلو بود. ^۶ مو اونا ره کاملاً نابود کدی، امو کار ره که د حق سیحون پادشاه حشبون کددی، د حق ازوا ام کدی، یعنی د هر شار مردا، خاتونو و بچکیچا ره نابود کدی. ^۷ لیکن تمام چارپایا و مال-و-دارایی شارا ره د عنوان ولجه بلده خو گرفتی.

^۸ خلاصه، د امزو غیت سرزمین دو پادشاه آموریا ره د او طرف دریای اردن گرفتی، یعنی از دره آرنون تا کوه حرمون، ^۹ -- صیدونیا حرمون ره سیریون کوی مُوكد و آموریا او ره سینیر مُوكفت -- ^{۱۰} تمام شارای آواری ها، تمام چلعاد و تمام باشان ره تا سلخه و ادرعی

که شارای مملکت عوج د باشان بود، گرفتی.^{۱۱} عوج پادشاه باشان تنها کسی بود که از جمِ رفایا باقی مندد. اونه، تختِ خاوِ ازو که تختِ آینی یه، هنوز د منطقه رَتِ اولاده عمون موجود استه. درازی ازو نه توغی و بر شی چار توغی د مطابق توغی مروج استه.

تقسیم زمینا

از سرزمینی که مو د امزو غیت تصرُف کدی، ما منطقه عروعیر ره که د بغلِ دره آرنون ^{۱۲} استه قد نیم کوهستانِ جلعاد و شارای شی، د رئوبینیا و جادی ها ددم.^{۱۳} باقی مندِه جلعاد و تمام باشان ره که مملکت عوج بود د نیم طایفه مَنسی ددم، یعنی تمام منطقه آرجوب ره قد تمام باشان که سرزمین رفایا گفته موشد.^{۱۴} یائیر اولاده مَنسی تمام منطقه های آرجوب ره تا سرحدِ جشوریا و معکیا تصرُف کد، و امو سرمی ره، یعنی باشان ره د مطابق نام خود خو حوت-یائیر نام ایشت که تا امروز دمزی نام یاد موشه.^{۱۵} و جلعاد ره د اولاد بابه ماخیر ددم.^{۱۶} و د رئوبینیا و جادی ها از جلعاد تا دره آرنون، یعنی تا مینکلِ دره ره ددم که سرحد استه و تا دره بیوق که سرحد اولاده عمون استه؛^{۱۷} امچنان دشت و دریای اردن ره قد ساحلای شی، از کیرت تا دریای که د دشت استه، یعنی دریای مرده که د زیر دامنه های کوه پیسگه طرف شرق استه.

د امزو غیت دزوا امر کده گفتم: خداوند، خدای شمو ای سرمی ره دز شمو دده تا او ره تصرُف کنید، پس تمام مردای جنگی شمو آماده شده پیش پیش بِرaronِ اسرائیلی خو از

دریای اُرْدُن تیر شُنید.^{۱۹} لیکن خاتُونو، بچکیچا و چارپایای شُمو دَ شارای که دَز شُمو

دَدیم بُمنه، چُون ما مِیدَنُم که شُمو چارپایای کَلو دَرِید.^{۲۰} وختیکه خُداوند دَبرارون شُمو مِثل از شُمو آرامی دَد و اُونا ام سرزمینی ره که خُداوند، خُدای شُمو دَ او طرف دریای اُرْدُن دَزوا مِیدیه، تَصَرُّف کد، اوخته هر کُدم شُمو مِیتنید دَ مُلک خُو که دَز شُمو دَدیم، پس
بَیید.^{۲۱}

دَ امْزو غَيْت دَ يوشع أَمْر كَدَه گَفْتُم: تمامِ کارای ره که خُداوند، خُدای شُمو دَ حق امزى دُو پادشاه کد، تُو قد چیمای خُو دِیدی؛ خُداوند دَ حق پَگِ مَملَکَت های که شُمو از دریای اُرْدُن تیر شُده سُون ازوا مورِید، ام امُو کار ره مُونه.^{۲۲} ازوا ترس نَخورِید، چراکه خُداوند،
خُدای شُمو بَلَدِه شُمو جنگ مُونه.^{۲۳}

مَنْع شُدوْنِ مُوسَى از داخِل شُدو دَ كِنْعَان

دَ امْزو غَيْت دَ پَيشِ خُداوند عَذْر-و-زاری کَدَه گَفْتُم:^{۲۴} آی خُداوند-خُدا، تُو بُزْرَگَی و دِستِ قَوَى خُو ره دَ خِدمتگار خُو دَ نِشو دَدو شُدَى؛ کُدم خُدا دَ آسمو یا دَ زمی مِیتنَه که مِثل از تُو اعمال و کارای پُر قُدرت انجام بِدیه؟^{۲۵} مَره بَیل که از دریای اُرْدُن تیر شُنم تا امُو سرزمین خُوب ره که دَ او طرف آسته، بِنگُرم، یعنی امُو کوهِستون خُوب و لِبَنان ره.

لیکن خُداوند بخاطِر از شُمو دَ بَلَه مه قار بُود و عَذْر-و-زاری مَره گوش نَکد، بَلَکَه دَزمه

گفت: بَسْ كُو! دَ بارِه امزى مطلب دِيگه قد ازمه توره نَگى. ^{٢٧} دَ قِيلى پىسىگە بُرُ شُو و سُون غَرب، سُون شمال، سُون جنوب و سُون شَرق توخ كُو؛ خُوب توخ كُو، چراكه تُو امزى دریاى اُردن تير نَمُوشى. ^{٢٨} مَكَم دَ يوشِع وظِيفه بِدى و اُزو حِمايت کده او ره قَوى جور كُو، چراكه او پيش پيش امزى قَوم از دریاى اُردن تير مُوشه و سرزمِينى ره که تُو از دُور مِينگرى، بَلَدِه ازوا تقسيم مُونه. ^{٢٩} پس مو دَ دَرَه، رُوى دَ رُوى بَيت فِغور مَندى.

٤ مُوسىٰ مردم ره دَ اطاعَت کدو تشويق مُونه

^١ پس آلى آى بنى اسرائيل، احکام و دستورای ره که دَر شُمو تعلييم مِيدِيُم گوش بِگِيرِيد و دَ جاي بِيرِيد، تا زِنده بُمنِيد و بِتَنِيد دَ سرزمِينى که خُداوند، خُدای بابه کلونای شُمو، دَر شُمو مِيدِيه داخل شُنِيد و تَصَرُّف کُنید. ^٢ توره های ره که ما دَر شُمو امر مُونم، نَه چِيزى ره دَر شى اضافه کُنید و نَه ام چِيزى ره از شى کم کُنید، بَلَكِه احکام خُداوند، خُدای خُوره که مه دَر شُمو مِيدِيُم، نِگاه کُنید. ^٣ چِيمای شُمو چِيزى ره که خُداوند دَ بَعل-فِغور کد دِيد، يعني که خُداوند، خُدای شُمو هر کسی ره که از بُتِ بَعل دَ فِغور پَيرَوى کُدد، از مينكل شُمو نابُود کد، ^٤ مَكَم شُمو که دَ خُداوند، خُدای خُوره محکم چسپِيدِيد، پَك شُمو امروز زِنده أَستِيد.

^٥ اينه، ما احکام و دستورا ره دَر شُمو تعلييم مِيدِيُم، امُورقم که خُداوند خُدای مه، دَر مه

امر کده، تا شُمو دَ سرزمینی که داخل مُوشید و او ره تَصرُف مُونید، اونا ره دَ جای بیرید.

^۵ پس اونا ره نِگاه کده دَ جای بیرید، چراکه ای کار حِکمت و دانایی شُمو ره بَلِدِه قَوم های

دِیگه نِشو مِیدیه. وختیکه اونا پگِ امزی احکام ره بِشَنَوْه، مُوگیه: 'واقعاً ای مِلَّتِ بُزُرگ

^۶ چُون کُدم مِلَّتِ بُزُرگِ دِیگه آسته که خُدايونِ ازوا نزِدِیکِ

ازوا بَشه، رقمی که خُداوند، خُدای ازمو هر غَیْتیکه پیش شی دُعا مُونی نزِدِیکِ مو آسته؟

و کُدم مِلَّتِ بُزُرگِ دِیگه آسته که احکام و دسْتُورای عادِلانه مِثْلِ تمامِ امزی شریعت دَشته

بَشه که ما امروز دَ پیشِ از شُمو قرار مِیدیم؟

^۷ لیکِن احتیاط کُنید و خُوب فِکر خُو ره سُون جان خُو بِگیرید، نَشْنَه تمامِ چیزای ره که

چیمای شُمو دِیده پُرمُشت کُنید و نَشْنَه که امیا دَ پگِ روزای زِندگی شُمو از دِل شُمو پاک

^۸ شُنَه؛ بلکِه اونا ره دَ بچِکیچای خُو و دَ اولادای بچِکیچای خُو یاد بِدید. روزی ره دَ یاد

خُو بیرید که شُمو دَ حُضُورِ خُداوند، خُدای خُو دَ حوریب ایسته شُدید و خُداوند دَز مه

گُفت: 'قوم ره دَ پیش مه جَم کُو تاکه تورای خُو ره دَزوا بِشَنَوْنُم، تا اونا یاد بِگیره که دَ

تمامِ روزای زِندگی خُو دَ رُوی زمی از مه ترس دَشته بَشه و دَ بچِکیچای خُو ام یاد بِدیهه.'

^{۱۰} و شُمو پیش آمَدَه دَ دامونِ کوه ایسته شُدید دَ حالِیکه کوه تا نِیم آسمو دَ آتش مُوسوخت

و تریکی و آُورِ تیره او ره پوشَنَدُ. ^{۱۱} اوخته خُداوند قد شُمو از مینکلِ آتش توره گفت و

شُمو آواز توره های شی ره شِنیدید، لیکِن کُدم شکل ره نَدیدید، بلکِه تنها آواز ره

^{۱۲} او عهد خُو ره دَز شُمو بیان کده بَلِدِه شُمو وظِیفه دَد که دَ جای بیرید، یعنی شِنیدید.

«دَهْ حُكم» ره؛ و اونا ره دَ دُوح سِنگی نوشته کد.^{۱۴} و خُداوند دَ امْزُو غَيْت دَز مه امر کد که امُو احکام و دستورا ره دَز شُمو تعلييم بِدِيْم تا اُونا ره دَ سرزِمِيني که بَلِدِه تَصَرُّف کدون شى از دريای اُرْدُن تير مُوشِيد، دَ جاي بيりيد.

مَنْع كدون بُت پَرَسْتَى

روزى که خُداوند دَ حوريپ از مينكِلِ آتِش قد شُمو توره گفت، شُمو هيق شكل ره نَدِيدِيد، پس خُوب فِكر خُو ره سُون جان خُو بِكِيرِيد^{۱۵} که فاسِد نَشِينِيد و بَلِدِه خُو بُت دَ شكل هيق چيز جور نَكْنِيد: نَه دَ شكلِ مَرْد يا خاتُو،^{۱۶} نَه دَ شكلِ كُدَم حَيوانِ روی زمي، نَه دَ شكلِ مُرْغَكُوي بالدار که دَ آسمو پَر مِيزَنه،^{۱۷} نَه دَ شكلِ خِزندَه كُونِ روی زمي يا دَ شكل ماهيای که دَ زير آوهای زمي آسته.^{۱۸} و غَيْتِيكه شُمو باله سُون آسمو توخ مُونيد و آفتَو و ماهَتَو و سِتاره ها يعني تمام لشکر آسمو ره مِينَگِيرِيد، گُمراه نَشِينِيد و اُونا ره سَجَدَه و عِبادت نَكْنِيد، چراکه خُداوند، خُدای شُمو اُونا ره نصِيب تمام قَوم هاي زير آسمو کده.^{۱۹} دَ ياد شُمو بَشه که خُداوند شُمو ره گِرفته از كوره آپِن، يعني از مصر بُرو اوُرد تا قَوم اُزو بشِيد، امُو رقم که اِمروز أَسْتِيد.

خُداوند بخاطِر از شُمو دَ بَلِه مه قار شُد و قَسَم خورد که ما از دريای اُرْدُن تير نَمُوشُم و دَ امْزُو سرزِمِين خُوب که خُداوند، خُدای شُمو دَ عنوانِ مُلكِيت دَز شُمو مِيدِيه، داخل نَمُوشُم.^{۲۰} اَرَى، ما دَ امزى سرزِمِي مُومِرم و از دريای اُرْدُن تير نَمُوشُم، ليكِن شُمو تير مُوشِيد و

امو سرزمین خوب ره تصرف مونيد.^{۲۳} پس فکر خوره بگيريد که عهد خداوند، خدائی خوره که او قد شمو بسته کده، پرمشت نکنید و بُت دشکل هیچ چيز جور نکنید، چراکه خداوند، خدائی شمو، شمو ره منع کده.^{۲۴} چون خداوند، خدائی شمو آتشی استه که موسوزنه و خدائی غیرتی.

وختیکه شمو صاحب بچکیچا و نوسه گو شنید و دامزو سرزمی بلده وخت کلو ام زندگی کنید، اگه فاسد شنید و بُت دشکل یگو چيز بلده خور کنید و چيزی ره که د نظر خداوند، خدائی شمو بد استه انجام بدید و قار ازو ره باله بیرید،^{۲۵} ما آسمو و زمی ره امروز دبله شمو شاهد میگیرم که شمو امزو سرزمی که بلده تصرف کدون شی از دریای اردن تیر موشید دزودی نابود موشید و روزای کلو ره داونجی تیر نمونید، بلکه حتما نابود موشید.^{۲۶} خداوند شمو ره د مینکل قوم ها تیت پرک مونه و فقط یگ تعداد کم شمو د مینکل ملت ها، د جایی که خداوند شمو ره موبره باقی مومنه.^{۲۷} داونجی شمو خدایونی ره پرستش مونید که قد دست انسان از چيو و سنگ ساخته شده؛ خدایونی ره که نه مینگره، نه میشنوه، نه موخوره و نه بُوي مونه.^{۲۸} اوخته امزو جای شمو خداوند، خدائی خوره طلب مونيد و او ره پيدا مونيد، د شرطی که او ره قد تمام دل و تمام جان خوره طلب کنید.^{۲۹} وختیکه د سختي-وپريشاني گرفتار شدید و پگ امزى چيزا دبله شمو آمد، د روزای آخر شمو سون خداوند، خدائی خوره دور موخوري و از آيد شی موشید؛^{۳۰} اзи که خداوند، خدائی شمو، خدائی رحيم استه، او شمو ره ايله نمونه و شمو ره نابود نمونه و

عهدي ره که قسم خورده قد بابه کلوناي شمو بسته کده، پرمشت نمونه.

خاص بُودونِ خُدای اسرائیل

شمو د باره زمان های گذشته که پيش از شمو بوده پرسان کنید، از روزی که خدا آدم ره د روی زمی خلق کد شروع کنید و از يگ گوشیه آسمو تا دیگه گوشیه شی پرسان کنید که آيا امى رقم چيز بزرگ رخ دده يا مثل شی شنیده شده؟ ^{۳۳} آيا کدم قوم هرگز آواز خدا ره که از منه آتش توره گفته بشه شنیده، رقمی که شمو شنیدید و زنده مندید؟ ^{۳۴} آيا کدم خدا هرگز کوشش کده که بوره ويگ ملت ره از مينکل ملت دیگه د وسیله مصیبت ها، معجزه ها و چيزاي عجیب، د وسیله جنگ، دست زورتو و بازوی قوى و د وسیله وحشت بزرگ بگیره، رقمی که خداوند، خدای شمو د مصر بله شمو د پيش چیماي شمو امى کار ره انجام دد؟ ^{۳۵} ای چيزا بله شمو نشو دده شد تا بدینید که تنها خداوند خدا استه و غیر ازو دیگه خدا وجود نداره. ^{۳۶} او شمو ره ايشت که از آسمو آواز شی ره بشنويد تا شمو ره اصلاح کنه. او د روی زمی آتش بزرگ خو ره بله شمو نشو دد و شمو توره ازو ره از منه آتش شنیدید. ^{۳۷} و اзи که بابه کلوناي شمو ره دوست دشت، او أولاده ازوا ره بعد ازوا انتخاب کد. او حضور پيدا کده قد قدرت بزرگ خو شمو ره از مصر برو او رد، ^{۳۸} تا ملت های ره که از شمو کده کلوتر و قوى تر بود از پيش روی شمو بركنه و شمو ره داخل برد سرزمین ازوا ره د عنوان ملکيت دز شمو بديه، رقمی که امروز استه.

پس امروز بِدَنِید و دَ دِلْ خُو تَقْشِ كُنِيد که تنها خُداوند خُدا آسته، ام باله دَ آسمو و ام تاه دَ رُوي زمي؛ و هيچ خُدای دِيگه وجود نَدره.^{۴۰} احکام و دستوراي اُزو ره که ما امروز دَ شُمو امر مُونمِ نِگاه کُنِيد تا دَ خُوبی از شُمو و بچکِيچاي شُمو که بعد از شُمو ميبيه تمام شُنه و تا دَ سرزميني که خُداوند، خُدای شُمو بلده هميشه دَ شُمو ميديه، روزاي کلو باقى بُمنِيد.

شاراي پناهگاه

^{۴۱} اوخته موسى سِه شارره دَ طرفِ شرقِ دريای اُردن جدا کد^{۴۲} تا قاتيل دَ اونجى دوتا کنه، يعني کسي که همساپه خُوره سهواً دَ قتل بِرسنه و از پيش قد شى دشمنى نَدَشته بشه، ميتنه د يكى امزى شارا دوتا کنه و زنده بُمنه؛^{۴۳} امو شارا اينيا بُود: باصر د ببابو د زمينِ اوار که د رئوبينيا تعلق دَره، راموت د چلعاد که د جادى ها تعلق دَره و جولان د باشان که د مَنسَى ها تعلق دَره.

يادآوري شريعت

^{۴۵} اي شريعتي آسته که موسى پيشِ روی بنی إسرائيل ايشت. اينميا فرمان ها، احکام و دستوراي آسته که موسى دَ بنى إسرائيل دَ غَيْتى گفت که اونا از مصر بُرو آمدَد^{۴۶} و دَ او طرفِ دريای اُردن دَ دره، روی دَ روی بَيتِ فِغور دَ سرزمينِ سِيحون پادشاهِ آموريا که د

حِشْبُون حُكْمَرَانِي مُوكَد، رَسِيْدُد؛ سِيْحُون كَسِي بُود كَه مُوسِي وَبَنِي إِسْرَائِيلُ أَوْ رَه
شِكْسَت دَد. ^{٤٧} أُونَا سِرْزَمِينِ اُرْو وَسِرْزَمِينِ عَوْجَ پَادِشاَه باشان رَه كَه دُو پَادِشاَه أَمْورِيَا دَ
إِي طَرْفِ درِيَايِي أُرْدُن سُون شَرْق بُود، تَصَرُّفَ كَد: ^{٤٨} اَز عَرْوَعِيرَ كَه دَبَغِلِ دَرِّه أَرْنُون أَسْتَه
تا سِيرِيُون يَعْنِي كَوَه حِرْمُون، ^{٤٩} وَتَمَامِ دَشْتَ رَه دَإِي طَرْفِ درِيَاچَه أُرْدُن سُون شَرْقَ تَا
درِيَايِي كَه دَدَشْتَ أَسْتَه، دَزِيرِ دَامَنَه هَاهِي پِيسَگَه.

دَه حُكْم

٥ اَوْخَتَه مُوسِي پَگِ إِسْرَائِيلَ رَه كُويَ كَد وَدَزْوا گُفت: "آيَ قَوْمِ إِسْرَائِيل، احْكَام وَ
دَسْتُورَايِ رَه كَه ما إِمْرُوزَ دَزْ شُمُو بَيَانِ مُونُمَ گَوش كُنِيد وَأُونَا رَه يَادِ بِكِيرِيد وَدِقَت دَ
جَاهِ بِيرِيد. ^٦ خُداونَد، خُدَائِي مو دَكَوَه حُورِيبَ قَد مو عَهَدَ بَسْتَهَ كَد. خُداونَدَ اَمِي عَهَدَ رَه
تَنَهَا قَد آتَهَ گُونَ مو بَسْتَهَ نَكَد، بَلَكِهَ قَد اَزْمُو اَمَ بَسْتَهَ كَد كَه پَگَ مو إِمْرُوزَ دَإِنْجَى زِنَدَه
أَسْتَى. ^٧ خُداونَدَ دَكَوَه اَز مَنِه آتِشَ رُويَ دَرُويَ قَد شُمُو تُورَه گُفت. ^٨ ما دَامْزُو غَيْتَ دَ
مِينَكَلِ خُداونَدَ وَشُمُو اِيْسَتَه بُودُمَ تاَكَه تُورَه هَاهِي خُداونَدَ رَه دَزْ شُمُو بَيَانِ كُنمَ، چِراَكَه شُمُو
از آتِشَ تَرِسِيْدِيدَ وَدَبَلَهَ كَوه بُرْ نَشُدِيدَ. أَوْ گُفت:

٩ ما خُداونَد، خُدَائِي تُو أَسْتَمَ كَه تُو رَه اَز سِرْزَمِينِ مِصْرَ، اَز جَاهِي كَه غُلامَ بُودَي، بُرو
أَوْرَدُمَ.

۷ د پالُوی ازمه خُدایون دِیگه نَدَشته بَش.

۸ بَلِدِه خُو بُت جور نَكُو، نَه د شکل چیزای که باله د آسمو أَسْتَه يَا تاه د رُوي زمي و
يَا د زير آوهای زمي.^۹ أُونا ره سَجَدَه و عِبَادَت نَكُو، چون ما خُداوند، خُدای تُو،
خُدای غَيْرَتِي أَسْتُم و بچِيَّچا ره بخاطِرِ گَنَاه آتَهَگُون شَى تا پُشْتِ سِوْم و چارُم امْزُو
کسا که از مه بَد مُوبِره، جَزا مِيدِيُّم،^{۱۰} لِيَكِن رَحْمَت خُو ره تا هزار پُشْت نصِيب
کسای مُونُم که مَرَه دوست دَرَه و احکام مَرَه نِگاه مُونَه.

۱۱ نَامِ خُداوند، خُدای خُو ره دَمَقْصِدِ باطِلِ نَكِير، چون خُداوند کسای ره که نَامِ ازْوِ
ره دَمَقْصِدِ باطِلِ بِكِيره، بَسِ جَزا نَمِيله.

۱۲ روزِ آرام ره نِگاه کُو و او ره مُقدَّس حِساب کُو، امُورِ رقم که خُداوند، خُدای تُو دَزِ
تُو امر کده.^{۱۳} شَش روز کار کُو و پَگِ کاراي خُو ره انجام بِدَي. مَكْمَ روزِ هفتُم
يَگ روزِ آرام د احتِرامِ خُداوند، خُدای تُو أَسْتَه؛ دَمْزُو روزِ هيچ کار ره انجام نَدَى؛ نَه
خود تُو، نَه باچه تُو، نَه دُختَر تُو، نَه غُلام تُو، نَه كِنِيز تُو، نَه گاو و الاغ تُو و نَه
چارپایای دِيَگِه تُو، نَه بيگِنه که د چارديوالى تُو بَشه، تا غُلام و كِنِيز تُو رقم خود تُو
آلَى آرام بِكِيره.^{۱۴} د ياد خُو بَير که د سرزِمِينِ مصر غُلام بُودَي و خُداوند، خُدای تُو،
تُو ره د وسِيله دِستِ زور تُو و بازُوي قَوى ازونجي بُرو اوُرد؛ امزي خاطر خُداوند،
خُدای تُو، دَز تُو امر کده که روزِ آرام ره نِگاه كُنى.

۱۶ آته و آبه خو ره احترام کو، امو رقم که خداوند، خدای تُو دَزْ تُو امر کده، تا عمرِ
دراز دشته بَشی و د سرزمینی که خداوند، خدای تُو دَزْ تُو مُوبَخشَه، خَبَر-و-خُوبَی
نصِيب تُو شُنَه.

۱۷ قتل نَکُو.

۱۸ زِنا نَکُو.

۱۹ دُزِی نَکُو.

۲۰ دَضِدِ همسایه خو شاهدی دروغ نَدَی.

۲۱ خاتُونِ همسایه خو ره تَی چِیم نَکُو؛ دَخانه همسایه خو، دَزمِین شَی، غُلام شَی،
کنیز شَی، گاو و الاغ شَی و دَهیچ مالِ دِیگَه همسایه خو چِیم خو ره نَیل.

۲۲ ای توره ها ره خداوند دَپَگِ جماعت شُمو دَکوه از مَنِه آتش، آُور و تَریکَی تیره دَآواز
بلند گفت و دَزوا چیزی اضافه نَکد. او امی توره ها ره دُدو لَوح سنگی نوشتَه کد و دَزَ
مه دَد. وختیکَه شُمو آواز ره از مَنِه تَریکَی شِنیدید، دَحالِیکَه کوه دَآتش مُوسوخت،
شُمو پیشِ ازمه آمدید، یعنی پَگِ رَهبرای طایفَه ها و رِیش سفیدَای شُمو.^{۲۴} اوخته شُمو
گفتید: اینه، خداوند، خدای مو، جلال و بُزرگی خو ره دَز مو ظاهر کد و مو آواز شَی ره
از مَنِه آتش شِنیدی. امروز مو دیدی که خُدا قد انسان توره مُوگیه و انسان زِنده مُومَنه.

۲۵ پس آلی چرا باید بُمُری؟ چون ای آتشِ قَوی مو ره دَرمِیدیه و ام اگه آواز خداوند،
خدای خو ره ازی کَلوتَر بِشنَوی، مو مُومُری.^{۲۶} چون از تمامِ بَشَر کَی آستَه که آواز خدای

زِنده ره که از مَنِه آتِش توره مُوگیه شِنیده بَشه و زِنده مَنده بَشه، مِثْلِ که مو شِنیدی و زِنده مَندي؟ ^{۲۷} خود تُونزِدیک بُورُو و پِگِ چیزای ره که خُداوند، خُدای مو مُوگیه، گوش بِگیر و هر چیزی که خُداوند، خُدای مو دَز تُوكُفت، تُونزِد مُو بُگی و مو او ره گوش کده دَجای میری. ^{۲۸}

و خَتِیکه شُمو قد از مه گپ زَدید خُداوند تورای شُمو ره شِنید و دَز مه گُفت: 'ما تورای امزی قَوم ره که قد از تُوكُفت، شِنیدم؛ چیزای ره که اُونا گُفت خُوب آسته. ^{۲۹} کشِکه اُونا امی رقم دِل مِیداشت که از مه مِیترسِید و تمام احکام مَره همیشه دَجای میُورد تا بَلدِه همیشه دَخُوبی ازوا و بچکیچای ازوا تمام مُوشُد. ^{۳۰} بُورُو دَزوا بُگی که دَخیمه های خُو پس بوره. ^{۳۱} لیکِن تُو امینجی دَپیش ازمه ایسته شُوتا پِگِ احکام، قوانین و دستورا ره دَز تُوبُگیم تاکه تُونزِد مُوشُد. ^{۳۲} پس مُتوَّجه بَشِید که چیزی ره که خُداوند، خُدای شُمو، دَز شُمو امیا ره دَجای بَیره. ^{۳۳} پس مُطابِقِ هر راه-و-طريقی که امر کده، دَجای بَیرید؛ طرفِ راست یا چپ تاو نَخورِید. دَمُطابِقِ هر راه-و-طريقی که خُداوند، خُدای شُمو، دَز شُمو امر کده، رفتار کُنید تا زِنده بُمنید و دَخُوبی شُمو تمام شُنه و دَسرزمِینی که تَصرُف مُونید، عمرِ دِراز دَشته بَشِید.

۶^۱ اینمیا احکام، قوانین و دستورای آسته که خداوند، خدای شمو دز مه امر کده تا دز شمو تعليم بدیم و شمو اونا ره د سرزمینی که بلده تصرف کدون شی از دریای اردن تیر موشید، د جای بیرید، ^۲ تا شمو از خداوند، خدای خو ترس دشته بشید و تمام احکام و دستورای و ازو ره که ما دز شمو امر مونم د تمام روزای زندگی خو د جای بیرید، ام شمو و بچکیچای شمو و ام اولادای بچکیچای شمو تا عمر دراز دشته بشید. ^۳ پس آی بنی اسرائیل، شمو باید گوش بگیرید و د انجام ددون شی دقّت کنید، تا د خوبی شمو تمام شنه و تا تعداد شمو د سرزمینی که از شی شیر و عسل جاری آسته غدر کلو شنه، امو رقم که خداوند، خدای بابه کلونای شمو، دز شمو وعده کده.

۷^۱ آی قوم اسرائیل، گوش کو! خداوند، خدای مو، خداوند یکتا آسته. ^۲ پس خداوند، خدای خو ره قد تمام دل و تمام جان و تمام قوت خو محبّت کو. ^۳ آی توره ها ره که ما امروز دز تو امر مونم، د دل خو نقش کو ^۴ و اونا ره د بچکیچای خو د دقّت تعليم بدی و د غیتیکه خانه آستی، د غیتیکه راه موری، د غیتیکه خاو موشی و د غیتیکه باله موشی د باره ازوا تو ره بگی. ^۵ اونا ره بلده یادآوری د دست خو بسته کو و رقم نشان د مینکل چیما د پیشانی خو بند کو. ^۶ اونا ره د چوکات های درگه های خانه خو و د درگه های شار خو نوشته کو.

وختیکه خُداوند، خُدای تُو، تُوره دَ امْزو سرزمی که بَلِدِه بابه‌کلونای تُو ابراهیم و اسحاق و یعقوب قَسم خورد که دَز تُو میدیه، داخِل کد و شارای کَلَه و نوریند ره که تُو آباد نَکَدَه،^{۱۱} خانه‌های پُر از هر چیز خُوب ره که تُو پُر نَکَدَه، چاه‌های کَنَدَه شُدَه ره که تُو نَکَنَدَه، تاک‌های انگور و درختای زَیتون ره که تُو نَشَنَدَه دَز تُو دَد و تُو ازوا خورده سیر شُدَه،^{۱۲} اوخته هُوش تُو بَشَه، نَشَنَه که خُداوند ره پُرمُشت کَنَی، چون او تُو ره از سرزمین مصر، از جایی که غُلام بُودی بُرو آورد.^{۱۳} از خُداوند، خُدای خُوبترس و او ره عبادت کُو و تنها دَنَام اُزو قَسم بُخور.^{۱۴} از خُدایون دِیگه، یعنی از خُدایون قَوم‌های که دَگِرد-و-بر تُو آسته، پیرَوی نَکُو؛^{۱۵} چون خُداوند، خُدای تُو که دَمِنکل شُمو حُضُور دَره، خُدای غَیرَتی آسته؛ نَشَنَه که قارِخُداوند، خُدای تُو دَبِله تُو باله بَییه و تُو ره از رُوی زمی نابُود کُنه.

^{۱۶} خُداوند، خُدای خُوره آزمایش نَکُو، رقمی که او ره دَمَسا آزمایش کَدَی. فِکر خُوره بِگیر که احکام خُداوند، خُدای خُوره و فرمان‌ها و دستورای ره که دَز تُو امر کَدَه، نِگاه کُنَی. ^{۱۷} چیزی ره که دَنَظر خُداوند راست و خُوب آسته، انجام بَدَی تا دَخُوبی تُو تمام شُنَه و تُو دَ امْزو سرزمین خُوب که خُداوند بَلِدِه بابه‌کلونای تُو قَسم خورده وعده کَدَه، داخِل شُنَی و او ره تَصَرُّف کَدَه ^{۱۸} پَگِ دُشمنای خُوره از پیشِ رُوی خُوهی کُنَی، امْوَرَقَم کَه خُداوند گُفتَه.

وختیکه بچکیچای تُو د آینده از تُو سوال کده پُرسان گنه: 'معنای امزی فرمان ها،

احکام و دستورای که خداوند، خدای مو دَز شُمو امر کده، چی آسته؟' ^{۲۱} اوخته د

بچکیچای خو بُگی: 'مو د مصر غلام فرعون بودی، لیکن خداوند مو ره قد دست زور تو

از مصر بُرو اوُرد. ^{۲۲} خداوند د پیش چیمای مو معجزه های کله و ترسناک و چیزای عجیب

د ضد مصر، د ضد فرعون و د ضد پگ نفرای خانه شی ظاهر کد. ^{۲۳} او مو ره اُزونجی

بُرو اوُرد تا مو ره د سرزمینی داخل گنه که بَلِدِه بابه کلونای مو قسم خورد که دَز مو

میدیه. ^{۲۴} اوخته خداوند دَز مو امر کد که پگ امزی دستورا ره د جای اوُرده از خداوند،

خدای خو بترسی تا همیشه د خوبی مو تمام شنه و مو زنده بُمنی، امُو رقم که امروز

آسته. ^{۲۵} اگه مو د دقت پگ امزی احکام ره د حضور خداوند، خدای خو د جای بیری، امُو

رقم که او دَز مو امر کده، اوخته ای بَلِدِه ازمو یگ عمل عادلانه حساب مُوشه.

اطمار د باره گمراهی

٧ آی قومِ اسرائیل، وختیکه خداوند، خدای تُو، تُو ره د سرزمینی که بَلِدِه تصرُف

کدون شی د اونجی موری، داخل کد و ملت های کلو یعنی حتیا، جرجاشیا، اموریا،

کنعانیا، فربزیا، حویا و بیوسیا ره که هفت ملت کله تر و قوی تر از تُو آسته، از پیش رُوی

تُوهی کد، ^۲ و غیتیکه خداوند، خدای تُو اونا ره د دست تُو تسلیم کد و تُو اونا ره شکست

ددی، اوخته اونا ره کاملاً نابود گُو. قد ازوا عهد بسته نگو و د بَلِه ازوا رَحم نَگو. ^۳ قد

ازوا خیشی نَکُو: دُخترون خُو ره دَ باچه های ازوا نَدی و دُخترون ازوا ره بَلِدِه باچه های خُو نَکِیر،^۴ چراکه اُونا باچه های تُو ره از پَیَروی ازمه رُوی گردو مُونه تا خُدایون دِیگه ره عِبادت کُنه. اگه اُوطور شُنَه، آتِشِ قارِ خُداوند دَ خِلاف تُو دَر مِیگِیره و او تُو ره دَ زُودی نابُود مُونه.

پس شُمو قد ازوا اینی رقم رفتار کُنید: قُربانگاه های ازوا ره چَپه کُنید، ستون های پَرسِتِشی ازوا ره مَیده کُنید، بُت های آشیره ره تِکه-و-پرچه کُنید و بُت های تَراش شُدِه ازوا ره دَ آتِش بُسوْزِنید؛^۵ چُون شُمو بَلِدِه خُداوند، خُدای خُو قَوم مُقدَّس آستید. خُداوند، خُدای شُمو، شُمو ره از مینکلِ پِگِ قَوم های رُوی زمی إنتِخاب کد تا قَوم خاصِ ازو بَشِيد.

خُداوند بخاطِر ازی دِل خُو ره دَز شُمو بسته نَکد و شُمو ره إنتِخاب نَکد که شُمو از پِگِ قَوم های دِیگه کده کلوتر بُودید، چُون شُمو از پِگِ قَوم ها کده کمتر بُودید،^۶ بَلِکِه بخاطری که خُداوند شُمو ره دوست داشت و میخاست قَسمی ره که دَ بابه کَلونای شُمو خوردد، دَ جای بیره، او شُمو ره قد دِستِ زورتُو از جایی که غُلام بُودید بُرو آورد و از دِستِ فرعَون پادشاه مصر آزاد کد.^۷ امزي خاطر بِدَنید که تنها خُداوند، خُدای شُمو، خُدای یکتا آسته؛ او خُدای باوْفا آسته و عهد و رَحْمَة خُو ره قد کسای که او ره دوست دَره و احکام ازو ره دَ جای میره تا هزار پُشت برقرار نِگاه مُونه،^۸ مِكْمَ جَزَای کسای ره که ازو

بَدْ مُوبِرَه، دَ سَرْ شَى مِيرَه و أُونَا رَه نَابُودْ مُونَه. أُو دَ مِجاَزَاتِ كَسِى كَه اَزُو بَدْ مُوبِرَه
معطل نَمُونَه، بَلَكِه جَزَاي اَزُو رَه دَ سَرْ شَى مِيرَه. ^{١١} پَس احْكَام، قَوانِين و دَسْتُورَاهِ رَه كَه
ما إِمْرَوز دَز شُمو أَمْر مُونُمْ، دَ دِقَّت دَ جَاي بِيرِيد.

اَگه شُمو اَمِي دَسْتُورَاهِ رَه گَوشْ كُنِيد و اَمِيا رَه نِكَاه كَده دَ جَاي بِيرِيد، اوخته خُداونَد،
خُدَائِي شُمو عَهَد و رَحْمَتِي رَه كَه دَ بَابَه كَلُونَاهِ شُمو قَسَم خَورَد، قد شُمو بَرْقَار نِكَاه
مُونَه. ^{١٢} أُو شُمو رَه دَوْسَت مِيدَنه، بَرَكَت مِيدَيه و تِعْدَاد شُمو رَه كَلو مُونَه؛ أُو ثَمَر رَحْ
شُمو رَه، ثَمَر زَمِين شُمو رَه، يَعْنِي غَلَه و شِيرَه انْكُور و روْغُون زَيْتُون شُمو رَه بَرَكَت مِيدَيه
و گَوَسَلَه هَاهِي گَلَه و بَارَه هَاهِي رَمَه شُمو رَه دَ سَرْزَمِينَي كَه دَ بَابَه كَلُونَاهِ شُمو قَسَم خَورَد
كَه دَز شُمو مِيدَيه، كَلو مُونَه. ^{١٣} شُمو اَز پَگِ قَومَه كَده كَلوَتَر بَرَكَت يَافَتَه مُوشِيد؛ مَرَد يَا
خَاتُونِ نَازَاهِي دَ مِينَكِلِ اَز شُمو و چَارِپِيَاهِي شُمو و جُود نَمِيدَشَتَه بَشَه. ^{١٤} خُداونَد هَر رَقَم
نَاجُورِي رَه اَز شُمو دُور مُونَه و شُمو رَه دَ هِيَچْ كُدَم اَمْزُو مَرَضَهِيَاهِي بَدَ كَه دَ مِصَر دِيدِيد،
گِرْفَتَار تَمُونَه، بَلَكِه أُونَا رَه دَ بَلَه پَگِ كَسَاهِيَاهِي كَه اَز شُمو بَدْ مُوبِرَه. ^{١٥} شُمو بَايدِيَاهِي پَگِ
قَومَهِي رَه كَه خُداونَد دَ دِسْت شُمو تَسْلِيم مُونَه، نَابُود كُنِيد و دَ بَلَه اَزوَا رَحْ نَكِنِيد؛
خُدَائي اَزوَا رَه عِبَادَت نَكِنِيد، چُون أُونَا بَلَدِه شُمو دَام جَور مُوشَه.

إِمْكَان دَرَه كَه دَ دِل خُو بُكِيَيد: "إِي قَومَه اَز مو كَده غَدر كَلو يَاه، مو چَطُور مِيتَنَى أُونَا
رَه بُرْ كُنَى؟" ^{١٦} اَزوَا نَتَرسِيد؛ فَقَط دَيَاد خُو بِيرِيد كَه خُداونَد، خُدَائِي شُمو دَ حَقِ فِرَعَون و

پگِ مِصِرِیا چِیز کار کد. ^{۱۹} چِیمای شُمو مُصِبِت های بُزرگ، مُعْجزه ها و چِیزای عَجِیب ره دِید که دَ وسِیله ازوا خُداوند، خُدای شُمو قد دِستِ زورُتو و بازُوی قَوی شُمو ره بُرو اوُرد. پس خُداوند، خُدای شُمو قد پگِ قوم های که شُمو ازوا مِیترسِید، امُو رقم رفتار مُونه. ^{۲۰} علاوه ازی، خُداوند، خُدای شُمو گاو-زمبُورا ره دَ مینکلِ ازوا رَیی مُونه تا باقیمنده ها و تاشه شُده های ازوا ره نابُود کُنه. ^{۲۱} ازوا نَترسِید، چراکه خُداوند، خُدای شُمو که دَ مینکل شُمو آسته، خُدای بُزرگ و باهیَیت آسته. ^{۲۲} خُداوند، خُدای شُمو، ای مِلّت ها ره کم کم از پیشِ رُوی شُمو هَی مُونه؛ شُمو نَمیتَنید که اُونا ره دَ یگَدم نابُود کُنید؛ اگه نَه، تِعدادِ حیواناتِ وحشی دَ سرزِمین شُمو کَلو مُوشه. ^{۲۳} خُداوند، خُدای شُمو اُونا ره دَ دِست شُمو تسلیم مُونه؛ او اُونا ره دَ ترس-و-وحشتِ بُزرگ مِیندَزه تا وختیکه اُونا نابُود شُنه. ^{۲۴} او پادشاه های ازوا ره دَ دِستِ از شُمو تسلیم مُونه و شُمو نام های ازوا ره از زیر آسمو گُم-و-گُل مُونید؛ هیچ کس نَمیتنه دَ برابِر از شُمو مُقاومَت کُنه تا غَیتیکه اُونا ره کامِلاً نابُود کُنید. ^{۲۵} مُجَسمه های خُدايونِ ازوا ره دَ آتش بُسوَزَنید. دَ نُقره و طِلَّای که دَ امزُو بُت ها آسته، چِیم خُو ره نَیلید و بَلَدِه خُو نَگِیرید؛ نَشْنَه که دَ وسِیله ازوا دَ دام گِرفتار شُنِید، چُون اُونا دَ پیشِ خُداوند، خُدای شُمو نَجَس آسته. ^{۲۶} چِیز نَجَس ره دَ خانه خُو نَبِرِید، اگه بِنِرِید، شُمو ام مِثِلِ اُزو کامِلاً نابُود مُوشِید؛ بَلَکِه از چِیز نَجَس بے اندازه نَفَرَت کُنید و کِرک دَشته بَشِید، چُون او باید کامِلاً نابُود شُنه.

^١ آي قَومِ إِسْرَائِيلُ، پَگِ احْكَامِي ره که ما إِمْرُوزَ دَزْ تُو أَمْرُ مُونْمُ، دَدِقَتْ دَجَای بَيْرَ
تا زِنْدَه بُمْنَى وَ كَلُو شُنْنَى وَ سَرْزِمِينَى که خُداوند دَبَابَه كَلُونَى تُو قَسْمَ خورَدَه وَعْدَه کَدَ،
دَاخِلَ شُنْنَى وَأُو ره تَصَرُّفَ کُنْيَى. ^٢ دَيَادْ خُو بَيْرَ که خُداوند، خُدَائِي تُو دَامْزَى چَلَ سَالَ تُو
ره دَتَّمَامِ راه دَبِيَابُو رَهْبَرِي کد تاکَه تُو ره فَرَوْتَنَ کنه وَ آزْمَايِشَ کدَه بِدَنَه که دَدِلَ تُو چَى
آسْتَه، آيا احْكَامِ ازُو ره نِكَاه مُونَى يَا نَه؟ ^٣ أُو تُو ره گُشَنَه اِيشَتَه فَرَوْتَنَ کد وَ بَعْدَ ازُو
«مَنَ» ره دَزْ تُو خورَنَدَ که نَه خُودَ تُو أُو ره مِيشَنَخَتَى وَ نَه بَابَه كَلُونَى تُو، تا دَزْ تُو بُقَامَنَه
که إِنْسَانَ تَنْهَا دَوسِيلَه نَانَ زِنْدَه نِيَيه، بَلَكِه إِنْسَانَ دَوسِيلَه هَرَ كَلامَى که از دَانِ خُداوند بُرْ
مُوشَه زِنْدَه آسْتَه. ^٤ دَإِي چَلَ سَالَ كَالَائِي تُو دَجَانَ تُو نَشَارِيدَ وَ پَايَايَ تُو أَماَسَ نَكَدَ. پَسْ
دَدِلَ خُو فِكَرَ كُو وَ بِدَنَ: امُورِ رقمَ که يَكَ آتَه باِچَه خُو ره إِصْلَاحَ مُونَه، خُداوند، خُدَائِي تُو
امَ تُو ره إِصْلَاحَ کد. ^٥ امْزَى خاطِرِ احْكَامِ خُداوند، خُدَائِي خُو ره دَجَای بَيْرَ وَ دَمُطَابِقِ راه
ها-و-طَرِيقَهَيِ ازُو رَفَتَارَ كُو وَ ازُو بِتَرَس. ^٦ وَخْتِيكَه خُداوند، خُدَائِي تُو، تُو ره دَسَرْزِمِينَ
خُوبَ بُرْدَ، دَسَرْزِمِينَى که درِيَاجَهَهَا، چَشمَهَهَا وَ جَوِيَهَهَا آوَ از دَرَهَهَا وَ كَوهَهَهَا شَى
جارِي آسْتَه، ^٧ دَسَرْزِمِينَى که گَندُمَ، جَوَ، تاکَهَهَا انْكُوْرَ وَ دِرْخَتَاهِي انْجِيرَ وَ آنَارَ دَرَهَ، دَ
سَرْزِمِينَى که روْغُونِ زَيْتُونَ وَ عَسْلَ دَرَهَ، ^٨ دَسَرْزِمِينَى که نَانَ ره دَسَخَتَى پَيَدا کَدَه
نَمُوكَهَرِي وَ دَأُونَجَى دَهِيجَ چِيزَ مُحْتَاجَ نَمُوشَى، دَسَرْزِمِينَى که سَنَگَاهِ شَى آپَنَ آسْتَهَهَ وَ
از كَوهَهَهَا شَى مِسَ کَنَدَه مُونَى، ^٩ وَ تُو نَانَ خورَدَه سَيِيرَ شُدَى وَ خُداوند، خُدَائِي خُو ره

بخارطِ سرزمینِ خوب که دَزْ تُو دَدَه، شُکر-و-سِپاس گفتی، ^{۱۱} اوخته فِکر خُو ره بِگیر، که خُداوند، خُدای خُو ره پُرمُشت نَکْنی و احکام، قانُونا و دستورای ازو ره که ما امروز دَزْ تُو امر مُونم، دَجای بیرى. ^{۱۲} آرے، غیتیکه خورده سیر شُدی و بَلِدِه خُو خانه های خُوب آباد کده دَزْ شی جای شُدی، ^{۱۳} و گله و رمه تُو کلو شُد و نُقره و طِلّای تُو پَرِیمو و پِگ دارایی تُو زیاد شُد، ^{۱۴} اوخته دِل تُو مغُرور نَشْنَه و خُداوند، خُدای خُو ره که تُو ره از سرزمینِ مصر از جایی که غُلام بُودی بُرو اوُرد، پُرمُشت نَکْنی. ^{۱۵} او تُو ره دَبِیابونِ کله و ترسناک که خُشك و بے آو بُود و مارهای زاردار و دُمکَجَک ها دَشت، رَهبری کد؛ او بَلِدِه تُواز سنگِ خارا آو بُر کد ^{۱۶} و او دَبِیابو دَزْتُو «من» خورند که حتی با به کلونای تُو نَمِيشَنَخَت، تا که تُو ره فروتن کنه و تُو ره آزمایش کنه و دَآخِر دَحق تُو خُوبی کنه. ^{۱۷} پس دِل خُونگی: «قدرتِ خود مه و زورِ دست مه ای دارایی ره بَلِدِه مه حاصل کده.」 ^{۱۸} بَلِکِه خُداوند، خُدای خُو ره ياد گُو، چُون او آسته که دَزْ تُو قُدرت مِیدیه تا دارایی حاصل کنه؛ او ای کار ره مُونه تا عهد خُو ره که قد با به کلونای تُو قَسَم خورده بسته کد، برقرار نِگاه کنه، رقمی که امروز برقرار آسته.

و اگه خُداوند، خُدای خُو ره پُرمُشت کنه و از خُدايونِ دِیگه پَیَروی کده اونا ره پَرستِش و سَجَدَه کنه، ما امروز دَخِلاف تُو شاهِدی مِیدیم که حتماً نابُود مُوشی. ^{۲۰} آرے، رقم امزُو مِلت ها که خُداوند دَپیشِ رُوى تُو نابُود مُونه، تُو ام نابُود مُوشی، اگه از آوازِ خُداوند، خُدای خُو اطاعت نَکْنی.

ای قومِ اسرائیل گوش کو! تو امروز از دریای اردن تیر موشی تا د سرزمین ملت های که از تُو کده کلهتر و قوی تر استه، داخل شنی و شارای کله ره که دیوال های شی تا آسمو بلنداسته، تصرُف کُنی. ^۲ اونا مردمای کله و قد بلنداسته، اولاده عناق که تُو مینخشی و شنیدے که د باره ازوا گفته شده، ^۳ کی میتنه د مقابل اولاده عناق ایسته لیکن ^۴ امروز بدن که خداوند، خدای تُو رقم آتشی که موسوَنه پیش پیش تُو رفته از دریای اردن تیر موشه؛ او استه که اونا ره شکست میدیه و اونا ره د پیش تُو تسلیم شنه؟ ^۵ لیکن امروز بدن که بُر کُنی و د آسانی از بین بُری، امو رقم که خداوند دز تُو گفته. مونه تاکه تُو اونا ره بُر کُنی و د آسانی از بین بُری، امو رقم که خداوند دز تُو گفته.

^۶ پس وختیکه خداوند، خدای شمو، اونا ره از پیش روی شمو هی کد، د دل خو نگید که: بخاطر عدالت مو خداوند مو ره د ای سرزمی اورد تا ای ره تصرُف کُنی. ^۷ نه، بلکه بخاطر شرارَتِ امزی ملت ها استه که خداوند اونا ره از پیش روی شمو هی مونه. ^۸ ای بخاطر عدالت یا راستی دل شمو نییه که شمو د سرزمین ازوا داخل مُوشید و او ره تصرُف مونید، بلکه بخاطر شرارَتِ امزی ملت ها استه که خداوند، خدای شمو اونا ره از پیش روی شمو هی مونه، تا وعده ره که خداوند د بابه کلونای شمو ابراهیم و اسحاق و یعقوب قسم خوردد پوره کُنه. ^۹ پس بدلید که خداوند، خدای شمو ای سرزمین خوب ره بخاطر عدالت شمو، دز شمو نمیدیه تا او ره تصرُف کنید، چراکه شمو یگ قوم سرکش استید.

نتیجه نافرمانی از خداوند

۷ دَ يادِ خُو دَشته بَشِيد و پُرمُشت نَكْنید که چِطُور قارِ خُداوند، خُدای خُو ره دَ بیابو باله آوردید. شُمو از روزی که از سرزمینِ مصر بُرو آمدید تا غَيْتیکه دَ اینجی رَسِیدید، بار بار دَ خِلافِ خُداوند شورش کدید. ۸ دَ حوریب شُمو دَ اندازِه قارِ خُداوند ره باله آوردید که خُداوند دَ بَلِه شُمو غَضَبناک شُد و میخاست شُمو ره نابُود کُنه. ۹ وختیکه ما دَ بَلِه کوه بُر شُدم تا لَوح های سنگی ره بِگِیرم، یعنی لَوح های عهدی ره که خُداوند قد شُمو بسته کد، ما مُدتِ چِل روز و چِل شاو دَ کوه مندم؛ ما دَ اونجی نَه نان خوردم و نَه آو وُچی کدم. ۱۰ و خُداوند امُو دُو لَوح سنگی ره دَز مه دَد که قد کِلکِ خُدا دَ بَلِه شی نویشته شُدد؛ و دَ بَلِه ازوا تمامِ توره های بُود که خُداوند دَ کوه از مینکلِ آتش دَ روزی که شُمو جم شُده بُودید، دَز شُمو گفتند. ۱۱ بعد از خَتمِ چِل روز و چِل شاو خُداوند امُو دُو لَوح سنگی، یعنی لَوح های عهد ره دَز مه دَد. ۱۲ اوخته خُداوند دَز مه گفت: 'باله شُو، دَ زُودی ازینجی تاه بورو، چون قَوم تُو که اُونا ره از مصر بُرو آوردی فاسِد شُده. اُونا راه-و-طَریقی ره که ما دَزووا امر کدم دَ زُودی ایله کده و بَلِه خُو یگ بُتِ ریختنده شُده جور کده.'

۱۳ خُداوند بسم قد مه گپ زَدَه گفت: 'ما ای قَوم ره دِیدم که واقعاً یگ قَوم سرکش آسته. ۱۴ مره تنها بیل که امیا ره نابُود کنم و نامِ ازیا ره از تَی آسمو گُل کنم؛ و ما از تُو یگ قَوم قَوی تَر و کَلَّه تَر ازیا دَ وجود میرم.'

پس ما دَور خورده از کوه تاھ آمدُم دَ حالِیکه کوه دَ آتِش مُوسوخت و امُو دُو لوح عهد ام
 دَ دُو دِست مه بُود. ^{۱۶} اوخته ما توخ کُدم و دِیدُم که شُمو واقعاً دَ خِلافِ خُداوند، خُدای خُو
 گُناه کده بَلِدِه خُو یگ گوسله ریختنده شُده جور کدید و راه-و-طريقى ره که خُداوند دَز
 شُمو امر کُدم، دَ زُودی ايله کده بُودید. ^{۱۷} پس ما امُو دُو لوح ره گِرفته از دِستای خُو پورته
 کُدم و دَ پیشِ چِیم شُمو اُونا ره تِکه-و-پرچه کُدم. ^{۱۸} اوخته مِثِلِ دفعه پیشنه، بسم چِل روز
 و چِل شاو دَ حُضورِ خُداوند رُوى دَ خاک افتَدُم و نَه نان خورُدم و نَه آو وُچی کُدم، فقط
 بخاطرِ پِگِ گُناه های که کده بُودید، یعنی چِیزی ره که دَ نظرِ خُداوند بد بُود انجام دَده قار
 خُداوند ره باله آورده بُودید. ^{۱۹} چُون از قار و شِدَّتِ غَضَبِ خُداوند که دَ بَلِه شُمو باله آمدُد
 تا شُمو ره نابُود کُنه ترس خورده بُودم؛ لیکِن خُداوند اُوم دفعه ام دُعای مَره قبُول کد.
^{۲۰}
 خُداوند دَ بَلِه هارُون کَلو قار شُدد که میخاست اُو ره نابُود کُنه، لیکِن ما دَ امزُو غَیت
 بَلِدِه هارُون ام دُعا کُدم. ^{۲۱} اوخته ما سَبَبِ گُناه شُمو، یعنی امُو گوسله طِلایی ره که جور
 کده بُودید گِرفته دَ آتِش سوختنَدُم و اُو ره ٹُوٹه ٹُوٹه کده خُوب سَيِّدم تا رقمِ خاک نَرم شُد؛
 بعد ازو خاک شی ره دَ جویی که از کوه جاری بُود، پاش دَدم.

^{۲۲} شُمو دَ تَبعیره، مَسَا و قِبروت-هتاوه ام قارِ خُداوند ره باله آورِدید. و غَیتیکه خُداوند
 شُمو ره از قادِش بَرنیع رَبی کده گُفت: بُورِید و سرزِمینی ره که ما دَز شُمو دَدیم تَصَرُف
 کُنید، شُمو از امِرِ خُداوند، خُدای خُو سرپیچی کدید، چُون دَزُونَه اعتماد کدید و نَه از
 آید شی شُدِید. ^{۲۳} از روزی که شُمو ره مینَخشم، شُمو دَ خِلافِ خُداوند شورش کده مورید.

آرې، ما بَلِدِه چَل روز و چَل شاو دَ حُضُورِ خُداوند رُوي دَ خاک افْتَدُم، چُون خُداوند

گُفتند که شُمو ره نابُود مُونه.^{۲۶} اوخته ما دَ پیشِ خُداوند دُعا کده گُفتُم: 'آی خُداوند-خُدا،
ای قَوم ره که مالِ خود تُو آسته و تُو اُونا ره قد بُزُرگى خُوا آزاد کدی و دَ وسیله دِستِ قَوى
خُوا از مصر بُرو آوردی، نابُود نَكُو.^{۲۷} خِدمتگارای خُوا ابراهِيم و إسحاق و يعقوب ره دَ ياد
بَير و دَ سرکشی امزی قَوم و دَ شرارت و گُناهِ ازیا نظر نَكُو.^{۲۸} اگه نَه، مردم سرزمینی که
مو ره از اُونجی بُرو آوردی، مُوگیه، "ازی که خُداوند نَتَنیست اُونا ره دَ سرزمینی بُبره که
بَلِدِه ازوا وعده کُدد و ازی که اُونا بَد شی میمَد، اُونا ره بُرو آورد تا دَ بیابو از بَین بُبره."

^{۲۹} ولے آی خُداوند، اُونا قَوم تُو آسته و مالِ خود تُو که اُونا ره قد قُدرتِ بُزُرگ و بازُوى
قوی خُوا بُرو آوردی.

دُو لَوح سنگی نَو

۱ دَمْزو غَيْت خُداوند دَز مه گُفت: 'دُو لَوح سنگی مثلِ لَوح های اوّلنَه بَلِدِه خُوا
تراش کُو و دَ کوه بُر شُدَه پیشِ ازمه بیه. یگ صندوقِ چوبی ام بَلِدِه خُوا جور کُو.^{۳۰} ما دَ
بَلِه ازوا کلمه های ره نوشتَه مُونُم که دَ بَلِه لَوح های اوّلنَه بُود و تُو اُونا ره مَیدَه کدی؛
اوخته تُو اُونا ره دَ صندوق بیل.^{۳۱} پس ما یگ صندوق از چیوِ آکاسی جور کُدم و دُو لَوح
سنگی رقمِ لَوح های اوّلنَه تَراش کُدم و امُو دُو لَوح ره دَ دِست خُوا گِرفته دَ کوه بُر شُدَم.^{۳۲}
اوخته خُداوند دَ بَلِه امزُو دُو لَوح کلمه های اوّلنَه ره نوشتَه کد، امُو «دَه حُكم» ره که

خُداوند دَ کوه از مینکلِ آتِش دَ روزی که شُمو جَم شُده بُودید، دَزشُمو گُفتُد؛ و خُداوند اُونا ره دَز مه دَد. پس ما دَور خورده از کوه تاه آمدُم و لَوح ها ره دَ صندوقی که جور کده بُودُم ایشتُم؛ اُونا هنوز دَ امونجی آسته، امُو رقم که خُداوند دَز مه امر کُدد.

^٥بنَى إِسْرَائِيلَ از بِئِيرُوتِ بنَى-يَعْقَانَ دَ مُوسِيرَه كَوْچَ كَدَ وَ هَارُونَ دَ امُونجِي فَوْتَ كَدَه دَفَنَ شُدَّ وَ باَچَه شَى إِلْعَازَارَ دَ جَايَ ازُو پِيشَوا تَعْيِينَ شُدَّ. ^٦اَزُونجِي اُونا دَ گُدْگُودَه كَوْچَ كَدَ وَ اَزَ گُدْگُودَه دَ يُطْبَاتَه، دَ سَرْزَمِينَى کَه از شَى جَويَه هَايَ آَوَ جَارِيَ آَسْتَه. ^٧دَ اِمْزُو غَيْتَ خُداوند طَايِفَه لَاوِي رَه جَدا کَدَ تَا صَنْدُوقِ عَهْدِ خُداوند رَه إِنْتِقالِ بِدِيهِ وَ دَ حُضُورِ خُداوند اِيَسْتَه شُدَّه او ره خِدمَتَ کُنه وَ دَ نَامِ اَزُو قَومَ رَه بَرَكَتِ بِدِيهِ؛ وَ تَا إِمْرَوْزَ اُونا خِدمَتَ مُونَه. ^٨امْزِي خاطر لَاوِي دَ مِينَكَلِ بِرَارُونَ خُو كَدَمَ تَقْسِيمَ وَ مُلْكَ نَدرَه؛ تَقْسِيمَ اَزُو از طَرفِ خُداوند مُهَيَا مُوشَه، امُو رقم کَه خُداوند، خُدَى شُمو دَزُو گُفتَه.

^٩پس ما رقم دَفعَه اوَّل چَل رَوزَ وَ چَل شَاوَ دَ کوه منَدُم؛ وَ اوَّم دَفعَه ام خُداوند دُعَاءِ مَرَه قَبُولَ کَدَ وَ نَخَاستَ کَه شُمو رَه نَابُودَ کُنه. ^{١٠}خُداوند دَز مه گُفت: 'بَالَه شُو وَ دَ سَفَرَ خُو اِدامَه دَدَه پِيشَ پِيشَ اِمْزِي قَومَ زَيَيَ شُو تَا اُونا دَ سَرْزَمِينَى کَه بَلَدِه بَابَهَ كَلُونَى اِزوا قَسَمَ خَورَدُمَ کَه دَزَوا مِيدِيْمَ دَاخِلَ شُنَهَ وَ او رَه تَصَرُّفَ کُنه.'

ترس از خُداوند

۱۲ پس آلی آی قَوْمِ إِسْرَائِيلُ، خُداوند، خُدای شُمو از شُمو چی میخایه، بَغَيْرِ ازی که از خُداوند، خُدای خُو بِتَرَسِید، دَمُطَابِقِ راه-و-طَرِيقِ اُزو رفتار کُنِید، او ره دوست دَشته بشید و خُداوند، خُدای خُو ره قد تمامِ دل و قد تمامِ جان خُو خدمت کُنِید^{۱۳} و احکامِ خُداوند و دستورای شی ره که ما امروز دَز شُمو امر مُونم دَ جای بیرید تا دَ خَيْر-و-خُوبی شُمو تمام شنہ.

۱۴ بِدَنِید که آسمو، حتیٰ آسمونِ آسمونا دَ خُداوند، خُدای شُمو تعلق دَرَه و زمی قد تمامِ چیزای که دَز شی آسته، اُزو یه، با وجودِ امزی چیزا خُداوند دل خُو ره دَ بابه کلونای شُمو بسته کد و اُونا ره مُحَبَّت کد و بعد ازوا اولادِه ازوا ره، یعنی شُمو ره از مینکل پگِ قَوْمِ ها انتِخاب کد، امُو رقم که امروز آسته.^{۱۵} پس قَلْبِ های خُو ره خَتنَه کُنِید و دِیگه سرکشی نَکُنِید،^{۱۶} چراکه خُداوند، خُدای شُمو، خُدای خُدایو و رب الارباب آسته، او خُدای بُزرگ، قُدرتمند و باهیبَت آسته که طرفداری نَمُونه و رِشَوت نَمِیگیره.^{۱۷} او دَ داد یتیما و خاتونوی بیوه مِیرَسَه و بیگنه‌گو ره دوست مِیدَنَه و دَزوا خوراک و پوشاك میدیه.^{۱۸} پس بیگنه‌گو ره دوست بِدَنِید، چراکه شُمو ام دَ سرزمینِ مصر بیگنه بُودید.^{۱۹} تنها از خُداوند، خُدای خُو بِتَرَسِید و او ره عبادت کُنِید؛ دَزو محکم بِچَسپِید و تنها دَ نامِ اُزو قَسَم بُخورِید.^{۲۰} حمد-و-ثنای شُمو فقط بَلَدِه اُزو بَشه که او خُدای شُمو آسته و کارای بُزرگ و

هیبَت‌ناک ره که چِیمای شُمو دِیده، بَلَدِه شُمو انجام دَدَه.^{۲۲} بابه‌کلونای شُمو هفتاد نفر بُود که دَ مِصر رفت، لیکِن آلی خُداوند، خُدای شُمو، تِعداد شُمو ره رقمِ ستاره‌های آسمو کلو کده.

۱۱ پس شُمو باید خُداوند، خُدای خُو ره دوست بِدَنِید و وظِیفه، قانُونا، دستُورا، و احکام شی ره همیشه دَ جای بیرِید.^۲ بِدَنِید که ما امروز قد بچِیچای شُمو که نَه اصلاح خُداوند، خُدای شُمو ره دِیده و نَه خبر دَره، توره نَمُوگیم، بلکِه قد شُمو توره مُوگیم، که دَ باره بُزرگی، دِستِ زورتُو و بازُوی قَوی خُداوند مِیدَنِید،^۳ و از مُعجزه‌ها و کارای ازو که دَ مِصر دَ حقِ فِرعون پادشاهِ مِصر و دَ حقِ تمام سرزمین ازو انجام دَد^۴ و از چِیزای که دَ حقِ لشکرِ مصریا و دَ حقِ آسپ‌ها و گاذی‌های جنگی ازوا کد خبر دَرِید. شُمو دِیدِید که خُداوند چُطور آوِ دریای سُرخ ره دَ بَلَه ازوا اُورد غَتِیکه اونا شُمو ره دُمبال مُوكد و چُطور اُونا ره نابُود کد که تا امروز یاد مُوشه.^۵ از چِیزای که او دَ بیابو بَلَدِه شُمو انجام دَد تا وختِیکه شُمو دَ اینجی رَسِیدِید^۶ و از چِیزای که دَ حقِ داتان و آپیرام باچه‌های إلیاب اولاًدِه رئوبین کد، یعنی که چُطور زمی دان خُو ره واز کد و اُونا ره قد خانوار و خَیمه‌های ازوا و هر زِنده‌جانی که قد ازوا بُود از مینکلِ پگِ اسرائیل قُورت کد، ام خبر دَرِید.^۷ آرَه، چِیمای شُمو تمام امزُو کارای بُزرگ ره که خُداوند کد، دِید.

اجرِ اطاعت از خُداوند

پس پگِ احکامی ره که ما امروز دَز شُمو امر مُونم دَ جای بَیرید تا قَوی شُنید و بَلده گِرفتون سرزمینی که از دریای اردن تیر مُوشید، دَز شی داخل شده او ره تَصْرُف کُنید و تا دَمزُو سرزمی که خُداوند دَ بابه کلونای شُمو قَسم خورد که دَزوا و دَ اولاَدِه ازوا میدیه، عمرِ دراز دَشته بَشید، دَمزُو سرزمی که از شی شیر و عسل جاری آسته.^{۱۰} چون دَ سرزمینی که شُمو داخل شده او ره تَصْرُف مُونید، رقمِ سرزمین مِصر که از شی بُر شُدید نییه؛ دَ اونجی شُمو تُخُم ره کِشت مُوكِدید و او ره رقمِ کُرد سَوزِیجات دَ زور-و-زَحمت خُ آو میدید،^{۱۱} بَلکِه سرزمینی که شُمو بَلده گِرفتون شی از دریای اردن تیر مُوشید، یگ سرزمین پُر از کوه ها و دَرّه ها آسته که از بارِشِ آسمو آو مُوحوره.^{۱۲} او سرزمینی یه که خُداوند، خُدای شُمو مُتَوَّجه ازو آسته و نظرِ خُداوند، خُدای شُمو همیشه دَ بَلَه ازو آسته، از شروع سال تا آخر سال.^{۱۳}

اگه احکامِ ازو ره که ما امروز دَز شُمو امر مُونم، دَ دِقت گوش بِگیرید و خُداوند، خُدای خُو ره دوست بِذَنید و او ره قد تمامِ دِل و قد تمامِ جان خُو خِدمت کُنید،^{۱۴} اوخته او بارِش ره بَلده زمینای شُمو دَ موسم شی میدیه، ام بارِشِ اول و ام بارِشِ آخر ره، تا بِتنید غَلَه، شیره انگور و روغنِ زَیتون خُو ره جَم کُنید.^{۱۵} او دَ عَلْفَچَر های شُمو بَلده چارپایای شُمو علف سَوزِ دلجمی مُونه و شُمو از پگِ خوراک ها خورده سیر مُوشید.

هُوش خُوره بِگِيرِيد که دِل شُمو بازی نَخوره و گُمراه نَشْنِيد که خُدايونِ دِيگَه ره پَرستِش
کُنِيد و دَزوا سَجَدَه کُنِيد؛^{١٧} اگه نَه، آتِشِ قارِ خُداوند دَ خِلاف شُمو دَر مِيگِيره و او آسمو
ره بسته مُونه تا بارِش نَباره و زمی حاصل خُوره نَدیه و شُمو امزُو سرزِمِین خُوب که
خُداوند دَز شُمو مِيديه دَ زُودی نابُود مُوشِيد.

پس امی تورای مَره دَ دِل و جان خُوره بِدِيد و اونا ره بَلدِه يادآوری دَ دِست خُوره بسته
کُنِيد و رقم نشان دَ مينکل چِيمَا دَ پیشانی خُوره بَند کُنِيد.^{١٩} اونا ره دَ بچِكيچای خُوره تعلیم
بِدِيد و دَ غَيْتِيکه خانه آستَى، دَ غَيْتِيکه راه موری، دَ غَيْتِيکه خاو مُوشی و دَ غَيْتِيکه باله
مُوشی دَ باره ازوا توره بُگی.^{٢٠} اونا ره دَ چوکات های درگه های خانه خُوره و دَ درگه های
شار خُوره نوشتَه کُنِيد،^{٢١} تا روزای عُمر از شُمو و روزای عُمر بچِكيچای شُمو دَ سرزِمِينی که
خُداوند دَ بابه کَلونای شُمو قَسم خورد که دَزوا مِيديه، دراز شُنه، دَ اندازه روزای که آسمو
دَ بَلِه زمی آستَه.

چُون اگه شُمو تمام امزي احکام ره که ما دَز شُمو امر مُونم دَ دِقت دَ جای بِيرِيد و
خُداوند، خُداي خُوره دوست بِدِنید و دَ مُطابِق تمام راه ها-و-طَرِيقَي ازو رفتار کُنِيد و دَزُور
محکم بِچَسپِيد،^{٢٣} اوخته خُداوند پَگ امزي مِلت ها از پیشِ روی شُمو هَي مُونه و شُمو
سرزِمِين مِلت های كَلَهَر و قَويَّتَر از خود ره تَصَرُف مُونِيد.^{٢٤} دَ هر جایي که پای خُوره
بِيلِيد، امُوجای از شُمو مُوشَه؛ سرحداي سرزِمِين شُمو از بیابو تا لِبنان و از دريا يعني

دریای فرات تا دریای غربی ادامه پیدا مونه.^{۲۵} هیچ کس نمیتنه که د برابر شمو مقاومت کنه، چراکه خداوند، خدای شمو ترس و وحشت شمو ره د بله تمام مردم امزو سرزمنی، د هر جایی که قدم بیلید قرار میدیه، امو رقم که دز شمو گفته.

اینه، ما امروز د پیش روی شمو برکت و نالت ره میلم.^{۲۷} برکت مینگرید، اگه از احکام خداوند، خدای خو که ما امروز دز شمو امر مونم، اطاعت کنید؛^{۲۸} نالت موشید، اگه از احکام خداوند، خدای خو اطاعت نکنید و از راه-و-طريقى که ما امروز دز شمو امر مونم بگردید و از خدایون دیگه که هرگز نمیشنختید پیروی کنید.

وختیکه خداوند، خدای شمو، شمو ره د سرزمینی که بله گرفتون شی داخل موشید بُرد، اوخته برکت ره د کوه چرزيم و نالت ره د کوه عيال قرار بديد.^{۳۰} اونا د او طرف دریای اردن استه، طرف راهی که آفتون میشينه، د سرزمین کنعانی های که د دشت زندگی اينه، روی د روی چلجال د نزديک بلوط های مورخ.^{۳۱} شمو د زودی از دریای اردن تیر شده داخل موريد تا سرزمینی ره که خداوند، خدای شمو دز شمو میدیه تصرف کنید و غیتیکه او ره گرفتید و د اونجی جای-د-جای شدید،^{۳۲} فکر شمو بشه که تمام احکام و دستورای ره که ما امروز د پیش روی شمو میلم، د جای بیرید.

خُداوند ره د جایی عِبادت کُنید که او انتِخاب مُونه

۱۲ ^۱ اینی دستورا و قانونا ره شُمو د سرزمینی که خُداوند، خُدای بابه‌کلونای شُمو دز شُمو دده تا او ره تَصْرُف کُنید، دِقت د جای بیرید، یعنی د تمام روزای که شُمو د رُوى زمی زِندگی مُونید. ^۲ شُمو تمام جای های ره که مِلت ها د مَنه ازوا خُدايون خُو ره پرستش مُونه، بعد از تَصْرُف کدون سرزمین ازوا کاملاً خَراب کُنید، چی د کوه های بِلند بَشه، چی د بَلِه تِپه ها و چی د تَی درختای سَوَز. ^۳ قُربانگاه های ازوا ره بیرو کُنید، ستون های پَرستشی ازوا ره مَیده کُنید، بُت های آشیره ازوا ره د آتش دَر بِدید و بُت های تَراش شُدِه خُدايون ازوا ره تِکه-و-پرچه کُنید و د امزی رقم نام های ازوا ره اُونجی گُم-و-گُل کُنید.

۱۳ ^۴ شُمو خُداوند، خُدای خُو ره د امزو طریقه ها و جای ها پرستش نَکُنید، ^۵ بَلکه جایی ره که خُداوند، خُدای شُمو از مینکل پگ طایفه های شُمو د عنوان جای بُود-و-باش خُو انتِخاب مُونه تا نام خُو ره د اُونجی قرار بِدیه، امُو جای ره طلب کُنید و د اُونجی بورید. ^۶ شُمو قُربانی های سوختنی، قُربانی های دِیگه، ده-یگ ها، هدیه های بِلند کَدَنی، نَذر ها، هدیه های داوطلبانه و اولباری گله و رمه خُو ره د اُونجی بُرید. ^۷ د اُونجی د حُضور خُداوند، خُدای خُو بُخورید و شُمو و خانوار شُمو بَلِدِه حاصل دِست خُو که خُداوند، خُدای شُمو، شُمو ره قد اُزو بَرکت دده خوشی کُنید.

شُمو ای رقم رفتار نَکُنید، رقمی که مو امروز د اینجی رفتار مُونی؛ د اینجی هر کس هر

جای که د نظر شی صحیح معلوم شنه، قربانی مونه.^۹ شمو هنوز د جای آرام و ملک-و-
زمینی که خداوند، خدای شمو، دز شمو میدیه نرسیدید،^{۱۰} لیکن وختیکه از دریای اردن
تیر شده دمزو سرزمی که خداوند، خدای شمو د عنوان ملکیت دز شمو میدیه جای-د-جای
شدید، و خداوند شمو ره از شر پگ دشمنای گرد-و-بر شمو آرامی دد و شمو د آمنیت
زندگی کدید،^{۱۱} اوخته د امزو جای که خداوند، خدای شمو انتخاب مونه تا نام خو ره دز
شی قرار بديه، اينی چيزا ره که دز شمو امر مونم بيريد: قربانی های سوختنی، قربانی
های دیگه، ده-یگ ها، هدیه های بلند شده و بهترین حصه ندر های خو ره که بلده
خداوند ندر میگيريد.^{۱۲} و د اونجی د حضور خداوند، خدای خو قد باچه ها و دخترون خو،
غلاما و کنيزاي خو و قد لاویا که د مينكل شمو زندگی مونه، خوشی کنید، چراكه لاويا
د مينكل شمو نه تقسيم دره و نه ملک.^{۱۳} فکر شمو بشه که قربانی های سوختنی خو ره
د هر جای که د نظر شمو صحیح معلوم شد، تقدیم نکنید،^{۱۴} بلکه تنها د جايی که خداوند
د مينكل يکی از طایفه های شمو انتخاب مونه، د اونجی قربانی های سوختنی خو ره
تقدیم کنید و د امونجی هر چizi ره که ما دز شمو امر مونم، انجام بديد.

ولے هر وختیکه دل شمو شنه، شمو میتنید د تمام منطقه های خو حیوانا ره حلal کنید
و مطابق برکتی که خداوند، خدای شمو دز شمو میدیه گوشت شی ره بخورید؛ نفرای پاک
و ناپاک میتنه ازو بخوره، امو رقم که بز کوهی و آهو ره مouxوره.^{۱۵} مگم خون ره
نخورید، بلکه او ره مثل آو د زمی لوو کنید.^{۱۶} پس، ده-یگ غله-و-دانه، شیره انگور و

روغونِ زَيْتُون خُوره، اوْلباری گله و رمه خُوره، نذر های ره که دَ گردون خو میگیرید،
هدیه های داوطلبانه خو و هدیه های خاص خُوره دَ منطقه های خو نخورید؛ ^{۱۸} بلکه اونا
ره دَ حضورِ خداوند، خُدای خُود جایی که خداوند، خُدای شُمو انتخاب مُونه، قد باچه ها
و دُخترون خو، غلاما و کنیزای خو و لاویا که دَ مینکل شُمو زندگی مُونه، بخورید و
بلده چیزای که حاصلِ دست شُمو آسته، دَ حضورِ خداوند، خُدای خو خوشی کنید. ^{۱۹} فِکر
شُمو بشه که لاویا ره تا زمانی که دَ سرزمین خو زندگی مُونید، از یاد خو نبیرید.

^{۲۰} وختیکه خداوند، خُدای شُمو سرزمین شُمو ره کله کد، امُو رقم که وعده کده، و شُمو
بخاهید که گوشت بخورید، ازی که دل شُمو گوشت شده، هر غیتیکه دل شُمو شد، شُمو
میتنید گوشت بخورید. ^{۲۱} اگه جایی که خداوند، خُدای شُمو انتخاب مُونه تا نام خو ره دَ
شی قرار بدهیه، از شُمو دور بشه، اوخته از گله و رمه خُو که خداوند دَ شُمو دده، میتنید
حلال کنید، امُو رقم که دَ شُمو هدایت کدیم؛ و هر چیقس که دل شُمو شد دَ منطقه های
خو بخورید. ^{۲۲} امُو رقم که بُز کوهی و آهو خورده مُوشه، اونا ره ام امُو رقم بخورید؛
نفرای پاک و ناپاک هر دُوی شی میتنه ازوا بخوره. ^{۲۳} مگم احتیاط کنید که خون ره
نخورید، چراکه خون زندگی آسته و شُمو نباید زندگی ره قد گوشت بخورید. ^{۲۴} خون ره
نخورید، بلکه رقم آو دَ زمی لُوو کنید. ^{۲۵} خون ره نخورید تا دَ خوبی از شُمو و بچکیچای
شُمو که بعد از شُمو میه تمام شنه، چون شُمو باید تنها کاری ره انجام بدمید که دَ نظرِ
خداوند درست آسته.

ولے هدیه های مُقدَّس ره که دَ پیش شُمو آسته و نَذر های خُو ره باید دَ جایی بُیرید که خُداوند اِنتِخاب مُونه.^{۲۷} گوشت و خُون قُربانی های سوختنی خُو ره دَ بَلَه قُربانگاه^{۲۸} خُداوند، خُدای خُو تقدِّیم کنید؛ خُون قُربانی های دِیگِه شُمو باید دَ بَلَه قُربانگاه خُداوند، خُدای شُمو لَوْ و شُنه و گوشت شی ره مِیتَنِید بُخورید.^{۲۹} فِکر شُمو بَشه که تمام امزی تورا ره که ما دَز شُمو امر مُونُم بِشَنَوِید و دَ جای بِیرِید تا دَ خُوبی از شُمو و بچکِیچای شُمو که بعد از شُمو مییه تمام شُنه، چراکه امی کار شُمو دَ نظر خُداوند، خُدای شُمو خُوب و دُرُست آسته.

وختی خُداوند، خُدای شُمو مِلَّت های ره که بَلَدِه بُر کدون ازوا مورِید، از پیش رُوی شُمو نابُود کد و شُمو اونا ره هَی کده دَ سرزِمین ازوا جای-دَجای شُدِید،^{۳۰} اوخته هُوش خُو ره بِگِیرید تا بعد ازی که اونا از پیش رُوی شُمو نابُود شُد، دَ دام نَفَتِید و ازوا تقليد نَکُنید و دَ بارِه خُدایيون ازوا تحقِيق نَکُنید که بُگِید، اَی مِلَّت ها چی رقم خُدایيون خُو ره عِبادت مُوكد که مو ام امُو رقم کنی.^{۳۱} وختی خُداوند، خُدای خُو ره عِبادت مُونید، او رقم کارا ره نَکُنید که اونا مُونه، چون هر چیزی که دَ نظر خُداوند زِشت آسته و از شی بد مُوبِره، اونا بَلَدِه خُدایيون خُو انجام مِیدیه. اونا حتی باچه ها و دُخترون خُو ره بَلَدِه خُدایيون خُو دَ آتش دَر مِیدیه.^{۳۲} هر چیزی ره که ما دَز شُمو امر مُونُم، دَ دِقت انجام بِدِید؛ دَزُو چیزی اضافه نَکُنید و نَه ام ازو چیزی کم کُنید.

۱۳

اگه يگ نبى يا نفرى كه د وسیله خاو پیشگویی مونه د مينکل شمو پیدا شنه و
بَلَدِه شُمُو د باره يگ مُعْجَزَه يا چیز عجیب خبر بِدِيه و امُو مُعْجَزَه يا چیز عجیب كه د
باره شى دَز شُمُو خبر دَدَه، رُخ بِدِيه، و او بُكِيَه: بِسِيد از خدايون دیگه پیرَوي کنى و اونا
ره پرسش کنى، خدايونى ره كه شُمُو هیچ نمینَخَشِید، شُمُو باید د توراي امزُو نبى يا
نفرى كه خاو دیده، گوش ندید، چراكه خداوند، خُدای شُمُو، شُمُو ره امتحان مونه، تا
بَدَنَه كه آيا شُمُو خداوند، خُدای خُو ره قد تمام دل و تمام جان خُو دوست میدَنَيد يا نَه؟
شُمُو باید از خداوند، خُدای خُو پیرَوي کُنَيد و تنها ازو بِتَرْسِيد؛ شُمُو باید احکام ازو ره د
جای بَسِيرَيد و از آيد ازو شنِيد؛ شُمُو باید او ره عِبادت کُنَيد و دَزُو محکم بِچَسِيَيد. و امُو
نبى يا نفرى كه خاو دیده، باید کُشته شنه، چراكه او د خلاف خداوند، خُدای شُمُو كه
شُمُو ره از سرزمین مصر بُرو اوَرد و از جايى كه غلام بُودَيد آزاد كد توراي فتنه آنگيز گفته
تا شُمُو ره از راه-و-طريقى كه خداوند، خُدای شُمُو دَز شُمُو امر كده كه مُطابِق ازو رفتار
کُنَيد بُر کنه. دَمَزِي رقم شرارَت ره از مينکل خُو پاك کُنَيد.

اگه بِرار تُو كه باچه آبه تُو آسته يا باچه و دختر تُو يا خاتون تُو كه د بَغَل تُو آسته و يا
رفيق جانبرابر تُو، تُو ره تاشكى گپ بِدِيه و بُكِيَه، بِيه كه بوري و خدايون دیگه ره
پرسش کنى، خدايونى ره كه نه خود تُو مِينَخَشِى و نَه بابه کلوناي تُو مِيشَنَخت، خدايون

مِلَّت های ره که دَگِرد-و-بَر شُمو آسته، چی دَنَزدِیک تُو، چی از تُو دُور و چی از يگ گوشِه زمی تا دِیگه گوشِه شی، ^{۱۰} تُو باید راضی نَشْنی و دَتُوره اُزو گوش نَدی. دَبَلِه اُزو رَحْم نَکُو و دَزُو دِل نَسوزَن و گُناهِ اُزو ره تاشه نَکُو، ^۹ بَلکِه او ره حتماً بُكُش؛ دِستِ از تُو باید اول بَلِدِه کُشتونِ اُزو دِراز شُنه و بعد اُزو دِستِ تمامِ قوم. ^{۱۰} او ره سنگسار کُو تا بُمره، چون او کوشش کده که تُو ره از خُداوند، خُدای تُو رُوى-گردو کُنه، امزُو که تُو ره از سرزمینِ مصر، از جایی که غُلام بُودی بُرو اورد. ^{۱۱} اوخته تمامِ قومِ اسرائیل میشنوه و ترس مُخوره و دِیگه هیچ کس ای رقم شرارَت ره دَمینکل شُمو انجام نَمیدیه.

۱۲ اگه دَبارِه يکی از شارای که خُداوند، خُدای شُمو بَلِدِه بُود-و-باش دَز شُمو مِیدیه بِشَنَوِید ^{۱۳} که نفرای شریر از مینکل شُمو باله شُده و باشنده های شار ره گُمراه کده مُوگیه: بِپیَد که بوری و خُدایونِ دِیگه ره عبادت کنى، ^{۱۴} خُدایونی ره که شُمو نَمینَخشید، اوخته شُمو تحقیق و کُنج-و-کاو کده ای توره ره خُوب بَرَسی کُنید. اگه ای توره راست ثابت شُد که امي رقم کارِ نفرَت-آنگیز دَمینکل شُمو انجام شُده، ^{۱۵} اوخته شُمو حتماً باشنده های امزُو شار ره قد دَم شمشیر بِزنید و امو شار ره قد تمام چیزای که دَمَنه شی آسته کامِلاً نابُود کُنید، حتی چارپایای شی ره ام قد دَم شمشیر بِزنید. ^{۱۶} بعد اُزو تمامِ وُلجه شی ره دَمَنه شار دِیگ میدانی جم کُنید و شار ره قد تمام وُلجه شی دَعنوانِ هدیه سوختنی بَلِدِه خُداوند، خُدای خُو دَآتش کامِلاً دَر بِدید. امو شار بَلِدِه همیشه يگ خَرابه بُمنه و هرگز دُوباره آباد نَشنه. ^{۱۷} امو چیزای که بَلِدِه نابُود شُدو جم شُده، هیچ چیز شی دَ

دِستای شُمو نَبَشَه، تا خُداوند از قار خُو بِشِينه و دَبَلِه شُمو رَحَم و دِلسوزی كُنه و تِعداد
شُمو ره كَلو كُنه، امُو رقم که دَبَابَه كَلونَای شُمو قَسَم خورده بُود. ^{۱۸} وختیکه شُمو از آید
خُداوند، خُدای خُو شُنِید و پِگِ احکام اُزو ره که ما امروز دَز شُمو اَمر مُونم نِگاه كُنید و
چیزای ره که دَنَظرِ خُداوند، خُدای شُمو دُرُست أَسْتَه، دَجَای بِيرِيد، وعدِه خُداوند بَلِدِه
شُمو پُوره مُوشَه.

چیزای پاک و نَجِس

^{۱۹} شُمو بچِکِیچای خُداوند، خُدای خُو أَسْتَيِد، پس دَغَيْتِ ماتِمِ بَلِدِه مُرَدَه هَا، خودون
خُو ره زخمی نَكُنید و مینکلِ چیمای خُو ره كَل نَكُنید؛ ^{۲۰} چُون شُمو بَلِدِه خُداوند، خُدای خُو
یگ قَومِ مُقدَّس أَسْتَيِد و خُداوند شُمو ره بَلِدِه خُو إِنْتِخَاب کده تا از مینکلِ پِگِ قَومِ هَاي
که دَرُوی زمی أَسْتَه، قَومِ خاصِ اُزو بَشِيد.

^{۲۱} شُمو هیچ چیزِ نَجِس ره نَخورِيد. ^{۲۲} حَيَوانَای ره که شُمو خورده مِيتَنِید، اینیا أَسْتَه: گاو،
گوسپو و بُز، ^{۲۳} آهُو، بُزِ كوهی، آهُو بَره، بُزِ وَحشی، گَوزَن، گاوِ وَحشی و قُوقِ كوهی. ^{۲۴} هر
حَيَوان که سُم شی شَق بَشه، يعني دُوشَق بَشه و نِشقار كُنه، از مینکلِ حَيَوانَا او ره مِيتَنِید
نَخورِيد. ^{۲۵} لیکِن از مینکلِ حَيَوانَای که نِشقار مُونه یا سُم شی دُوشَق أَسْتَه، اینیا ره
نَخورِيد: أُشتَر، خرگوش و تَولَى، چراکه اُونا نِشقار مُونه، ولَى سُم ازوا دُوشَق نَبَيِه؛ اُونا

بَلِدِه شُمو نَجِس أَسته. ^٨خُوك اَكْرِچه سُم شى دُوشَق أَسته، ولے نِشقار نَمُونه، او بَلِدِه شُمو نَجِس أَسته. پس گوشتِ امزى حَيوانا ره نَخورِيد و دَلاشِ امزبا دِست نَزَنيد.

از مينكِلِ پَگ زِندهجاناي که دَ آو أَسته، هر زِندهجان که شاپَر و فَلس دَرَه مِيتَنِيد بُخورِيد. ^٩
ليکِن زِندهجاناي ره که شاپَر و فَلس نَدره نَخورِيد؛ اوْنا بَلِدِه شُمو نَجِس أَسته. ^{١٠}

هر رقم مُرَغَّکوي پاك ره شُمو مِيتَنِيد بُخورِيد. ^{١٢} ليکِن اينيا ره نَخورِيد: بُرگُج، ^{١٣} لاشخور، لاشخور رِيشْتُو، ^{١٤} شاهِين، پُشت سُرخَگ، باشه هر رقم شى که بَشه، ^{١٥} زاغ هر رقم شى که بَشه، ^{١٦} شُترمُرغ، مُرغ دريابي، كلهخورَك، باز هر رقم شى که بَشه، ^{١٧} بُوم ريزِگَك، بُوم كَنه، بُوم سفيد، ^{١٨} قوطو، لاشخور مِصرى، قاز، ^{١٩} لَگَلَگ، كُلَنگ هر رقم شى که بَشه، پُويپُوك و شاويپَرَگ چَرمى. تمام اوخلَى هاي بالدار بَلِدِه شُمو نَجِس أَسته؛ ^{٢٠} اوْنا نَبَايد خورده شُنه. ليکِن زِندهجاناي بالدار که پاك أَسته، اوْنا ره مِيتَنِيد بُخورِيد.

هېچ جاندارِ خود مُرده ره نَخورِيد؛ او ره دَ بِيگِنه که دَ شاراي شُمو زِندگى مُونه بِيد تا بُخوره، يا دَ يگ بِيگِنه مُسافِر سَودا كُنيد، چراکه شُمو بَلِدِه خُداوند، خُدai خُويگ قَوم ^{٢١} مُقدَّس أَستَيَد.

امچنان بُزغله ره دَ شِير آبه شى پُخته نَكُنيد.

^{۲۲} ده-يگ تمام حاصلات زمین خوره که سالانه از زمی دست مییه، حتماً جدا کنید.

^{۲۳} و د حضور خداوند، خدای خود جایی که او انتخاب مونه تا نام خوره د اونجی قرار

بدهیه، ده-يگ غله، شیره انگور و روغون خوره قد اوّلباری گله و رمه خوبخورید، تا یاد

^{۲۴} بگیرید که همیشه از خداوند، خدای خو ترس دشته بشید. لیکن اگه راه بلده شمو د

اندازه دور بشه، که ده-يگ ره بُرده نتنید، یعنی جایی ره که خداوند، خدای شمو انتخاب

مونه تا نام خوره د اونجی قرار بدهیه بلده شمو دور بشه، اوخته غیتیکه خداوند، خدای

^{۲۵} شمو، شمو ره برکت دد، امو ده-يگ ره د نقره سودا کنید و نقره ره دست خو گرفته د

جایی که خداوند، خدای شمو انتخاب مونه بورید. ^{۲۶} د اونجی قد نقره هر چیزی که دل

شمو شد بخرید: گاو، گوسپو، شراب انگور، شراب قوی، هر چیزی که خوش شمو آمد؛

^{۲۷} و د حضور خداوند، خدای خو خودون شمو قد خانوار خوبخورید و خوشی کنید. و

لاویا ره که د شارای شمو زندگی مونه، از یاد نبرید، چراکه اونا د مینکل شمو تقسیم و

ملک ندره.

^{۲۸} د آخر هر سه سال، یعنی د سال سوم تمام ده-يگ حاصلات خوره بیرید و د شارای خو

ذخیره کنید ^{۲۹} تا لاویا که د مینکل شمو تقسیم و ملک ندره و بیگنه‌گو، یتیما و خاتونی

بیوه که د شارای شمو آسته، آمده بخوره و سیر شنه، و خداوند، خدای شمو، شمو ره د

تمامِ کارای دست شُمو که انجام می‌دید، برکت بُدیه.

سالِ بخشیدونِ قرض ها

۱۵ ^۲ د آخرِ هر هفت سال باید قرض ها ره بخشش کنید. و طریقه بخشیدونِ قرض اینی استه: هر قرض دهنده که د همسایه خو قرض دده بشه، باید بخشش کمه و از همسایه یا پرارِ اسرائیلی خو قرض خو ره طلب نکنه، چراکه بخشیدونِ قرض از طرف خداوند اعلان شده. ^۳ از بیگنه میتنی که قرض خو ره طلب کنى، لیکن قرض تُو که د بله پرارِ اسرائیلی تُو بشه، باید ازو دست باله کنى. ^۴ یقیناً د مینکل شُمو هیچ نفر محتاج وجود نمیداشته بشه، چون خداوند، خدای شُمو، حتماً شُمو ره د امزُو سرزمی که د عنوان مُلکیت دز شُمو میدیه تا او ره تصرُف کنید، برکت میدیه، ^۵ د شرطی که از آید خداوند، خدای خو شُنبید و تمام امی احکام ره که ما امروز دز شُمو امر مُونم د دقت د جای بیرید. ^۶ چون خداوند، خدای شُمو، امُورقم که دز شُمو گفته، شُمو ره برکت میدیه و شُمو د ملت های کلو های کلو قرض میدید، لیکن از هیچ کس قرضدار نموشید؛ و شُمو د بله ملت های کلو حکمرانی مُونید، لیکن اونا د بله از شُمو حکمرانی نمونه.

^۷ اگه د مینکل شُمو یکی از پرارونِ اسرائیلی شُمو د یکی از شارای شُمو د سرزمینی که خداوند، خدای شُمو دز شُمو میدیه، محتاج بشه، دل خو ره سخت نکنید و دست خو ره د

رُوی پِرارِ مُحتاج خُو بسته نَگِيرِيد، ^٨ بَلَكِه دِست خُو ره واز بِكِيرِيد و سخاوتمندانه دَاندازه اِحتياج شی بَلَدِه ازُو قرض بِدِيد. ^٩ اِحتياط كُنید که ای فِکرِ فاسِد ره دَل خُو راه نَدِيد که بُكِيد: 'سالِ هفتُم، سالِ بخشیدونِ قرض ها نزدِيك آسته،' و دَبرابرِ پِرارِ مُحتاج خُو تَنگ نظر شُنِيد و دَزو هیچ چیز نَدِيد. اگه ایطور کُنید، او دَپیشِ خُداوند دَخلاف شُمو ناله-و- فریاد مُونه و ای بَلَدِه شُمو گُناه حِساب مُوشه. ^{١٠} دَزو سخاوتمندانه قرض بِدِيد و از دَدونِ قرض دِل شُمو غَمگی نَشنَه، چراکه دَعِوضِ امزی کار خُداوند، خُدای شُمو، شُمو ره دَ تمامِ کارای شُمو که بَلَدِه انجام شی دِستِ دراز کُنید، بَرکت مِیدیه. ^{١١} ازی که آدم مُحتاج هیچ غَیت از زمی گُم نَمُوشه، امزی خاطر ما دَز شُمو امر مُونم که دَرُوی پِرارِ غَریب و مُحتاج خُو که دَسرزمینِ شُمو زِندگی مُونه، دِست خُو ره واز بِكِيرِيد.

^{١٢} اگه از جمِپِرارو و خوارونِ اسرائیلی تو یگ مردِ عبرانی یا خاتونِ عبرانی دَز تُو سَودا شُد، او شَش سال تُو ره خِدمت کُنه و دَسالِ هفتُم تُو باید او ره از پیش خُو آزاد کنی. ^{١٣} و غَیتیکه او ره از پیش خُو آزاد مُونی، او ره باید دِستِ خالی رَیی نَکنی، ^{١٤} بَلَكِه از گَلِه خُو، خرمونجوی خُو و چرخُشتِ انگور خُو سخاوتمندانه دَزو بِدی؛ آرے، از چیزای که خُداوند، خُدای تُو، تُو ره بَرکت دَده، دَزو بِدی. ^{١٥} دَیاد تُو بشه که تُو دَسرزمینِ مصر خُلاَم بُودی و خُداوند، خُدای تُو، تُو ره آزاد کد؛ امزی خاطر ما اِمروزِ ای حُکم ره دَز تُو مِیدیم. ^{١٦} لیکن اگه خُلاَم بُگیه، ما از پیش تُو نَمُورم، بخاطری که او خود تُو و خانوار تُو ره دوست دَره و وخت شی قد از تُو خوش تیر شُده، ^{١٧} اوخته یگ دروش ره بِكِير و نَرمی

گوش شی ره دَ درگه چسپنده سُلاخ کُو و او بَلِدِه همیشه غُلام تُو مُوشه. قد کنیز خو ام
عین کار ره بُکُو.

١٨ وختیکه غُلام خُوره از پیش خُوازد مُونی باید دَ نظر تُو سخت نخوره، چون او مُدت
شش سال تُو ره خدمت کده، که دُو برابر مُزدِیگ مُزدُورکار مُوشه. و خُداوند، خُدای تُو،
تُو ره دَ پِگِ کارای تُو بَرکت مِیدیه.

تقدیم کدون اولباری چارپایا

١٩ تمام اوّلباری های نَر ره که دَ گله و رمه شُمو زَیده مُوشه بَلِدِه خُداوند، خُدای خُو جدا
کنید؛ دَ بَلِه اوّلباری گاو خُو کار نَکنید و پاشُم اوّلباری گوسپون خُو ره کَل نَکنید. ٢٠ اونا
ره هر سال دَ حُضُور خُداوند، خُدای خُو دَ جایی که خُداوند انتِخاب مُونه، شُمو و خانوار
شُمو بُخورید. ٢١ لیکن اگه حیوان عَیبی بَشه، یعنی لَنگ یا کور بَشه و یا یَگو عَیبِ دِیگه
دَشته بَشه، او ره دَ حُضُور خُداوند، خُدای خُو حلال نَکنید، ٢٢ بَلِکِه او ره دَ مَنه شارای
خُو بُخورید؛ نفرِ پاک و ناپاک مِیتنه اُزو بُخوره، امُو رقم که آهُو بَره یا آهُو ره مُوخورید.
٢٣ لیکن خُونِ اُزو ره نَخورید، بَلِکِه او ره رقم آو دَ زمی لَوو کنید.

١٦

ماهِ آبیب ره نگاه کنید و عِیدِ پَصَح ره بَلَدِه خُداوند، خُدای خُو برگزار کنید،
 چراکه د ماهِ آبیب خُداوند، خُدای شُمو، شُمو ره از مِصر دَغَیتِ شاوُرُو اوُرد. پس
 قُربانی پَصَح ره از رمه و گله خُو بَلَدِه خُداوند، خُدای خُو د جایی که خُداوند انتِخاب مُونه
 تا نام خُو ره د اونجی قرار بِدیه، حلال کنید. قد اُزو هیچ چیز خمیرماهه تو نَخورید؛ بَلَدِه
 هفت روز نانِ فطیر بُخورید، یعنی نانِ سختی-و-مشَقَّت، چراکه شُمو از سرزمینِ مِصر د
 عجله بُر شدید؛ ای کار ره کنید تا روزِ بُر شُدون خُو ره از سرزمینِ مِصر د تمامِ روزای
 زندگی خُو د یاد داشته بشید. پس بَلَدِه هفت روز د تمامِ مُلک شُمو هیچ خمیرماهه دیده
 نَشْنه و از حیوانی که د شامِ روزِ اوُل حلال مُونید، هیچ گوشت شی تا صبح باقی نَمنه.

شُمو قُربانی پَصَح ره د هیچ کُدم از شارای خُو که خُداوند، خُدای شُمو دَز شُمو مِیدیه،
 حق نَدرِيد که حلال کنید؛ بلکه قُربانی پَصَح ره د جایی که خُداوند، خُدای شُمو انتِخاب
 مُونه تا نام خُو ره د اونجی قرار بِدیه، دَغَیتِ شام د وخت آفتَو شِشتو حلال کنید، چون
 شُمو دَغَیتِ شام از مِصر بُر شدید. او ره د امزُو جای که خُداوند، خُدای شُمو انتِخاب
 مُونه، پخته کده بُخورید و صباحگاه باله شده پس د خَیمه های خُو بورید. بَلَدِه شش روز
 نانِ فطیر بُخورید و د روزِ هفتُم بَلَدِه خُداوند، خُدای خُو یگ جلسه مُقدَّس برگزار کنید،
 دَمْزُو روز هیچ کار نَکنید.

^۹ هفت هفته ره بَلَدِه خُو حِساب کُنید؛ حِسابِ هفت هفته ره از غَيْتى بِكِيرِيد که قد داس
دِرَوْ کدونِ حاصِلات خُو ره شُروع مُونید.^{۱۰} اوخته عِيدِ هفت ها ره بَلَدِه خُداوند، خُدای خُو
برگزار کده هدیه داوطلبانه خُو ره دَ اندازه برکتی که خُداوند، خُدای شُمو دَز شُمو دَده،
تقدِيم کُنید^{۱۱} و دَ حُضورِ خُداوند، خُدای خُو دَ جایي که او اِنتِخاب مُونه تا نام خُو ره دَ
أونجى قرار بِديه خوشى کُنید: خودون شُمو، باچه هاي شُمو، دُخترون شُمو، غُلام شُمو،
کنیز شُمو، لاویا که دَ شاراي شُمو زِندگی مُونه، بیگنه‌گو، یتیما و خاتونوی بیوه که دَ
مینکل شُمو زِندگی مُونه.^{۱۲} دَ ياد خُو بِيرِيد که دَ مصر غُلام بُودید، پس امى احکام ره دَ
دقَّت دَ جای بِيرِيد.

عِيدِ چپري ها

^{۱۳} عِيدِ چپري ها ره بعد از جم کدونِ حاصِلات خُو از خرموجاي و چرخشتِ انگور بَلَدِه
هفت روز برگزار کُنید.^{۱۴} دَ عِيد خُو خوشى کُنید: شُمو، باچه هاي شُمو، دُخترون شُمو،
غُلام شُمو و کنیز شُمو، و امچنان لاویا، بیگنه‌گو، یتیما و خاتونوی بیوه که دَ شاراي شُمو
زِندگی مُونه.^{۱۵} هفت روز ره بَلَدِه خُداوند، خُدای خُو دَ جایي که او اِنتِخاب مُونه عِيد
بِكِيرِيد، چون خُداوند، خُدای شُمو، شُمو ره دَ پِگِ حاصِلات و دَ تمامِ کاراي دِست شُمو

برکت میدیه و شمو کلو خوشحال موشید.

۱۶ سال سه دفعه پگ مردا-و-باچه های شمو باید د حضور خداوند، خدای شمو د جایی که او انتخاب مونه حاضر شنه: د عید فطیر، د عید هفته ها و د عید خیمه ها. هیچ کس دست-خالی د حضور خداوند حاضر نشنه.^{۱۷} هر کدم شمو باید د اندازه وس-و-توان خو هر قدر که خداوند، خدای شمو دز شمو برکت دده، هدیه بدید.

تعیین کدون قاضی ها

۱۸ قاضی ها و کله کلونا ره د تمام شارای که خداوند، خدای شمو دز شمو میدیه د هر طایفه خو تعیین کنید تا اونا مردم ره عادلانه قضاوت کنه.^{۱۹} قضاوت ره د نفع هیچ کس تغییر ندید، طرفداری نکنید و رشوت نگیرید، چراکه رشوت چیمای دانایو ره کور مونه و تورای آدمای عادل ره کج مونه.^{۲۰} تنها و تنها از عدالت پیروی کنید تا زنده بمنید و سرزمینی ره که خداوند، خدای شمو دز شمو میدیه، صاحب شنید.

بُت پَرَسْتَى نَكْنِيد

۲۱ هیچ رقم چیو ره د عنوان بُت اشیره د پالوی قربانگاهی که بلده خداوند، خدای خو جور مونید، ایستالجی نکنید؛^{۲۲} و ستون های پرستشی بلده خو ایستالجی نکنید، چراکه

خُداوند، خُدای شُمو ازوا نَفَرَت دَرَه.

١٧ ^١شُمو باید بَلِدِه خُداوند، خُدای خُو گاو يا گوسپونی ره که عَيْب يا يَكِّو چِيزِي بَد

دَشته بَشه، قُربانی نَكِّيند، چراکه او کار دَپِيشِ خُداوند، خُدای شُمو نَفَرَت انگِيز آسته.

اگه دَمِينکل شُمو دَيکى از شاراي شُمو که خُداوند، خُدای شُمو دَز شُمو مِيدِيه، يَكِّ^٢گ
مَرد يا خاتُو پَيدا شُنه که دَنَظرِ خُداوند، خُدای شُمو شرارَت-و-بَدِي کُنه، يعني عهِدِ اُزو ره
مِيدِه کنه ^٣ و رفته خُدایيونِ دِيگه ره پَرسِتش و سَجده کُنه، چى آفتَو و ماھتَو بَشه يا دِيگه
لشکرِ آسمو که ما پَرسِتش ازوا ره امر نَكِّديم، ^٤ و دَز شُمو خبر دَدَه شُنه يا شُمو دَبارِه اُزو
بِشنَوِيد، اوخته خُوب تحقِيق کُنَيْد. اگه راست بُود و ثابت شُد که امي کارِ نَفَرَت انگِيز دَ
إِسْرَائِيلِ انجام شُده، ^٥ اوخته اُمو مَرد يا خاتُو ره که امي شرارَت-و-بَدِي ره کده، از درِگه
شار خُو بُرو بِيرِيد و اُمو مَرد يا خاتُو ره سنگسار کُنَيْد تا بُمُره. ^٦ اُمو نفر که محکوم دَ
مَرگ آسته، دَشاهِدِي دُو يا سِه شاهِد باید کُشته شُنه؛ ليکِن دَشاهِدِي يَكِّ نفر نَبَاید
کُشته شُنه. ^٧ دِستاي شاهِدا باید اوَل بَلِدِه کُشتونِ امزُو نفر باله شُنه و بعد اُزو دِستاي پَكِ
مردم. دَامزِي رقم شرارَت-و-بَدِي ره از مِينکل خُو پاك کُنَيْد.

قضايا قاضي ها و پيشوايو

اگه يَگو قضيَه دَپيش شُمو مِيَه که قضاوت کدون شى بَلِدِه شُمو غَدر سخت بَشه، بَطَورِ
 مِثال دَبارِه خُونى که قَصْداً ريختنَده شُده و خُونى که سهواً، دَبارِه دُو دعوا كُنَنَده و يا دَ
 بارِه لَت كُنَنَده و لَت خورِنَده، يعني دَبارِه قضيَه هاي دعوا که دَشاراي شُمو رُخ مِيدِيه،
 اوخته شُمو باله شُده دَمْزُو جاي بورِيد که خُداوند، خُدای شُمو انتِخاب مُونه.^۹ دَپيشِ
 لاويَای که پيشوا أَسته و پيشِ قاضى که دَامْزُو روزا قضاوت مُونه بورِيد و مشوره كُنَيَّید؛
 أونا فيصله خُوره دَبارِه امزُو قضيَه دَز شُمو إعلان مُونه.^{۱۰} شُمو مُطابِقِ فيصله که أونا
 امزُو جاي انتِخاب کده خُداوند دَز شُمو إعلان مُوكُنه، رفتار كُنَيَّید. هوش خُوره بِكِيرِيد که
 مُطابِقِ هر هِدایتى که أونا دَز شُمو مِيدِيه، عمل كُنَيَّید.^{۱۱} شُمو باید مُطابِقِ حُكم شريعت که
 أونا بَلِدِه شُمو بيان مُونه و مُطابِقِ قضاوتى که دَز شُمو إعلان مُوكُنه، رفتار كُنَيَّید؛ از
 فيصله که أونا دَز شُمو إعلان مُونه طرفِ راست يا چپ تاو نخورِيد.^{۱۲} هر کسی که از
 روی كِبر-و-غرُور از آيدِ پيشواي که دَحُضور خُداوند، خُدای شُمو بَلِدِه خِدمت دَأونجي
 ايسته مُوشَه يا از آيدِ قاضى نَمُوشَه، او باید كُشتَه شُنَه. دَامزى رقم شراَت-و-بَدَى ره از
 اسرائيل پاك كُنَيَّید.^{۱۳} اوخته پَگِ قومِ اي ره مِيشنَوه و ترس مُوخوره و دِيگه از روی كِبر-
 و-غرُور رفتار نَمُونَه.

مُقرَرات بَلِدِه پادشاه

^{۱۴} وختى دَسَرزميني که خُداوند، خُدای شُمو دَز شُمو مِيدِيه، داخل شُنَيَّید و او ره تَصرُفُ

کده دَزُو جای-دَجای شُنِید و بُكِيد، رُقمِ پگِ مِلت های که دَگِرد-و-بَر مو اَسته مو اَم يَگ پادشاه دَبَلِه خُو تعَيِّن مُونی،^{۱۵} اوخته شُمو باید پادشاهی ره که خُداوند، خُدای شُمو اِنتِخاب مُونه دَبَلِه خُو تعَيِّن کُنید. شُمو باید يکی از بِرارونِ إسرائیلی خُو ره دَبَلِه خُو پادشاه تعَيِّن کُنید؛ کُدم نفر بیگنه ره که از جَمِ بِرارونِ إسرائیلی شُمو نییه دَبَلِه خُو تعَيِّن نَکْنید.^{۱۶} لیکِن او باید آسپ های کَلو بَلِدِه خُو جَم نَکنه و قَوم ره دُوباره دِمِصر رَی نَکنه تا بَلِدِه شی آسپ های کَلو بَیره، چُون خُداوند دَز شُمو گُفتَه، هرگز دُوباره دَزُو راه نَروید.^{۱۷} امچنان او باید بَلِدِه خُو خاتُونوی کَلو نَگیره، نَشنه که دِل شی گُمراه شُنه. او باید طِلاً و نُقره کَلو ام بَلِدِه خُو جَم نَکنه.^{۱۸} وختیکه او دَبَلِه تَختِ پادشاهی خُو شِشت، او باید يَگ نُسخه امزی شریعت ره دَيگ طومار از رُوى نُسخه اَصلی که دَپیشِ لاویای پیشوا اَسته بَلِدِه خُو نوِشته کُنه.^{۱۹} او نُسخه دَپیشِ ازو بَشه و او دَتمامِ روزای زِندگی خُو او ره خانده بوره تا ياد بِگیره که از خُداوند، خُدای خُو بِترسه و پگِ تورای امزی شریعت و امزی احکام ره دِدقَت دَجای بَیره،^{۲۰} تا دِلِ ازو دَبرابر بِرارونِ إسرائیلی شی غُرور پَیدا نَشنه و امزی احکام طرفِ راست یا چَپ تاو نَخوره و تا او و اولادِه شی بَلِدِه مُدَّتِ کَلو دَمَلَکَت خُو دِإسرائیل پادشاهی کُنه.

حقِ لاویا و پیشوایو از هدیه ها

۱۸ ^۱ لاویای پیشوا، بَلِکِه تمامِ طایفه لاوی دِإسرائیل تقسیم و مُلک نَدَشته بَشه. اُونا

میتنه از هدیه های خاصِ خُداوند که تقسیم ازوا آسته بخوره. پس اونا باید د مینکل
برaronِ اسرائیلی خو مُلک-و-زمی نَدَشته بَشه، چراکه حقِ خُداوند تقسیم ازوا آسته، امُو
رقم که دَزوا گُفته.

از طرفِ مردم، یعنی از طرفِ کسای که گاو یا گوسپو ره قربانی مونه حق پیشوایو اینیا
آسته: قَى، كَله و شِكْمَبَه؛ اُونا امی حِصَّه ها ره د پیشوایو بِدیه. امچنان از حاصلِ نَو
غَلَّه و شرابِ انگور و روغنِ زَيْتون خُو و از اوّلین پاشمِ گوسپون خو دَزوا بِدیه، چراکه
خُداوند، خُدای شُمو اُونا ره از مینکلِ پگِ طایفه های شُمو انتِخاب کده تا اُونا و باچه
های ازوا همیشه د نامِ خُداوند بَلدِه خِدمت ایسته شُنَه.

اگه يگ لاوی از يكى از شاراي شُمو يعني از هر جايى که او د اسرائيل زندگى مونه بُر
مُوشه و د خوشِ دل خُو د جايى که خُداوند انتِخاب مونه مييه، و د نامِ خُداوند، خُدای خُو
خدمت مونه، رقمی که دیگه بِرaronِ لاوی شى د اونجى د حضورِ خُداوند بَلدِه خِدمت
ایسته مُوشه، اوخته او میتنه از خوراک ها مساویانه بخوره؛ عايدی که از سودا کدون
جايدادِ بابه کلونای شى دَزو مِيرَسه، حِساب شى جدا يَه.

اخطار د باره کارای نفراتانگيز

وختى د سرزمينى که خُداوند، خُدای شُمو دَزو شُمو میديه داخل شُدید، شُمو کاراي

نفرَت انگیزِ امْزُو مِلّت ها ره یاد نَگِیرِید و ازوا تقلید نَکِنید.^{۱۰} دَ مینکل شُمو باید هیچ کس پیدا نَشْنه که باچه یا دُختر خُو ره دَ آتش قُربانی کُنه؛ و پالگر، غَيْبَگُوي، رَمل انداز،^{۱۱} جادُوگر،^{۱۲} تعویذ نَویس، کسی که جِنیات یا أَرواح ره حاضر مُونه و از مُرده ها مشوره میگیره ام دَ مینکل شُمو نَبَشه.^{۱۳} چون هر کسی که امی کارا ره انجام بِدِيه، او دَ نظرِ خُداوند نَجِس آسته؛ از خاطرِ امزی کارای نفرَت انگیز خُداوند، خُدای شُمو اونا ره از پیشِ رُوی شُمو هَی مُونه.^{۱۴} شُمو باید دَ پیشِ خُداوند، خُدای خُو بَی عَیب بَشِید.^{۱۵} امی مِلّت های ره که شُمو هَی مُونید، اونا دَ توره پالگرا و غَيْبَگُوبَا گوش مِیدِيه، لیکن خُداوند، خُدای شُمو دَز شُمو اجازه نَمِیدِيه که امُو کار ره کُنید.

وعده ظُهُورِ یگ نَبَى رقمِ مُوسَى

خُداوند، خُدای شُمو از مینکل شُمو، از جمِ بِرارون شُمو یگ پَیغمبر ره که رقم ازمه^{۱۶} آسته مُقرَر مُونه؛ شُمو باید دَ توره اُزو گوش بِدِيد.^{۱۷} ای مُطابِقِ چیزی آسته که خودون شُمو دَ کوهِ حوریب، دَ روزی که جم شُده بُودِيد، از خُداوند، خُدای خُو خاھِش کَدِيد و گُفتِید: 'مو دِیگه نَمِيتَنی آوازِ خُداوند، خُدای خُو ره بِشنَوی و ای آتشِ بُزرگ ره بِنگری،^{۱۸} نَشُنَه که بُمری.^{۱۹} اوخته خُداوند دَز مه گفت: 'چیزی ره که اونا گفته، خُوب آسته. ما یگ نَبَى ره بَلدَه ازوا از مینکل بِرارون ازوا مُقرَر مُونم که رقم ازتو یه و ما تورای خُو ره دَ دانِ اُزو مِینَدَزُم و هر چیزی ره که دَزُو امر کنم، او دَزوا نَقل مُونه.^{۲۰} هر کسی که دَ تورای

ازمه که امُونَبِيَ دَنَامِ ازمه مُوگِيه، گوش نَديه، ما خود مه اُزو بازخاست مُونُم. ^{۲۰} لِيکِن

پَيغَمْبَرِيَ كَه خُودسَرَانَه دَنَامِ ازمه توره بُكِيه، دَحَالِيكَه ما دَزُو اَمَرَ نَكَدِيمَ كَه توره بُكِيه، يَا

پَيغَمْبَرِيَ كَه دَنَامِ خُدَائِيونِ بِيَكَنَه توره بُكِيه، بَايدَ كُشَتَه شُنَه. ^{۲۱} شُمو شايد دِل خُو

بُكِيدَ: 'مو چُطُور مِيتَنَى پَي بُبرَى كَه يِكَ توره ره خُداونَد نَكَفَته؟' ^{۲۲} وختِيكَه يِكَ نَبَى دَ

نَامِ خُداونَد توره بُكِيه و امُو چِيز واقِع نَشَنَه و حَقِيقَتَ پَيَدا نَكَنَه، او توره أَسْتَه كَه خُداونَد

نَكَفَته، بَلَكِه امُو پَيغَمْبَر او ره خُودسَرَانَه گَفَته. پَس اُزو نَتَرسِيد.

شاراي پناهگاه

١٩ ^١ وختِيكَه خُداونَد، خُدَائِي شُمو مِلتَهَي ره كَه سَرَزِمَينَ ازوا ره دَز شُمو مِيدِيه
نَابُودَ كَد و شُمو اُونَا ره هَيَ كَدِيدَ و دَشَارَا و خانَهَهَي ازوا جَاي-دَجَاي شُدِيدَ، ^٢ او خَتَه
سَه شَار ره دَسَرَزِمَينَى كَه خُداونَد، خُدَائِي شُمو دَعِنَوانَ مُلَكِيتَ دَز شُمو مِيدِيه، بَلَدِه خُو
جَدا كُنِيدَ. ^٣ فاصِيلَه سَرَحَدا ره اندازَه كُنِيدَ و سَرَزِمَينَى ره كَه خُداونَد، خُدَائِي شُمو دَعِنَوانَ
مُلَكِيتَ دَز شُمو مِيدِيه سَه تقسيِيمَ كُنِيدَ تا دَه هَر تقسيِيمَ يِكَ شَارِ پناهگاهَ بشَه و نَفَر قاتِلَ
بَتَنه دَأُونَجَى دُوتَا كُنَه. ^٤ اَيِ دَسْتُور-الْعَمَل دَبَارِه قاتِلَى أَسْتَه كَه مِيتَنَه دَأُونَجَى دُوتَا كُنَه
تا زِنَده بُمنَه: هَر كَسَى كَه يَكَو نَفَر ره سَهْوَا بُكَشَه و از پِيشَ قد اُزو دُشَمنَى نَدَشَتَه بشَه
مِيتَنَه دَأُونَجَى دُوتَا كُنَه. ^٥ فَرَضَ كُنِيدَ كَه يِكَ نَفَر قد هَمْسَاپِه خُو بَلَدِه دَرَختَ زَدو دَ

جنَگَل موره و امِى كَه دِست خُو ره بالَه مُونَه كَه دَرَختَ ره قد تَوَر قَطَعَ كُنَه، تَوَر از دِستِه

خو بُر شُدَه دَ همساپِه شى مُوخوره و او كُشته مُوشه. پس او ميتنَه كه د يكى امزُو شارا دُوتا كنه و زِنده بُمنه.^٦ اگه تنها يىگ شارِ پناهگاه دَشته بشَيد و فاصلَه غَدر كَلو بشَه، إمكان دَره كه إنتقام گيرِنِدَه خُون دَ غَيتِ خُون گرمى خُو قاتِل ره دُمبال كنه و او ره گير كده بُكْشه، د حاليكه او سزاوارِ مرگ نبُوده، چون از پيش قد ازو دُشمنى نَدَشته.^٧ امزي خاطر ما دَز شُمو امر كُدم كه سِه شار ره بَلِدَه خُو جدا كُنيد.

خُداوند، خُدای شُمو سرحداي شُمو ره پراخ مُونه امُو رقم كه د بابه كَلوناي شُمو قَسم خورده، و پِگ سرزمِينى ره كه د بابه كَلوناي شُمو وعده كُدد دَز شُمو مِيديه، د شرطى كه شُمو تمامِ امزي احکام ره كه ما امروز دَز شُمو امر مُونم نِگاه كده د جاي بيرِيد و خُداوند، خُدای خُو ره دوست بِدنيد و هميشه مُطابقِ راه-و-طريقِ ازو رفتار كُنيد. وختيکه اي کار شُد، اوخته شُمو سِه شارِ دِيگه ام د بَلِه امزي سِه بَلِدَه خُو اضافه كُنيد.^٩ تا خُون نفر بے گناه د سرزمِينى كه خُداوند، خُدای شُمو د عنوانِ مُلكيت دَز شُمو مِيديه، ريختنده نَشنه و خُونِ كس د گردون شُمو نَبَشه.^{١٠}

ليكن اگه يَگو كس قد يَگ نفر دُشمنى دَشته بشَه و د كِمِين ازو شِشته د بَلِه ازو حمله كُنه و او ره بِزنَه تا بُمره و خود شى د يكى امزُو شارا دُوتا كنه.^{١٢} اوخته ريش سفیداي شار شى نفر رَيى كده او ره ازو نجى بِكيره و د دِستِ إنتقام گيرِنِدَه خُون تسلِيم كُنه تا د كُشته شُنه.^{١٣} د بَلِه ازو رَحَم نَكُنيد؛ شُمو باید خُون بے گناه ره از إسرائيل پاك كُنيد تا د

خوبی شُمو تمام شُنه.

^{۱۴} د سرزمینی که خُداوند، خُدای شُمو دَز شُمو میدیه تا او ره تَصْرُف کُنید، سنگ ایشته پُلوان-شِریک خُو ره که پیشنه‌گون شُمو دَ تقسیم زمین شُمو ایشته تغییر نَدید.

قانون دَ باره شاهد

^{۱۵} شاهدی يگ نفر بله اثباتِ جرم يَگو کس هر خطایا هر گناهی که او مُرتکب شده بشه،
^{۱۶} بَس نِييه؛ يگ قضيه باید دَ شاهدی دُو شاهد يا دَ شاهدی سِه شاهد ثابت شُنه. اگه يگ شاهد از رُوي بَدخاهی باله شُده دَ خلاف يَگو کس شاهدی بِديه که او مُرتکب جرم شُده، اوخته هر دُو نفری که دَ بَين ازوا دعوا آسته باید دَ حضور خُداوند، دَ پیش پیشوایو و
^{۱۷} قاضی های که دَ امزُو زمان قضاوت مُونه، حاضر شُنه ^{۱۸} و قاضی ها خُوب تحقیق کنه، اگه امو شاهد يگ شاهد دروغگوی بُود و دَ خلاف بِرارِ إسرائیلی خُو شاهدی دروغ دَده بُود، ^{۱۹} اوخته دَ حق شاهد دروغگوی امو کار ره کُنید که او قصد داشت دَ حق بِرارِ إسرائیلی شی شُنه. دَ امزی رقم شرارت-و-بدی ره از مینکل خُو پاک کُنید. ^{۲۰} وختی باقی مردم دَزی باره بِشنوه، ترس مُوخوره و دِیگه هرگز ای رقم کار بَد ره دَ مینکل شُمو انجام نَمیدیه. ^{۲۱} هیچ رَحم دَ چیم شُمو نَبَشه؛ جان ره دَ عِوضِ جان، چیم ره دَ عِوضِ چیم، دَندو ره دَ عِوضِ دَندو، دِست ره دَ عِوضِ دِست و پای ره دَ عِوضِ پای بِکِيرید.

٢٠ وختى د خِلافِ دشمناي خو د جنگ موريٰد و مينگريٰد كه اسپ ها، گادى هاي جنگى و لشکر ازوا از شمو كده گلو يه، ازوا ترس نخورٰيد، چون خداوند، خدای شمو كه شمو ره از سرزمین مصر بُرو اوُرد، قد شمو آسته.^۱ امي كه د میدان جنگ نزديك شدید، پيشوا پيش بيه و قد لشکر شمو گپ بِزَنَه^۲ و دَزَوا بُكِيه: آي قوم إسرائيل، بشنو! امروز شمو پيش موريٰد تا د خِلافِ دشمناي خو جنگ کنيد. کم دل نشنيد، ترس نخورٰيد، وحشت زده نشنيد و ازوا پيم نکنيد،^۳ چراكه خداوند، خدای شمو قد شمو موره تا بَلِدِه شمو د خِلافِ دشمناي شمو جنگ کده شمو ره پیروز کنه.^۴

بعد ازو کله کلونا قد لشکر گپ زده بُكِيه: آيا کسى آسته که خانه نو آباد کده بشه و او ره وقف نکده بشه؟ اگه آسته، او باید پس د خانه خو بوره، نشنه که او د جنگ کشته شنه و دیگه کس خانه شی ره وقف کنه.^۵ آيا کسى آسته که باع انگور جور کده بشه و حاصل شی ره نچشیده بشه؟ اگه آسته، او باید پس د خانه خو بوره، نشنه که او د جنگ کشته شنه و حاصل شی ره دیگه کس بچشه.^۶ آيا کسى آسته که قد يگ دختر نامزاد شده بشه و توی نکده بشه؟ اگه آسته، او باید پس د خانه خو بوره، نشنه که او د جنگ کشته شنه و دیگه مرد قد ازو دختر توی کنه.^۷ و کله کلونا إدامه دده د لشکر بُكِيه: آيا کسى آسته که ترس خورده بشه يا کم دل شده بشه؟ اگه آسته، او باید پس د خانه خو

بوره، نَشْنَه که بِرَارُونِ إِسْرَائِيلِي خُو ره رقمِ خود خُو آلی کَم دِل کُنَه.^٩ وَخَتِّيَكَه كَلَوْنَا از توره گُفتُو قد لشکر خلاص شُد، اُونا دَبَلِه لشکر سرکرده ها تعیین کُنَه تا دَلشکر هِدایت بِدِيه.

هر غَيْتِي که دَيَگ شار نزِديک مُوشِيد تا دَخِلَافِ اُزو جنگ کُنَيد، اوّل بَلِدِه اُزو پیشِنهاد صُلح کُنَيد.^{١٠} اگه پیشِنهادِ صُلح شُمو ره قبُول کد و درگه ها ره بَلِدِه شُمو واز کد، اوخته پِگِ مردُمِي که دَمَنِه شى آسته بَلِدِه شُمو كارِ إِجْبارِي کده شُمو ره خِدمَت کُنَه.^{١١} ليکِن اگه قد شُمو صُلح نَكَد و دَخِلَافِ شُمو جنگ کد، اوخته او ره محاصره کُنَيد.^{١٢} و غَيْتِي که خُداوند، خُدای شُمو او شار ره دَدِست شُمو تسلیم کد، پِگِ مَردا-و-باچه های جوان شى ره از دَمِ شمشیر تیر کُنَيد.^{١٣} مَكْم خاتُونو، بچِكيچاي ريزه، چارپاپا و چيزاي دِيكَه ره که دَشار بَشه دَعِنوانِ وُلجه بَلِدِه خُو بِكِيرِيد. شُمو مِيتِنِيد که تمامِ وُلجه های دُشمَون خُو ره که خُداوند، خُدای شُمو دَز شُمو دَده، إِستِفادَه کُنَيد.^{١٤} امي کار ره دَحقِ پِگِ شاراي کُنَيد که از شُمو دُور آسته و از جِمِ شاراي امزى مِلت های نزِديک نِييَه.^{١٥} ليکِن دَشاراي امزى مِلت های نزِديک که خُداوند، خُدای شُمو دَعِنوانِ مُلكِيت دَز شُمو مِيدِيه، يِگ زِنده جان ره ام زِنده نِيلِيد.^{١٦} بَلِكِه امي مِلت ها، يعني حِتَيا، أَمُوريَا، كِنْعانيَا، فَرِزِيا، حِويَا و يِبوسِيا ره کامِلاً نابُود کُنَيد، امُورِقَم که خُداوند، خُدای شُمو دَز شُمو امر کده؛^{١٧} تا اُونا نَتَنَه که امُورِ چيزاي نَفَرَت انگَيز ره که بَلِدِه خُدايون خُو انجام مِيدِيه دَز شُمو تعليِيم بِدِيه؛ نَشْنَه که شُمو امُورِ چيزا ره ام انجام بِدِيد و دَخِلَافِ خُداوند، خُدای خُو گناه کُنَيد.

وختیکه یگ شار ره بَلِدِه روزای کَلو محاصره مُونید تا دَ خِلافِ اُزو جنگ کده او ره بِکِیرید، شُمو درختون شی ره قد تَور نَزَنید و اُونا ره از بَین نَبَرید، چون شُمو مِيتَنید که از میوه ازوا بُخورید، پس اُونا ره قَطع نَكَنید. آیا درختون صحراء انسان آسته که شُمو اُونا ره محاصره کُنید؟^{۲۰} لیکن درختای ره که مِيدَنید میوه نَمِیدیه، اُونا ره مِيتَنید بِنَزَنید و قَطع کُنید و بَلِدِه جور کدون سَنگر دَ خِلافِ شاری که قد شُمو جنگ مُونه إِستِفاده کُنید، تا وختیکه او سُقوط کنه.

مُقرَرات بَلِدِه قتلى که قاتِل معلُوم نَبَشَه

۲۱ اگه دَ سرزِمینی که خُداوند، خُدای شُمو دَز شُمو مِيدیه تا او ره تَصَرُف کُنید، یگ جَسَد دَ صحراء افتَدَه بَشه و معلُوم نَبَشَه که او ره کَي کُشتَه،^۱ اوخته رِيش سفیدا و قاضی های شُمو بُرو رفته فاصِله شارای ره که دَ گِرد-و-بَر جَسَد آسته، اندازه کنه.^۲ و هر شاري که دَمزُو جَسَد نزَديک بُود، رِيش سفیدای امزُو شاري یگ جونه گاو ره که هنوز کار نَکده بَشه و یُوغ دَ بَلِه شی ایشته نَشَدَه بَشه بِکِيره^۳ و او ره دَ يگ دَرَّه که آو جاري بَشه و دَز شی هرگز قُلبه و كِشت-و-كار نَشَدَه بَشه تاه کنه و گردون امزُو جونه گاو ره دَ أونجى دَ مَنه دَرَّه مِيدَه کنه.^۴ بعد اُزو پیشوایو که اولادِه لاوی آسته نزَديک بییه، چون خُداوند، خُدای شُمو اُونا ره إِنتِخاب کده تا دَ حُضُور خُداوند خِدمت کنه و دَ نام اُزو برکت بِدیه و تا دَ حُکْم ازوا هر جِنْجال و هر ضَرِبه زَدو حل-و-فصل شُنه.^۵ و پَگِ رِيش سفیدای امزُو شار که

د جَسَد نزِدِیک آسته دِستای خُو ره دَبَلِه جونه‌گاو که گردون شی دَمَنَه دَرَّه مَیدَه شُده،

بُشويه^۷ و اونا اعلان کده بُكَيَه: دِستای مو امى خُون ره نَريختَنَدَه و چِيمَى مو ام نَديده.

آى خُداوند، اى كِفاره ره بَلَدِه قَوم خُو إِسرائِيل که بازخَرِيد کدَه، قَبْول كُو و نَيَل که خُون

بَـےـ گــنــاهـ دــ گــرــدــوــنــ قــوــمــ تــوــ إــســرــائــيــلــ باـقــىــ بــمــنــهــ.ــ اوـختـهـ اـونـاـ اـزـ گــنــاهـ خــوــنــ رــيــخــتــنــدــهـ شــدــهـ

بــخــشــيــدــهـ مــوــشــهـ.ــ دــ اـمــزــىــ رــقــمــ شــمــوــ خــوــنــ بــےــ گــنــاهــ رــهــ اـزــ مــيــنــكــلــ خــوــ پــاـكــ کــنــيــدــ،ــ چــوــنــ شــمــوــ

بــايــدــ چــيزــىــ رــهــ کــهــ دــ نــظــرــ خــدــاـوــنــدــ صــحــيــحــ آـســتــهــ،ــ اـنــجــامــ بــدــيــدــ.

مُقرَرات بَلَدِه توی کدو قد خاتُونوی اسِير

وختى دَ جنگ دُشمناي خُو مورِيد و خُداوند، خُدای شُمو اونا ره دِست شُمو تسلِيم

مُونه و شُمو اونا ره اسِير مُونَيَد،^{۱۱} و دَ مينَكلَ اسِيرَا يِگ خاتُون نُورَيَند ره مِينَگَرِيد و يِگ

شُمو عاشق اُزو مُوشَه و ميخايه که او ره خاتُو کنه،^{۱۲} او مِيتَنه او ره دَ خانِه خُو بُبرَه. امُو

خاتُو بــايــدــ ســرــ خــوــ رــهــ کــلــ کــنــهــ،ــ نــاخــونــاـيــ خــوــ رــهــ بــيــگــيرــهــ^{۱۳}ــ وــ کــالــاـيــ اـســيــرــ خــوــ رــهــ تــبــدــيــلــ کــدــهــ دــ

خانِه اُزو نفر بُمنه و يِگ ماـهـ بــلــدــهــ آـتــهــ وــ آـيــهــ خــوــ مــاتــمــ بــيــگــيرــهــ.ــ بــعــدــ اـزــوــ اـمــوــ مــرــدــ مــيــتــنــهــ قــدــ اـزــوــ

يــكــجاـيــ شــنــهــ وــ شــوــيــ اـزــوــ شــنــهــ وــ اوــ خــاتــوــنــ اـزــوــ.^{۱۴} لــيــكــنــ اـگــهــ اوــ قــدــ اـمــزــوــ خــاتــوــ خــوــشــ نــبــشــهــ،ــ

او ره بــايــدــ آـزاـدــ کــنــهــ کــهــ دــ خــوــشــ دــلــ خــوــ بــورــهــ وــ حقــ نــدــرــهــ کــهــ اوــ رــهــ دــ نــقــرهــ ســوــداـ کــنــهــ.ــ اوــ نــبــاـيــدــ

قد اُزو رقم يِگ کــنــيــزــ رــفــتــارــ کــنــهــ،ــ چــراـکــهــ اوــ رــهــ بــےــپــرــدــهــ کــدــهــ.

حقِ باچه اوّلباری

اگه يگ مَرَد دُو خاتُو دَشته بَشه که يگ شى از دِل شى بَشه و دِيگه شى از دِل شى نَبَشه و هر دُوى ازوا بَلَدِه شى باچه بِزَيه، ام او که از دِل شى آسته و ام او که از دِل شى نَبَشه؛ و باچه خاتُونى که از دِل شى نَبَيه اوّلبارى بَشه، ^{١٦} اوخته دَروزى که او دارايى خُو ره دَباچه های خُو تقسيم مُونه، نَمِيتَنه باچه خاتُونى ره که از دِل شى آسته دَجاي باچه خاتُونى که از دِل شى نَبَيه حقِ اوّلبارى گى بِديه، چُون اوْ واقعاً اوّلبارى آسته. ^{١٧} بَلَكِه باچه خاتُونى ره که از دِل شى نَبَيه باچه اوّلبارى خُو قبُول كُنه و از پَگِ دارايى خُو دُو تقسيم بَلَدِه ازو بِديه، چراکه او حاصلِ اوّلين شَمرِ قُوت شى آسته و حقِ اوّلبارى گى ازو مُوشه.

باچه ياغى

اگه يَكَوْ كَس يَكَوْ باچه سرَكَش و ياغى دَشته بَشه که از آيد آته و آبه خُو نَشْنَه و هر چند که او ره سرزِنش کُنه دَزوا گوش نَديه، ^{١٩} اوخته آته و آبه شى بَايد او ره گِرفته دَپِيشِ رِيش سفيداي شار خُو دَدرَگَه امزُو جاي بيره ^{٢٠} و دَريش سفيداي شار خُوبُكِيه: إِي باچه مو سرَكَش و ياغى آسته. إِي از آيد مو نَمُوشه و ايله خرج و شرابى آسته. ^{٢١} اوخته پَگِ مردمِ شار بَايد او ره سنگسار کنه تا بُمُره. دَامزى رقم شُمو شرارَت-و-بَدَى ره از مينكل خُو پاك كِنيد؛ اوخته تمامِ قَومِ إِسرائِيل إِي ره مِيشنَوه و ترس مُخوره.

^{۲۲} اگه یکو نفر مُرتکب گناهی شده بشه که جزای شی مَرگ آسته و او اعدام شده دِرخت
 آوزو شده بشه، ^{۲۳} جسد ازو تمام شاو دِرخت باقی نمنه. او ره حتماً د امزُو روز دفن
 گنید، چون هر کسی که د دار آوزو شننه نالَت خدا د بله شی آسته. شمو سرزمینی ره که
 خداوند، خدای شمو د عنوان مُلکیت دَزشمو میدیه، نجس نگنید.

^{۲۴} اگه گاو یا گوسپون بِرارِ اسرائیلی خو ره مینگری که راه خو ره گم کده، تیر خو
 ره نیَر، بَلکِه او ره پس د خوندہ شی بُبر. ^{۲۵} اگه بِرارِ اسرائیلی تو د نزدیک تو زندگی نکنه
 یا نفامی که صاحب شی کی آسته، او ره د خانه خو بُبر و او د پیش تو بمنه تا غیتیکه
 بِرارِ اسرائیلی تو د طلب شی بُر شننه، اوخته او ره دَزو پس بَدی. ^{۲۶} قد خَر شی عین کار ره
 گو، قد کالای شی عین کار ره گو و قد هر چیزی دیگه بِرارِ اسرائیلی خو که گم شده بشه
 و تو پیدا کده بشی، ام عین کار ره گو. تو نباید تیر خو ره بَیری.

^{۲۷} اگه خَر یا گاو بِرارِ اسرائیلی خو ره مینگری که د راه زیر بار خاو کده، تیر خو ره نیَر،
 بَلکِه حتماً قد ازو کومک گو که او ره ایستلجمی کنه.

^{۲۸} یگ خاتو باید رختِ مَردانه د جان خو نکنه و یگ مرد ام باید کالای زنانه نپوشه، چون

هر کسی که امی کار ره کنه خُداوند، خُدای تُو اُزو نفرَت مُونه.

اگه وورِ یگو مُرگَک ره دَ راهِ خُو مینگری، چی دَ درخت بَشه، چی دَ زمی و دَ مَنِه اُزو
چُوچه ها یا تُخم ها بَشه و آبه دَ بَلِه چُوچه ها یا تُخم ها خاو بَشه، آبه ره قد چُوچه های
شی نَگیر. آبه شی ره ایله کُو که بوره، تنها چُوچه های شی ره بَلِه خُو بِگیر، تا دَ خُوبی
تُو تمام شُنَه و عُمرِ دِراز دَشته بَشی.

وختِیکه یگ خانِه نَو آباد مُونی، دَ بَلِه بام خُو دیوالِ نیمه جور کُو، نَشْنَه که یگو کس از
بَلِه شی بُفته و جُرمِ خُون ره دَ بَلِه خانِه خُو بیری.

دَ باغِ انگور خُو دُو رقم تُخم کِشت نَکُو، اگه نَه، پِگِ حاصل شی ضَبط مُوشَه، ام تُخمي
ره که کِشت کدے و ام حاصلِ باغِ انگور.

گاو و خَر ره دَ یگِ یوغ جوره کده قد شی قُلبه نَکُو.

کالای ره که از پاشم و کتان قَتَنی بافته شُدَه بَشه، نَپوش.

دَ چار گوشِه چَپَن خُو که خود ره قد شی مُوپوشَنی، ٹُوپَک کوک کُو.

مُقَرَّرات دَ بَارِه رَابِطَه زَن و شُوَى

اگه يَكَو مَرَد بَلَدِه خُو يَكَ خاتُونِ بِكِيرَه و بعد از خاو شُدو قد شَى، ازُو بَد بُيرَه ^{١٤} و دَ بَلَه ازُو تُهمَت كَده او ره بَدَنَام كُنه و بُكِيه: 'ما قد امزى خاتُونِ توَى كُدم، ليكِن وختِيكَه قد شَى نزِديك شُدم، فاميِيدُم كَه دُختر نِييَه. ^{١٥} اوخته آته و آبِه دُختر بَايد نشانى دُخترى امزُو خاتُونِ ره گِرفته دَ پِيشِ رِيش سفیداي شار دَ درِگَه شار بَيرَه. ^{١٦} و آتِه دُختر دَ رِيش سفیدا بُكِيه: 'ما دُختر خُو ره دَ امزى آدم دَدُم كَه خاتُونِ شَى شُنَه، ليكِن اي آدم ازُو بَد مُوبَره. ^{١٧} اينه، آلى دَ بَلَه دُختر مه تُهمَت كَده مُوكِيه: "دُختر تُو دُخترى نَدَشت." اينى ام نشانى دُخترى دُختر مه. ^{١٨} اوخته اُونَا امُوتِكه ره دَ پِيشِ رِيش سفیداي شار أوار كُنه؛ و رِيش سفیداي شار امُو مَرَد ره گِرفته جَزا بِديَه. ^{١٩} امچُنان او ره صد مِثقال نُقره جِريمَه كُنه و جِريمَه ره دَ آتِه دُختر بِديَه، چراكه امُو آدم يَكَ دُختر خانِه إسرايلَى ره بَدَنَام كَده. او دُختر بَايد خاتُونِ ازُو مَرَد باقى بُمنَه و امُو مَرَد تا زِنَده أَسْتَه، نَمِيتَنَه او ره طلاق بِديَه.

ليكِن اگه اي توره راست بَشه و نشانى دُخترى امزُو دُختر پِيدا نَشُنَه، ^{٢٠} اوخته امُو دُختر ره دَ پِيشِ درِگَه خانِه آتِه شَى بَيرَه و مَرَدَي شار شَى بَايد او ره سنگسار كُنه تا بُمرَه، چراكه او دَ خانِه آتِه خُو زِنَا كَده و دَ إسرايلَ يَكَ كَارِشم آور انْجَام دَده. دَ امزى رقم شُمو شرارَت-و-بَدَى ره از مينكل خُو پاك كُنيد.

اگه يَكَ مَرَد دَ حَيْنِ خاو شُدو قد يَكَ خاتُونِ شُوَى تُو گِرفته شُنَه، اوخته هر دُوى ازوا ^{٢٢}

باید کُشته شنه، ام مَرْدِی که قد امْزو خاتُو خاو کده و ام امُو خاتُو. دَ امزى رقم شرارَت-و-
بَدَی ره از إسراييل پاک كُنيد.

۲۳ اگه يگ دُختِرِ خانه قد يگ مَرْد نامزاد بَشه و يگ مَرْد دِيگه او ره دَ شار پَيدا کده قد
ازُو خاو کنه، ۲۴ اوخته هر دُوى ازوا ره دَ درِگه شار بَيريد و اونا ره سنگسار کُنيد تا بُمره؛
دُختِر ازى که دَ شار بُود و بَلِدِه کومَك چيغ-و-شور نَکد باید کُشته شنه و مَرْد ازى که
خاتُونِ يگو کسِ دِيگه ره بَسِ آبرُو کده باید کُشته شنه. دَ امزى رقم شرارَت-و-بَدَی ره از
مینكل خُو پاک كُنيد.

۲۵ ليکِن اگه امُو مَرْد دُختِر نامزاد-دار ره دَ صحراء پَيدا کنه و دَ بَلِه ازُو زور اُورده قد ازُو
خاو کنه، اوخته تنها امُو مَرْد که قد ازُو خاو کده باید کُشته شنه. ۲۶ دَ حق دُختِر هيچ کار
نَکُو، چون او گناهی نَکده که سزاوارِ مَرگ بَشه. اى مِثِل قصِيه أَسته که يگو کس دَ بَلِه
يگ نفرِ دِيگه حمله مُونه و او ره مُوكشه، ۲۷ چون وختِيکه امُو مَرْد دُختِر نامزاد-دار ره دَ
صحراء پَيدا کد، دُختِر بَلِدِه کومَك چيغ-و-شور کد، ليکِن هيچ کس نَبُود که او ره نِجات
بِديه.

۲۸ اگه يگ مَرْد يگ دُختِرِ خانه ره که نامزاد نَدَشتَه بَشه پَيدا کنه و او ره دَ زور گِرفته قد
ازُو خاو کنه و اونا گِرفته شنه، ۲۹ اوخته امُو مَرْد که قد ازُو خاو کده، باید پِنجاه مِثقال
نُقره دَ آته دُختِر بِديه و امُو دُختِر خاتُونِ ازُو شنه. ازى که او ره بَسِ آبرُو کده، او تا غَيْتِيکه

زِنده آسته نَمِيتَنه او ره طلاق بِديه. ^{٣٠} يِگ مَرَد نَبَايد خاتُونِ آته خُو ره بِكِيره و دامونِ آته خُو ره بِپَرَده كَنه.

مُقرَرات دَ بارِه کسای که دَ جماعتِ داخِل شُده نَمِيتَنه

^{٢٣} هر کسی که چوره بَشه يا آله تناسلى شی مُنْثی بَشه، او نَبَايد دَ جماعتِ خُداوند داخِل شُنه.

آدمِ حرامزاده نَبَايد دَ جماعتِ خُداوند داخِل شُنه؛ حتى تا پُشتِ دَهْم هِيچ کَدمِ اولاًِدِه اُزو نَبَايد دَ جماعتِ خُداوند داخِل شُنه.

^٣ هِيچ عمونى و موآبى نَبَايد دَ جماعتِ خُداوند داخِل شُنه؛ حتى تا پُشتِ دَهْم هِيچ کَدمِ اولاًِدِه ازوا هِيچ وخت نَبَايد دَ جماعتِ خُداوند داخِل شُنه، ^٤ چراکه اُونا قد نان و آو دَ دَم راهِ شُمو نَمَد وختیکه شُمو از مصر بُرو أَمِيدید، بلکِه بِلعام باچه بِعور ره از فِتور، از ارامِ نَهَرين کِرا کد تا شُمو ره نالَت کنه. ^٥ لیکِن خُداوند، خُدای شُمو نَخاست که توره بِلعام ره بِشنَوه، بلکِه خُداوند، خُدای شُمو نالَت ره بَلِدِه شُمو دَ برَكت تبَدِيل کد، چراکه او شُمو ره دوست دَره. ^٦ پس تا زِنده أَستِيد، خَير و خُوبی ازوا ره طلب نَکنید.

شُمو نَبَايد از اِدوميا نَفَرت دَشته بَشِيد، چون اُونا بِرارون شُمو آسته. شُمو نَبَايد از مصر يا

نفرَت دَشته بَشِيد، چُون شُمو دَ سرزمِينِ ازوا دَ عنوانِ بِيگَنه زِندگى مُوكِدِيد. ^٩ أولاً دَاي
نسلِ سِومِ ازوا كه بَلَده ازوا دَ دُنيا مَيَيه، مِيتَنه دَ جماعتِ خُداوند داخِل شُنه.

پاك-و-مُقدَّس نِگاه کدونِ خَيمَه گاهِ نِظامِي

^{١٠} وختِيكه قد لشکر دَ خِلافِ دُشمناي خُو مورِيد، خودون ره از تمامِ چيزاي ناپاك دُور نِگاه کُنيد. اگه کَدم شُمو ره شَيَطُو بازِ بِديه و او ناپاك شُنه، او باید از خَيمَه گاه بُرو بوره و دَ خَيمَه گاه داخِل نَشه.^{١١} وختِيكه شام نزِديك شُد، او باید خود ره قد آو غُسل بِديه و غَيْتِيكه آفتَو شِشت، او مِيتَنه پس دَ خَيمَه گاه داخِل شُنه.

^{١٢} شُمو باید دَ بُرونِ خَيمَه گاه يگ جای دَشته بَشِيد تا بَلَده رفع حاجتِتَنِيد دَ اونجى بورِيد. ^{١٣} دَ بَينِ اسباب خُو باید يگ بيلچه دَشته بَشِيد، تا وختِيكه بَلَده رفع حاجت مِيشَنِيد قد ازو زمي ره بِكَنيد و بعد ازو چَتلِي خُو ره بُپوشَنِيد، ^{١٤} چراكه خُداوند، خُدای شُمو دَ مَنه خَيمَه گاهِ شُمو دَ حَركت آسته تا شُمو ره نِجات بِديه و دُشمناي شُمو ره دِست شُمو تسلِيم کنه. پس خَيمَه گاهِ شُمو باید پاك-و-مُقدَّس بَشه تا خُداوند دَ مينكل شُمو نِجاست ره نَنگره و از شُمو روی گردو نَشه.

احكامِ مُختلف

غُلامی که از پیش بادار خُو دُوتا کده دَپیش ازْتُو مییه، او ره پس دَبادار شی تسلیم نکُو.^{١٦} او قد تُو دَمینکل شُمو دَه رجای که دِل شی مُوشہ و دَه رشاری که انتخاب مُونه، زِندگی کنه. دَسر اُزو ظُلم نَکُو.

از دُخترونِ اسرائیلی هیچ کُدم شی فاحِشه بُتخانه نَبشه و از باچه های اسرائیلی ام هیچ کُدم شی فاحِشه بُتخانه نَبشه.^{١٨} عایدِ خاتُونِ فاحِشه و مردِ فاحِشه ره بَلدِه پُوره کدونِ هیچ نَدر دَخانه خُداوند، خُدای خو نَیرید، چراکه هر دُوى شی دَپیش خُداوند، خُدای شُمو نَجِس آسته.

دَبرارِ اسرائیلی خُو که قرض مِیدید، سُود نَگیرید، نَه سُود از پیسه، نَه سُود از خوراکه و نَه سُود از هر چیزی که سر سُود دَده مُوشہ.^{٢٠} دَیگ بیگنه میتنید سر سُود قرض بِدید، لیکن بِرارِ اسرائیلی خُو ره که قرض مِیدید، سُود نَگیرید تا خُداوند، خُدای شُمو دَسرزمینی که بَلدِه تَصرُف کدون شی داخل مُوشید، شُمو ره دَه کار که دِست خُو ره دراز کُنید، بَرکت بِدیه.

وختیکه بَلدِه خُداوند، خُدای خُو نَدر مِیگیرید، بِدونِ طال-و-طُول او ره آدا کُنید، چراکه خُداوند، خُدای شُمو حتماً او ره از شُمو طلب مُونه، اوخته شُمو گناهکار مُوشید.^{٢٢} لیکن اگه از نَدر کدو خودداری کُنید، مُرتکب گناه نَمُوشید.^{٢٣} هر چیزی که از دان شُمو بُر مُوشہ، او ره دَدقَت دَجای بیرید، مُطابِق هر چیزی که دَرضای خُو بَلدِه خُداوند، خُدای

خُو نَذَر كِدِيد و قد زِيون خُو گُفتِيد، عمل كُنِيد.

٢٤ وختِيکه دَ باغِ انگورِ همساپِه خُو داخِل مُوشِيد، از انگور شی تا سير نَشَدِيد بُخُورِيد،^{٢٤} ليکِن دَ ظرف خُو آندخته نَبِريـد. وختِيکه دَ زمِينِ همساپِه خُو داخِل مُوشِيد، مِيتَنِيد خوشـه ها ره قد دِست خُو بِچِينـيد، مِكـم داس ره دَ كِشتِ همساپِه خُو دَ كار نَبِريـد.

٢٥ ١ اگه يـگ مـرد قد يـگ خـاتـو توـي كـنه و اـمـو خـاتـو دـ نـظـر شـي خـوش نـخـورـه بـخـاطـري كـه دـزـو يـگـو چـيزـ خـرابـ پـيـداـ كـدهـ، اوـختـهـ اوـ يـگـ طـلاقـنـامـهـ نـوـشـتـهـ كـدهـ دـ دـسـتـ اـزـوـ بـدـيهـ وـ اوـ رـهـ اـزـ خـانـهـ خـوـهـيـ كـنهـ. وختِيکه اوـ خـانـهـ اـزـوـ رـهـ اـيلـهـ كـدـ، اوـ مـيـتـنـهـ بـورـهـ وـ خـاتـونـ يـگـ مـردـ دـيـگـهـ شـنـهـ. ٢ اـگـهـ شـوـىـ دـوـمـىـ اـمـ اـزـوـ خـوشـ شـيـ نـيـهـ وـ يـگـ طـلاقـنـامـهـ نـوـشـتـهـ كـدهـ دـ دـسـتـ اـزـوـ بـدـيهـ وـ اوـ رـهـ اـزـ خـانـهـ خـوـهـيـ كـنهـ يـاـ اـمـوـ شـوـىـ دـوـمـىـ كـهـ اوـ رـهـ خـاتـوـ كـدهـ، بـمـرـهـ؛ ٣ اوـختـهـ شـوـىـ اوـلـىـ كـهـ اوـ رـهـ اـيلـهـ كـدهـ، حقـ نـدرـهـ كـهـ اوـ رـهـ بـسـمـ بـيـگـيرـهـ وـ خـاتـونـ خـوـ كـنهـ، چـونـ اوـ نـاـپـاـكـ شـدـهـ وـ ايـ كـارـ دـ نـظـرـ خـداـونـدـ زـشـتـ آـسـتـهـ. پـسـ دـ بـلـهـ سـرـزـمـيـنـىـ كـهـ خـداـونـدـ، خـداـيـ شـمـوـ دـ عـنـوانـ مـلـكـيـتـ دـزـ شـمـوـ مـيـديـهـ، گـناـهـ نـيـريـدـ.

٤ وختِيکه يـگـ آـدـمـ نـوـ توـيـ مـوـنـهـ، اوـ نـبـاـيدـ قـدـ لـشـكـرـ دـ جـنـگـ بـورـهـ وـ نـبـاـيدـ يـگـ وـظـيفـهـ بـلـدـهـ شـيـ دـدـهـ شـنـهـ؛ اوـ بـاـيدـ بـلـدـهـ يـگـ سـالـ آـزـادـ بـشـهـ تـاـ دـ خـانـهـ خـوـ بـشـيـنـهـ وـ خـاتـونـيـ رـهـ كـهـ گـرـفـتهـ، خـوشـ نـگـاهـ كـنهـ.

^۹ هیچ کس نباید آسیا یا سنگ بلنے آسیا ره گرو بگیره، چون ای کار مثل ازی استه که یگ زندگی ره د گرو بگیری.

اگه یگو نفر پیدا شنه که یگ براير اسرائیلی خو ره اختیاف کنه و د بله شی ظلم کنه یا او ره سودا کنه، امو اختیافچی باید کشته شنه. د امزي رقم شرارات-و-بدی ره از مینکل خو پاک کنید.

فِکر خُو ره بِگِرِيد که د باره مَرضِ کولی هر چیزی که پیشوایون لاوی دَز شُمو هدایت میدیه، او ره د دِقَت انجمام بِدِيد. آر، هر چیزی که ما دزوا امر کدیم، د مُطابِقِ ازوا د دِقَت عمل کنید. ^۹ د یاد خُو بِرِيد که خُداوند، خُدای شُمو د راه د حق مِریم چیز کار کد، غَیْتِیکه شُمو از مصر بُرو آمدِید.

^{۱۰} وختیکه د همسایه خُو قرض میدی، هر رقم قرض که بشه، نباید د خانه ازو داخل شُنى که یگو چیز ازو ره گرو بگیری، ^{۱۱} بَلَكِه د بُرو ایسته شُو تا امو نفر که بَلَدِه شی قرض میدی، چیزی گِروی ره بَلَدِه تُو د بُرو بیره. ^{۱۲} اگه امو نفر غریب بشه، د رخت گِروی ازو خاو نَکُو، ^{۱۳} بَلَكِه د غَیْتِ آفتَو شِشتو حَتَّماً رَخْتِ گِروی ره بَلَدِه ازو پس بِدی تا او د مَنِه رَخْت خُو خاو کنه و بَلَدِه تُو دُعای خَيْر-و-بَرَكَت بِدِيه؛ و ای کار بَلَدِه تُو د حُضور خُداوند، خُدای تُو یگ عمل عادلانه حِساب مُوشه.

دَ بَلِه مُزْدُور کار که غَرِيب و مُحتاج أَسْتَه ظُلْم نَكُو، چی از جمِ پِرَارونِ إِسْرَائِيلی تُو بَشَه، چی از جمِ بِيَگَنه گونی که دَ سَرَزَمِين شُمُو دَ يَكِي از شَارَاي شُمُو زِنَدَگِي مُونَه.^{۱۵} مُزْدِ اُزو ره هر روز پیش از آفَتَو شِشتَو بَلِه شَى بِدِي، چراکه او غَرِيب أَسْتَه و زِنَدَگِي اُزو دَ امْزُو بَسْتَه يَه؛ اگه نَه، او دَ خِلَاف تُو دَ پِيشِ خُداونَد نَالَه-و-فَرِياد مُونَه و تُو گَناهَكار حِساب مُوشَى.

آتَه گو نَبَاید بَخَاطِرِ أَولَادَى خُو كُشَتَه شُنَه و نَه امَّ أَولَادَا بَخَاطِرِ آتَه گون خُو كُشَتَه شُنَه؛^{۱۶} هر کس بَاید بَخَاطِرِ گَناهِ خود خُو كُشَتَه شُنَه.

بِيَگَنه گو و يَتِيمَا ره از عَدَالَتِ مَحْرُوم نَكْنِيد و كَالَّا يَخْتَطِي بِيَوَه ره گِرَو نَكِيرِيد.^{۱۷} دَ يَاد خُو بِيرِيد که شُمُو دَ مِصْرَ غُلام بُودِيد و خُداونَد، خُدَى شُمُو، شُمُو ره اُزُونجِي آزاد کد. امزِي خَاطِرِ ما دَز شُمُو أَمْر مُونُم که امي کارا ره انجام بِدِيد.

و خَتِيكَه حَاصِل خُو ره از زَمِين خُو درَو مُونَى و يَكَ قَوَده ره دَ زَمِين خُو پُرْمُشت مُونَى،^{۱۹} بَلِه گِرَفتَون اُزو پَس نَرَو؛ بَيل که بَلِه بِيَگَنه، يَتِيم و خَاتُون بِيَوَه بَشَه تا خُداونَد، خُدَى تُو، تُو ره دَ تَمَامِ کارَاي دِست تُو بَرَكَت بِدِيه.^{۲۰} و خَتِيكَه درَختِ زَيْتُون خُو ره مِيتَكَنى، او ره بَسَم نَتَكَن؛ بَيل که بَلِه بِيَگَنه، يَتِيم و خَاتُون بِيَوَه بَشَه.^{۲۱} امي رقم و خَتِيكَه انْگُور ره از باعِ انْگُور خُو مِيَچِينَى، بَسَم بَلِه انْگُور چِينَدو نَرَو؛ بَيل که بَلِه بِيَگَنه، يَتِيم و خَاتُون بِيَوَه بَشَه.

د ياد خو بيريد که شمو د سرزمين مِصر غلام بُوديد. امزى خاطر ما دَز شُمو امر مُونم
که امي کارا ره انجام بَدِيد.

٢٥ وختيکه دُو نفر قد يگديگه خو دعوا دَره، اونا باید د محکمه بوره و قاضی دَبيَن
ازوا فيصله کده آدم عادل ره بے گناه اعلان کنه و آدم مجرم ره محکوم کنه.^۱ اوخته اگه
آدم مجرم سزاوار قمچى خوردو بشه، قاضى او ره قد رُوى شى خاولجى کنه و امر کنه که
د پيش رُوى شى او ره د مطابق جرم اُزو د حساب قمچى بِزنَه.^۲ او ره تا چل قمچى زده
ميتنَه، ازو کلو نَه، چون اگه ازو کده کلو بِزنَه، بِرار إسرائيلى شمو د نظر شمو خار-و-حقير
موشه.

٣ دان گاو ره د غيت جُغول کدو بسته نَکُو.

اگه چند بِرار يگجاي زِندگى کنه و يكى ازوا بے اولاد بُمره، اوخته خاتون امزو بِرار فوت
شده، بُرو از خانوار شى د آدم بيگنه دده نَشنَه، بِلكه بِرار شُوي شى قد ازو يگ جاي شده
او ره خاتو کنه و بِلدِه ازو حق ايورى ره پوره کنه.^۴ و اوليلين باچه که او ميزيه باید د نام
بِرار فوت شده وارث شنه تا نام ازو از إسرائيل گُل نَشنَه.^۵ ليکن اگه امو مرد راضى نَشنَه
که خاتون بِرار خُوره بِگيره، اوخته خاتون بِرار شى باید د درگه شار د پيش ريش سفیدا
بوره و بُكَيَه: ايور مه نَميخايه که نام بِرار شى د إسرائيل باقى بُمنه و وظيفه ايورى ره

بَلِدِه اُزُو دَ جَاهِ بَيره.^٨ بعد اُزُو رِيش سَفِيدَاهِ شَارِشِي اُمو آدم ره کُوي کنه و قد اُزُو توره بُكَيَه. اگه او تاکِيد کده بُكَيَه: 'ما نَمِيَخَايِم که او ره بِكَيْرُم،^٩ اوخته خاتُونِ بِرارِ شَي دَزُو نَزِديك شَنه و دَ حُضُورِ رِيش سَفِيدَاه کَوشَره شَي ره از پَاهِ اُزُو بُر کده دَ روَي شَي تُف پورته کنه و دَ جَواب شَي بُكَيَه: 'أينِي کار دَ حقِ کسِي شَنه که خانِه بِرارِ خُو ره آباد نَمُونه.^{١٠}

و خانَوارِ اُزُو دَ إِسرائِيل، دَ نَامِ «خانَوارِ کَوشَره-بُر-شُدَه» کُوي شَنه.^{١١}

اگه دُو مَرد قد يِكَدِيگَه خُو جَنَگ کُنه و خاتُونِ يَكَي ازوا پِيش بِيه تا شُوي خُو ره از چنَگِ آدم زَدَنِي خلاصِ کُنه و دِستِ خُو ره دِراز کده شِرمَگَاهِ اُزُو ره بِكَيْرَه،^{١٢} دِستِ اُزُو ره باید مُنْطَى کُنِيد و دَزُو رَحَم نَكُنِيد.^{١٣}

شُمو نَبَايِد دَ خَلِتَه خُو دُو رقم سنَگِ تَرازُو دَشَتَه بَشِيد که يِگ شَي گِرنَگ و دِيكَه شَي سُبُك بَشه.^{١٤} شُمو نَبَايِد دَ خانِه خُو دُو رقم مَنَك دَشَتَه بَشِيد که يِگ شَي كَله و دِيكَه شَي رِيزَه بَشه.^{١٥} بَلِكِه سنَگِ تَرازُوي صَحِيح و پُوره دَشَتَه بَشِيد و مَنَك شُمو ام صَحِيح و پُوره بَشه تا دَ سَرِزِمِينِي که خُداوند، خُدَاهِ شُمو دَز شُمو مِيدِيه، عُمرِ دِراز دَشَتَه بَشِيد.^{١٦}

چُون هر کسِي که امي کارا ره کنه، يعني هر کسِي که دَغَلِي کُنه، خُداوند، خُدَاهِ شُمو ازُو بَد مُوبِره.^{١٧}

دَ ياد خُو بِيرِيد که عَمَالِيقِيا دَ غَيَّتِ بُرو آمَدون شُمو از مِصر دَ راه قد شُمو چِيز کار کد،^{١٨} چِطُور اونا دَ راه دَ بَلِه شُمو حَملَه کد؛ دَ حَاليَه شُمو ضَعِيف و مَنَده بُودِيد، اونا تمامِ

کسای ره که از حال رفتد و پس مَنْدُدَ زَد و از خُدا نَتَرْسِيَد.^{۱۹} پس وختیکه خداوند، خُدای شُمو دَز شُمو، شُمو ره از شَرِّ پَگِ دُشمنای گِرد-و-بَر شُمو دَ سَرْزَمِينی که خداوند، خُدای شُمو دَز شُمو دَ عنوانِ مُلکیَت مِیدیَه تا او ره تَصَرُّف کُنِید، خلاص کده آرامی بخُشید، اوخته شُمو باید نامِ عَمَالِيق ره از تَئِ آسمو گُل کُنِید؛ ای ره پُرمُشت نَكُنِید.

هدیه های حاصلِ نَو و دَه-یگ

۲۶^۱ وختی دَ سَرْزَمِينی که خداوند، خُدای شُمو دَز شُمو دَ عنوانِ مُلکیَت مِیدیَه داخلِ شُدِید و او ره تَصَرُّف کده دَز شَى جَاي-دَجَاي شُدِید،^۲ اوخته هر کَدَم شُمو يگ مِقدار نَويَر تمامِ حاصلاتِ زَمِين امْرُو مُلك ره که خداوند، خُدای شُمو دَز شُمو مِیدیَه گِرفته بِيرِيد و دَيگ سَبَد ایشته دَجَايی که خداوند، خُدای شُمو اِنتِخاب مُونه تا نام خُو ره دَ اونجی قرار بِدِيه، بورِيد.^۳ شُمو دَ دِير پیشوای که دَ امْرُو روزا خِدمت مُونه بورِيد و دَزُو بُگِيد؛ اِمروز دَ پیشِ خداوند، خُدای تُو اِقرار مُونم که ما دَ سَرْزَمِينی داخلِ شُدِيم که خداوند دَ بابه کَلونای مو قَسَم خورد که دَز مو مِیدیَه.^۴ اوخته پیشوا سَبَد ره از دِست شُمو بِگِيره و دَ پیشِ قُربانگاهِ خداوند، خُدای شُمو بِيله،^۵ و شُمو دَ حُضُور خداوند، خُدای خُو اِقرار کده بُگِيد؛ بابه کَلون مو يگ اِرامی آواره بُود، او قد تِعدادِ کَم دَ مِصر رفت و دَ اونجی دَ عنوانِ بِيگَنه زِندگی کد و دَ اونجی او يگ قَوْمِ كَله، قَوى و پُرنَفُوس جور شُد.^۶ لَيْكِن مِصرِيا قد ازمو بدرفتاري کد و مو ره آزار-و-آذیَت کده کارای سخت ره دَ گَردون مو

آندخت. ^۷ اوخته مو د پیش خُداوند، خُدای بابه کلونای خُوناله-و-فریاد کدی و خُداوند آواز
مو ره شِنید و رَنچ و سختی و مظلومیت مو ره دید. ^۸ خُداوند مو ره قد دست زور تو،
بازوی قوی، وحشت بُرگ و مُعجزه ها و چیزای عجیب از مصر بُرو اُورد؛ ^۹ و مو ره د
امزی جای داخل کد و امی سرزمی ره که از شی شیر و عسل جاری آسته دز مو بخشید.
^{۱۰} اینه، آلی ما نَوَبَرِ حاصل زمینی ره آوردم که ثُنو، آی خُداوند دَز مه دَدَے. اوخته سَبَد
ره د حضور خُداوند، خُدای خُوب بیلید و د پیش خُداوند، خُدای خُوب سَجده کُنید. ^{۱۱} بعد از
شُمو قد لاویا و بیگنه گونی که د مینکل شُمو زندگی مُونه بخاطر پگ چیزای خُوب که
خُداوند، خُدای شُمو دَز شُمو و د خانوار شُمو بخشیده، خوشی کُنید.

^{۱۲} د سال سِوم که سال ده-یگ آسته، وختی از جدا کدون ده-یگ تمام حاصلات خُو خلاص
شدید، او ره د لاویا، بیگنه گو، یتیما و خاتونوی بیوه پدید تا د منه شارای شُمو بُخوره و
سیر شُنه. ^{۱۳} اوخته د حضور خُداوند، خُدای خُوب بُگید: 'ما د مطابق پگ احکام تُو که دز
مه امر کدی حصه مقدّس ره از خانه خُوب بُر کُدم و او ره د لاویا، بیگنه گو، یتیما و
خاتونوی بیوه دَدُم. ما از احکام تُو سربیچی نَکُدم و اونا ره پُرمُشت نَکُدم. ^{۱۴} ما د وخت
ماتم خُو ازو نَخوردم و غیتیکه ناپاک بُودم دَزو دست نَزدم و هیچ چیزی ازو ره د مُرده ها
نَکُدم، بلکه از آید خُداوند، خُدای خُو شُدم و مطابق چیزای که دز مه امر کدی، رفتار
کُدم. ^{۱۵} از جایگاه مقدّس خُو از عالم باله توخ کو و قوم خُو إسرائیل و امی سرزمی ره که
دز مو دَدَے برکت بُدی، امی سرزمی ره که د بابه کلونای مو قسم خورده و عده کدی، امی

سرزمی ره که از شی شیر و عسل جاری آسته.^{۱۶}

پیروی از احکام خداوند

امروز خداوند، خدای شمو دز شمو امر مونه که امی قانونا و دستورا ره د جای بیرید.

پس قد تمام دل و قد تمام جان خو د دقت د جای بیرید.^{۱۷} شمو امروز اقرار کدید که خداوند، خدای شمو آسته و تعهد کدید که د مطابق راه-و-طريق ازو رفتار مونید، قانونا، احکام و دستورای شی ره د جای میرید و از آید ازو موشید.^{۱۸} و خداوند امروز اقرار کد که شمو قوم خاص ازو استید، امو رقم که او وعده کده. پس باید پگ احکام ازو ره نگاه کنید،^{۱۹} تا د تعریف، د شهرت و د احترام شمو ره از پگ ملت های که خلق کده، بلندر تر قرار بدهیه و تا بلده خداوند، خدای خویگ قوم مقدس بشید مطابق وعده ازو.

قربانگاه د کوه عیبال

۲۷ اوخته موسی و ریش سفیدای اسرائیل د بله قوم امر کده گفت: "پگ احکامی ره که ما امروز دز شمو امر مونم، د جای بیرید. روزی که از دریای اردن د سرزمینی که خداوند، خدای شمو دز شمو میدیه تیر شدید، سنگای کله ره ایستالجی کنید و د روی ازوا گچ بملید^{۲۰} و پگ توره های امزی شریعت ره د روی ازوا نوشته کنید. آر، امی که از

دریا تیر شدید و د سرزمینی که خداوند، خدای شمو دز شمو میدیه داخل شدید، دمزو سرزمی که از شی شیر و عسل جاری آسته و خداوند، خدای بابه کلونای شمو دز شمو وعده کده، امی کار ره انجام بدید.^۴ خلاصه، بعد از تیر شدو از دریای اردن امی سنگا ره که امروز د باره شی دز شمو امر کدم، د کوه عیبال ایستالجی کنید و د روی ازوا گچ بملید.^۵ اونجی یگ قربانگاه بله خداوند، خدای خو آباد کنید؛ قربانگاه باید سنگ بشه و بله آباد کدون شی از آوزار آینی کار نگیرید.^۶ قربانگاه خداوند، خدای خو ره از سنگای تراش نشده آباد کنید و قربانی های سوختنی ره د بله ازو بله خداوند، خدای خو تقدیم کنید.^۷ قربانی های سلامتی ره تقدیم کده د اونجی بخورید و د حضور خداوند، خدای خو خوشی کنید.^۸ فکر شمو بشه که پگ تورای امزی شریعت ره د روی امزو سنگا د خط روشو و واضح نویشه کنید.”^۹

اوخته موسی و لاویای پیشوا قد پگ بنی اسرائیل گپ زده گفت: “آی بنی اسرائیل، آرام پشینید و گوش بگیرید. امروز شمو قوم خداوند، خدای خو شدید.^{۱۰} پس از آید خداوند، خدای خو شنید و احکام و قانونای ازو ره که ما امروز دز شمو امر مونم، د جای بیرید.”

نالت ها از کوه عیبال

د امزو روز موسی د مردم امر کده گفت:^{۱۱} ”وختیکه از دریای اردن تیر شدید، اینی طایفه ها د بله کوه چریم ایسته شنه تا مردم ره برکت بدهیه: شمعون، لاوی، یهودا،

یسّاکار، یوْسُف و بِنِیامِین. ^{۱۳} و اینی طایفه ها دَبَلِه کوه عیبال ایسته شُنَه تا نالَت کُنه: رئوبین، جاد، آشیر، زِبُولون، دان و نفتالی. ^{۱۴} و لاویا قد آوازِبلند دَتمام مَرداي إسرائیل اعلان کده بُگیه:

^{۱۵} نالَت دَكَسی که بُتِ تَراش شُدَه یا ریختَنَد شُدَه که دَنَظِر خُداوند نفرَت انگیز

آسته، دَوسِیله یگ بُتَتَراش جور کنه و دَیگ جای تاشه نِگاه کنه.

و پِگِ مردم دَجوابِ ازوا بُگیه، آمین!

^{۱۶} نالَت دَكَسی که دَآته و آبه خُو بَسِ احترامی کنه.

و پِگِ مردم بُگیه، آمین!

^{۱۷} نالَت دَكَسی که سنگِ ایشته پُلوان-شَرِیک خُو ره تغییر بِدیه.

و پِگِ مردم بُگیه، آمین!

^{۱۸} نالَت دَكَسی که آدم کور ره از راه دَبَسِ راهه بُبره.

و پِگِ مردم بُگیه، آمین!

^{۱۹} نالَت دَكَسی که بیگنه، یتیم و خاتونِ بیوه ره از انصاف محروم کنه.

و پِگِ مردم بُگیه، آمین!

^{۲۰} نالَت دَكَسی که قد خاتونِ آته خُو خاو کنه، چراکه دامونِ آته خُو ره بَسِ پَرَده کده.

و پِگِ مردم بُگیه، آمین!

^{٢١} نالَتْ دَ كَسِيْ كَهْ قَدْ يَكُوْ حَيْوانْ مَعَامِلِهْ جِنْسِيْ كَنهْ.

وْ پَكِ مرْدُمْ بُكِيْه، آمِينْ!

^{٢٢} نالَتْ دَ كَسِيْ كَهْ قَدْ خَوارْ خُو خَاوْ شُنْه، چَىْ دُخْتِرِ آتِهْ شِىْ بَشَه وْ چَىْ دُخْتِرِ آبِهْ

شِىْ.

وْ پَكِ مرْدُمْ بُكِيْه، آمِينْ!

^{٢٣} نالَتْ دَ كَسِيْ كَهْ قَدْ خُسْرِمَادِرْ خُو خَاوْ كَنهْ.

وْ پَكِ مرْدُمْ بُكِيْه، آمِينْ!

^{٢٤} نالَتْ دَ كَسِيْ كَهْ هَمْسَايِهْ خُو رَهْ تَاشَكِيْ بُكُشَه.

وْ پَكِ مرْدُمْ بُكِيْه، آمِينْ!

^{٢٥} نالَتْ دَ كَسِيْ كَهْ پَيْسِهِ بِكِيرَه وْ خُونِ يَكْ بِيْكُنَاهْ رَهْ بِرِيزَنَه.

وْ پَكِ مرْدُمْ بُكِيْه، آمِينْ!

^{٢٦} نالَتْ دَ كَسِيْ كَهْ دَ تُورَايِ امْزِيْ شَرِيعَتْ ثَابِتْ قَدْمَ نَمَنَه وْ امِيا رَهْ دَ جَايِ نَيَرَه.

وْ پَكِ مرْدُمْ بُكِيْه، آمِينْ!

بَرَكَتْ بَلَدِهِ إِطَاعَتْ كُنِنَدَهْ هَا

^{٢٨} ١ اگه توره های خُداوند، خُدای خُو ره دِقَتْ بِشَنَوِيد وْ پَكِ احْكَامِ اُزو ره که ما
امروز دَزْ شُمُو اَمْرِ مُونُمْ نِكَاه کده دَ جَايِ بِيرِيد، اوخته خُداوند، خُدای شُمُو، شُمُو ره از

تمامِ مِلَّت های زمی کده بِلندر قرار میدیه.^۲ اَرَى، اگه از آیدِ خداوند، خُدای خو شُنید،

پِگِ امزی برکت ها دَز شُمو مِیرَسَه و قد شُمو مُونَه،

شُمو دَ شار برکت یافته مُوشِید و دَ صحراء برکت یافته مُوشِید.^۳

ثَمِير رَحْم شُمو، حاصلِ زمین شُمو و ثَمِير چارپایای شُمو یعنی گوسله های گاو های شُمو و
باره‌گونِ رمه شُمو برکت یافته مُوشَه.^۴

سَبَد و تَشتِ خمیر شُمو برکت یافته مُوشَه.^۵

وختیکه خانه میید برکت مینگرید و غَیتیکه بُرو مورید برکت مینگرید.^۶

خُداوند دشمنای شُمو ره که دَ خلاف شُمو باله شُنه دَ پیش شُمو شِکست میدیه؛ اونا از
یگ راه دَ خلاف شُمو مییه و از هفت راه از پیش شُمو دُوتا مُونه.

خُداوند دَ دی خانه های شُمو برکت میدیه و دَ هر کاری که دِست خُو ره دراز کنید، و شُمو
ره دَ سرزمینی که خُداوند، خُدای شُمو دَز شُمو میدیه، صاحبِ برکت مُونه.

اگه احکامِ خُداوند، خُدای خُو ره دَ جای بیرید و مُطابقِ راه ها-و-طريق های ازو رفتار
کنید، خُداوند شُمو ره دَ عنوانِ قَوْم مُقدَّس خُو آباد مُونه، امُورِ رقم که دَز شُمو قَسم خورده.^۹

اوخته پگِ قوم های زمی مینگره که شمو د نامِ قوم خداوند کوی مُوشید و اونا از شمو ترس مُخوره.^{۱۱} خداوند خوب پریمونی نصیب شمو مونه. آر، خداوند د ثمر رَحْم شمو، د ثمر چارپایای شمو و د حاصلِ زمین شمو د سرزمینی که خداوند د بابه‌کلونای شمو قسم خورد که دز شمو مُوبخش، برکت میدیه.^{۱۲} خداوند خزانه خوبی خو یعنی آسمو ره بله دست شمو برکت بدهیه. شمو د ملّت های کلو قرض میدید، لیکن خودون شمو هیچ قرض نمیگیرید.^{۱۳} خداوند شمو ره سر جور مونه، نه دم، شمو همیشه د جایگاه بلند قرار میداشته بشید، نه د تاه، د شرطی که احکام خداوند، خدای خو ره که ما امروز دز شمو امر مونم بشنوید و اونا ره د دقت نگاه کده د جای بیرید^{۱۴} و از پگِ تورای که ما امروز دز شمو امر مونم طرف راست یا چپ تاو نخورید که بورید از خدایون بیگنه پیروی کده اونا ره خدمت کنید.

نالَت بَلَدِه نَا إِطَاعَتِي

لیکن اگه از آید خداوند، خدای خو نشنبید و پگِ احکام و قانونای شی ره که ما امروز دز شمو امر مونم د دقت د جای نیرید، اوخته اینی نالَت ها پگ شی د بله شمو مییه و شمو ره گرفتار خو مونه:^{۱۵}

شمو د شار نالَت مُوشید و د صحراء نالَت مُوشید.^{۱۶}

سَبَد و تَشْتِ خَمِير شُمُو نَالَت مُوشَه.

ثَمَر رَحْم شُمُو، حَاصِل زَمِين شُمُو، گَوَسَلَه هَائِي گَلَه و بَارَه گُونِ رَمِه شُمُو نَالَت مُوشَه.

و خَتِيَّكَه خَانَه مَيِيد نَالَت مُوشَيد و غَيْتِيَّكَه بُرُو مُورِيد نَالَت مُوشَيد.

دَهْ كَارِي كَه دِست خُو رَه دِراز كُنِيد تَا اوْ رَه انجام بِدِيد، خُداوند دَبَلَه شُمُو نَالَت، پَريشانِي و سَرْزِنَش رَبِي مُونَه تَا دَرُودِي نَابُود شُدَه از بَيْن بُورِيد، فَقَط بِخاطِرِ شَرَارَتِ اعْمَال خُو كَه دَوسِيلَه ازوا اوْ رَه ايلَه كَديَد.^{۲۱} خُداوند مَرَضِ وُبا رَه دَبَلَه شُمُو مَيِيرَه تَا شُمُو رَه از سَرْزِمِينِي كَه بَلَدِه تَصَرُّف كَدون شَى دَاخِل مُوشَيد، نَابُود كَنه.^{۲۲} خُداوند شُمُو رَه قد مَرَضِ كُشِنَده، تَاو و آماَس و قد گَرمِي سوزان، شَمشِير، خُشكَسالِي و آفت مِيزَنه. اميَا شُمُو رَه تَا وختِي دُمبَال مُونَه كَه از بَيْن بُورِيد.^{۲۳} آسمَو دَبَلَه سَر شُمُو رقم بِرونَز مُوشَه و زَمِينِي كَه تَيَّي پَاي شُمُو يَه، رقم آپِن.^{۲۴} خُداوند بارِشِ سَرْزِمِين شُمُو رَه دَگَرَد و خَاك تَبَدِيل مُونَه و گَرَد و خَاك از آسمَو دَبَلَه شُمُو مُوبَارَه تَا غَيْتِيَّكَه شُمُو نَابُود شُنِيد.

خُداوند شُمُو رَه دَپِيشِ دُشمنَى شُمُو شِكَسَت مِيدِيه. شُمُو از يَك رَاه دَخِلَافِ ازوا مُورِيد و از هَفَت رَاه از پَيشِ ازوا دُوتَا مُونِيد. شُمُو بَلَدِه تمامِ مَملَكت هَائِي زَمِي ماِيه وَحَشَت مُوشَيد.^{۲۶} جَسَدَاي شُمُو خَوراَكِ تمامِ مُرغَكَوي هَوا و جَانَورَاي زَمِي مُوشَه و هَيْجَ كَس وجُود نَمِيدَشَتَه بَشه كَه اُونَا رَه هَيَ كَنه.^{۲۷} خُداوند شُمُو رَه دَدانَه هَائِي بِيخَكِله مصر،

دَ مَرَضِ جَلَى، دَ دَانَهُ هَاهِي رِيمَتُو وَ خَرِشْتَى مُبْتَلا مُونَه كَه شُمُو ازَوا شَفَا پَيَدا نَمِيتَنَيد.

^{٢٩} خُداوند شُمُو ره دَ دِيونَگَى، كورى و پريشانى فِكَر دُچار مُونَه. شُمُو دَ چاشَتِ روز

تَپَتَويَلَه مُونَيد رقمى كَه كور دَ تَرِيكى تَپَتَويَلَه مُونَه، و شُمُو دَ پَيَدا كَدونِ راه هَاهِي خُو

كامِياب نَمُوشِيد، بَلَكِه دَ تمامِ روزَاي زِندَگَى شُمُو دَ بَلَه شُمُو ظَلَم مُوشَه و شُمُو چُور-و-

^{٣٠} چَپَاوُل مُوشِيد و هِيجَ كَس شُمُو ره نِجَات نَمِيدِيه. شُمُو قد يَكْ خاَتو نامِزاد نَمُوشِيد،

ليِكِن دِيِّگَه كَس قد اَزُو خاو مُونَه. شُمُو خانَه آباد مُونَيد، مَكَم دَرَشَى زِندَگَى نَمُونَيد. شُمُو

^{٣١} باَغِ انْكُور جور مُونَيد، ولَى از مِيوه شَى نَمِيقَشِيد. گَاو شُمُو دَ پَيَشِ چِيمَى شُمُو

قصابَى مُوشَه، ليِكِن شُمُو از گَوشت شَى نَمُوخُورِيد. خَر شُمُو دَ پَيَشِ چِيمَى شُمُو بُرَدَه

مُوشَه و او ره پَس گِرفته نَمِيتَنَيد. گَوسِپُون شُمُو دَ دُشمُون شُمُو دَدَه مُوشَه و هِيجَ كَس دَ

^{٣٢} داد شُمُو نَمِيرَسَه. باَچَه هَاهِ و دُخْتَرُون شُمُو دَ دِيِّگَه قَوم دَدَه مُوشَه دَ حَالِيكَه چِيمَى شُمُو

تَوَخ مُونَه؛ شُمُو تمامِ روز چِيمَ دَ راهِ ازَوا شِيشَتَه چِيمَى خُو ره خِيرَه مُونَيد و هِيجَ چِيزَ از

^{٣٣} دِست شُمُو نَمِيه. حَاصِل زَمِين شُمُو و تمامِ زَحْمَت شُمُو ره قَومَى مُوخُورَه كَه هِيجَ

نَمِينَخَشِيد؛ هَمِيشَه دَ بَلَه شُمُو ظَلَم مُوشَه و شُمُو كُفتَه مُوشِيد. و بَخاطِرِ چِيزَى كَه چِيمَ

^{٣٤} شُمُو مِينَگَرَه، شُمُو دِيونَه مُوشِيد. خُداوند دَ زَانُو هَاهِ و دِلَكَ هَاهِي پَاي شُمُو دَانَه هَاهِ

بيَخِ كَيِه دَرَدَناَك بُرَ مُونَه كَه از قَفِ پَاي تا تولَغَه شُمُو ره مِيِّكَيرَه و ازَوا شَفَا پَيَدا نَمِيتَنَيد.

^{٣٥} خُداوند شُمُو و پادشاه شُمُو ره كَه دَ بَلَه خُو مُقرَر مُونَيد، دَ پَيَشِ مِلتَى مُويرَه كَه نَه شُمُو

مِينَخَشِيد و نَه بَابَه كَلُونَاي شُمُو مِيشَنَخت؛ دَ أُونجَى شُمُو خُدايون بَيِّكَه ره كَه از چِيو و

سنگ جور شده، خدمت مونید.^{۳۷} شمو د مينکل پگ قوم های که خداوند شمو ره د
اونجی موبره، ماپه وحشت، يگ مثال و کنایه جور موشید.

شمو تخم کلو د زمین خو موبried، مگم حاصل کم جم مونید، چراکه ملخ ها او ره
موخوره.^{۳۸} شمو باع های انگور جور کده خدمت ازوا ره مونید، ليکن شراب شی ره وچی
نمونید و انگور شی ره نميچينيد، چراکه اونا ره كرم موخوره.^{۳۹} شمو د تمام سرزمين خو
درختاي زيتون ميدشته بشيد، ليکن خود ره قد روغو چرب نمونيد، چراکه زيتون شمو خام
ميظكه.^{۴۰} شمو صاحب باچه ها و دخترو موشيد، مگم اونا دز شمو نمونه، چراکه اونا د
اسيرى بردہ موشه.^{۴۱} پگ درختا و حاصلات زمین شمو ره ملخ ميگيره.^{۴۲} بيگنه های که
د مينکل شمو زندگی مونه، از شمو کده باله شده موره، د حالیکه شمو تاه آمدہ موried.
اونا دز شمو قرض ميديه، مگم شمو دزوا قرض نميديد.^{۴۳} اونا سر جور موشه و شمو دم.^{۴۴}

پگ امزى نالٰت ها د بله شمو مبيه و شمو ره دمبال کده گرفتار خو مونه تا غيتيكه
نابود شنيد، چراکه شمو از آيد خداوند، خدای خو نشديد و احکام و دستوراي ره که دز
شمو امر کد، د جای نورديد.^{۴۵} امي نالٰت ها بلده از شمو و اولاده شمو تا آبد د عنوان يگ
نشانى و چيز عجیب وجود ميدشته بشه.^{۴۶} اзи که شمو خداوند، خدای خو ره قد
خوشحالی و خوشی دل بخاطر پريمونی پگ چيزا خدمت نکدید،^{۴۷} شمو دشمنای خو ره که
خداوند د ضد شمو رئي موكنه خدمت مونید، د حالیکه گشنه، تشنه، لچ و محتاج هر چيز

آستَيید. و خُداوند يُوغِ آینی ره دَ بَلِه گَردون شُمو ميله تا شُمو ره نابُود كنه.

٤٩ خُداوند از دُور، از آخِر زمی يگ مِلت ره که رقم بُرگج الی ېلند پَرواز أسته دَ بَلِه شُمو میره، مِلتى ره که شُمو زِيون شى ره پَى نَموفتید،^{٥٠} مِلتى ره که چهِره ترسناك دَر، اُونا نَه دَ رِيش سفيدای شُمو احترام مُونه و نَه دَ جوانای شُمو رَحم.^{٥١} اُونا چُوچه های چارپایاى شُمو و حاصلِ زمِين شُمو ره مُوخوره تا غَيْتِيکه شُمو نابُود شُنید. اُونا بَلِده شُمو غَله، شِيره انگور، روغونِ زَيتون، گوسله های گَله و بارهگونِ رمه ره باقى نَمبله تا وختِيکه شُمو از بَيَن بورِيد.^{٥٢} اُونا شُمو ره دَ تمامِ شاراي شُمو محاصره مُونه تا ديوالاي ېلند و مُسَتَّحکمی که شُمو تَوْكُل خُو ره دَزوا کدید دَ پَگ سرزِمِين شُمو چَپه شُنَه. آرَه، اُونا شُمو ره دَ تمامِ سرزِمِينی که خُداوند، خُدای شُمو دَز شُمو مِيدیه، محاصره مُونه.^{٥٣} بخاطرِ محاصره و سختی که دُشمنای شُمو دَ بَلِه شُمو میره شُمو ثَمِر رَحم خُو، يعني گوشتِ باچه ها و دُخترون خُو ره که خُداوند، خُدای شُمو دَز شُمو مِيدیه، مُوخورِيد.^{٥٤} حتَّى بادیانَتَرِين و مِهرِبانَتَرِين مَرَد که دَ مینكل شُمو بَشه، دَ بِرار خُو، دَ خاتُون خُو که دَ بَغل شى أسته و دَ بچِكيچاي خُو که باقى مُومَنه، نظرِ بد مِيدَشته بَشه،^{٥٥} دَ اندازِه که دَ هِيج كُدم ازوا از گوشتِ بچِكيچاي خُو که مُوخوره، نَمِيدِيه، چُون دَ وختِ محاصره و سختی که دُشمنای شُمو دَ تمامِ شاراي شُمو دَ بَلِه شُمو میره، هِيج چِيز بَلِده اُزو باقى نَمُومَنه.^{٥٦} خاتُونی که نازُكَتَرِين و نازدانهَتَرِين خاتُون دَ مینكل شُمو أسته و بخاطرِ نازُكَي و نازدانهَگي جُرات نَمُونه که قفِ پاي خُو ره دَ زمِي بيله، دَ شُوي خُو که دَ بَغل شى أسته و دَ باچه و دُختر خُو

نظر بَد مِيدَشته بَشه؛^{۵۷} او جو رِه نِلغه ره که از مِينَكلِ پای های شی بُر مُوشه و نِلغه ره که مِيزَيه، تاشَكى مُوخوره، چراکه دَ وختِ محاصره و سختی که دُشمنای شُمو دَ شاراي شُمو دَ بَلَه شُمو ميره، هيچ چِيزِ دِيگه پَيدا نَمُوشه.

اگه تمامِ توراي امزى شريعت ره که دَ امزى کتاب نوشتنه شُده، دَ دِقت دَ جاي نَيرِيد و امزى نامِ پُرجلال و باهِيَت، يعني از خُداوند، خُدائِ خُو ترس نَخورِيد،^{۵۹} او خته خُداوند دَ بَلَه از شُمو و دَ بَلَه اولادِ شُمو بَلاهای عَجِيب ميره، بَلاهای سخت و دَوامدار و مَرض های خطرناک و بَسِ عِلاج.^{۶۰} او پَگِ مَرض های مصر ره که ازوا مِيتَرسِيدِيد بسم ميره تا دَ بَلَه از شُمو بييه و دُچار شُمو شُنه.^{۶۱} امچنان پَگِ ناجوري ها و تمامِ بَلاهای که دَ امزى کتابِ شريعت نوشتنه شُدد، خُداوند اُونا ره دَ بَلَه شُمو ميره تا غَيْتِيكه شُمو نابُود شُنيد.^{۶۲} شُمو که يَگ زمان رقمِ سِتاره های آسمو کَلو بُودِيد، فقط يَگِ تعدادِ کَم شُمو باقی مُومَنه، چراکه شُمو از آيدِ خُداوند، خُدائِ خُو نَشُدِيد.^{۶۳} امُو رقم که خُداوند از خُوبی کدو دَ حق شُمو و از کَلو کدونِ تعداد شُمو خوش شُد، امُو رقم از نابُود کدو و از بَين بُردون شُمو ام خوش مُوشه؛ و شُمو از سرزِميَنى که دَز شى داخل مُوشِيد تا او ره تَصْرُف کِيند، رِيشه-کَن مُوشِيد.

و خُداوند شُمو ره دَ مِينَكلِ پَگِ مِلت ها دَ سر تا سِر زمى تِيتپَرك مُونه و دَ اونجى شُمو خُدايونِ بِيگَنه ره که از چيو و سنگ جور شُده، خِدمت مُونيد، خُدايونى ره که نَه

شُمو مِيشنَختيَد و نَه بابه کَلوناي شُمو. ^{٦٥} دَ مِينَكِلِ امْزُو مِلَّت ها شُمو آسُودَگى ره

شُمو دِلِ لَرزو، چِيمَى خِيره و روحِ پژمُرده مِيدِيه. ^{٦٦} زِندَگى شُمو رقمِ قفِ سِر آو مُوشَه؛

شاو و روز ره دَ ترس-و-وحَشَت تير مُونَيد و دَ زِندَگى خُو هيچ اعتبار نَمِيدَشته بشِيد. ^{٦٧} دَ

وختِ صُبح مُوكِيد: 'كشِكه شام مُوبُود،' وَ غَيَّتِ شام مُوكِيد: 'كشِكه صُبح مُوبُود،'

بخاطِرِ ترسى كه دَ دِلِ خُو احساس مُونَيد و بخاطِرِ چِيزَاي كه چِيمَى شُمو مِينَگره.

^{٦٨} خُداوند شُمو ره قد كِشتى ها امْزُو راه كه دَز شُمو گُفتُم دِيگه نَمِينَگَريَد بَسَم دَ مصر

مُوبَره؛ وَ أونجَى شُمو خودون خُوره دَ دُشمناي خُو دَ عنوانِ غُلام و كَنيز سَودا مُونَيد،

"ليكن هيچ خَریدار پَيَدا نَمُوشَه."

خُداوند عَهد خُو ره قد إِسرائِيل تازه مُونَه

۲۹ ^١ اي توره های عهدي آسته كه خُداوند دَ سرزمِينِ موآب دَ مُوسَى امر كد تا قد بنَى إِسرائِيل بسته كنه، جدا از عهدي كه او قد ازوا دَ حوریب بسته كد.

^٢ پس مُوسَى پَكِ بنَى إِسرائِيل ره كُوي كد و دَزوا گَفت: "شُمو پَكِ چِيزَاي ره كه خُداوند دَ پیشِ چِيمَى شُمو دَ سرزمِينِ مصر دَ حقِ فِرعَون، پَكِ خدمتگاراي شى و تمامِ سرزمِين شى كد، دِيدِيد. ^٣ آئَ، چِيمَى شُمو مُصِيبَت هاي بُزرگ، مُعجزه ها و چِيزَاي عَجِيب

بُزْرگ ره دید. ^۴ مگم تا امروز خُداوند دَز شُمو دِلی که دانا بَشه، چیمای که بینا بَشه و گوشای که شِنوا بَشه نَدده. ^۵ مُدَتِ چِل سال ما شُمو ره دَ بیابو رهبری کُدم؛ دَ امزی مُدَت نَه کالای شُمو شارِب و نَه کَوشره های شُمو کَنده شُد، ^۶ شُمو نَه نان خورِدید و نَه شراب انگور یا شرابِ قَوی وُچی کدید، بَلکه هر چِیز ره که خُداوند مُهیا کد خورِدید، تا بَدَنید که خُداوند، خُدای شُمو آسته.

و غَيْتیکه دَ اینجی رَسِیدید، سِیحون پادشاهِ حِشبون و عوج پادشاهِ باشان دَ خِلاف مو بُر شُده آمد تا قد ازمو جنگ کنه، مگم مو اُونا ره شِکست دَدی ^۷ و سرزمِین ازوا ره گِرفته دَ رئوبینیا، جادیا و نِیم طایفه مَنَسَّی دَ عنوانِ مُلکیت دَدی. ^۸ پس تورای امزی عهد ره دَ دِقت دَ جای بیِرید تا هر کاری ره که انجام بَدید کامیاب شُنید.

امروز پَگ شُمو دَ حُضُورِ خُداوند، خُدای خُو ایسته شُدید؛ رهبرای طایفه های شُمو، ^۹ ریش سفیدای شُمو، کله کلونای شُمو، پَگ مردای اسرائیل، ^{۱۰} بچکیچای شُمو، خاتونوی شُمو، بیگنه های که دَ خَیمه‌گاهِ شُمو آسته، از چیو مَیده‌گرای شُمو گِرفته تا آو کشای شُمو. ^{۱۱} شُمو حاضر شُدید تا دَ عهدِ خُداوند، خُدای خُو و قَسمِ خُداوند، خُدای خُو که امروز قد شُمو بسته مُونه شامل شُنید ^{۱۲} و تاکه خُداوند امروز شُمو ره دَ عنوانِ قوم خُو برقرار کُنه و خُدای شُمو بَشه، امُو رقم که دَز شُمو وعده دَد و دَ بابه کلونای شُمو ابراهیم و اسحاق و یعقوب قَسم خورد. ^{۱۳} ما ای عهد و قَسم ره تنها قد شُمو بسته نَمُونم، ^{۱۴} قد

شُمو که امروز دَ اینجی قد ازمو دَ حُضورِ خُداوند، خُدای مو حاضر آستَید، بَلکِه قد نسل
های آینده که امروز قد ازمو دَ اینجی نییه ام بسته مُونم؛^{۱۶} -- دَ ياد شُمو بَشه که مو دَ
سرزمینِ مصر چی رقْم زِندگی مُوكدی و چُطُور از مینکلِ مِلت ها تیر شُده دَ اینجی آمدی
^{۱۷} و شُمو چیزای نفرات انگیز امزی مِلت ها ره دیدید، بُت های پلید ره که از چیو و سنگ و
از نُقره و طِلا جور شُدد و دَ مینکلِ ازوا وجود داشت --^{۱۸} باخبر بشِید که امروز دَ مینکل
شُمو کُدم مرد یا خاتُو، کُدم اولادِ بابه یا طایفه نَبَشه که دل شی از خُداوند، خُدای مو
پُگرده و رفته خُدایون امزُو مِلت ها ره عِبادت کنه. نَشنه دَ مینکل شُمو ریشه بَشه که
^{۱۹} میوه تَلخ و زاردار بِدیه. ای رقم نفر وختیکه تورای امزی عهد-و-قسم ره بِشنو، او دَ
دل خُو خود ره اطمینان دَده مُوگیه: 'اگرچه دَ مُطابِقِ سنگدلی خُو رفتار مُونم، ما سلامت
مُومنُم،' او باعث مُوشہ که تَر و خُشك یگجای دَر بِگیره.^{۲۰} خُداوند راضی نَمُوشہ که او
ره بُخشش، بَلکِه آتش قار و غیرتِ خُداوند دَ ضد امزُو نفر داغ مُوشہ و پگِ نالَت های که
دَ امزی کتاب نویشته شُده، دَ بَله ازو مییه و خُداوند نام ازو ره از تَی آسمو گُل مُونه.^{۲۱}
خُداوند او ره از پگِ طایفه های اسرائیل جدا مُونه تا مُطابِقِ پگِ نالَت های عهدی که دَ
امزی کتابِ شریعت نویشته شُده دَزُو بَدی بِرسنه.^{۲۲} نسل های آینده یعنی اولادی شُمو که
بعد از شُمو مییه و بیگنه های که از سرزمینای دور مییه، اونا مُصیبَتِ امزی سرزمی و
مریضی های ره که خُداوند دَ بَله ازی اورده مینگره.^{۲۳} اونا مینگره که تمام زمینای شی
دَ وسیله گوگرد و شوره دَر گرفته، دَز شی هیچ چیز کشت نَمُوشہ و هیچ چیز نَمُورویه و
هیچ علف سُوز نَمُونه و حالت شی رقم خَرابی سَدوم و عمُوره و آدمه و صَبوئیم شُده که

خُداوند دَ غَيْتِ قار و غَضَب خُو اُونا ره سرنگون کد. ^{۲۴} اوخته پگِ مِلَّت ها پُرسان مُونه:

‘چرا خُداوند قد امزی سرزمی ای کار ره کده و شِدَّتِ قارِ کلون شی از چی خاطر بُوده؟’

پس دَزوا گُفته مُوشه: ‘ای امزی خاطرِ شُده که اُونا عهِد خُداوند، خُدای بابه کلونای خُو

ره که اُو دَ غَيْتِ بُرو اُوردون ازوا از سرزمینِ مصر قد ازوا بسته کُدد، مَیده کد ^{۲۶} و رفته

خُدایونِ بیگنه ره عِبادت کد و اُونا ره سَجده کد، خُدایونی ره که اُونا نَمِيشَنَخت و خُداوند

عِبادتِ ازوا ره مَنع کُدد. ^{۲۷} پس آتشِ قارِ خُداوند دَ خلافِ امزی سرزمی داغ شُد و تمامِ

نالَّت های ره که دَ امزی کِتاب نوشتے شُده، دَ بَلَه شی اُورد. ^{۲۸} خُداوند اُونا ره قد قار و

خَشم و غَضَبِ بُزرگ از سرزمینِ ازوا رِیشه کن کد و دَ سرزمینِ دِیگه پورته کد، امُورِ رقم

که اِمروز آسته.’

چیزای تاشه دَ خُداوند، خُدای مو تعلق دَره، لیکن چیزای که بَرَمَلا آسته، تا آبَد دَز مو و
اولاًدای مو تعلق دَره، تا پگِ تورای امزی شریعت ره دَ جای بَیری.

نتیجه پس آمَد و سُون خُدا

٣٠ وختیکه پگِ امزی چیزا، یعنی برکت ها و نالَّت های که دَ پیش شُمو ایشتم دَ بَلَه
شُمو آمد و شُمو امیا ره دَ مینکلِ پگِ مِلَّت های که خُداوند، خُدای شُمو، شُمو ره دَ
اونجی هی مُونه، دَ یاد اُوردید ^۲ و سُون خُداوند، خُدای خُو پس آمَدید و از آید شی شُدید و

تمامِ چیزای ره که ما امروز دَز شُمو امر مُونم، شُمو و بچکیچای شُمو قد تمامِ دِل و تمامِ
جان خُو دَ جای آور دید، ^۳ اوخته خُداوند، خُدای شُمو خوشبختی های شُمو ره پس میره و دَ
بَلِه شُمو رَحْم کده شُمو ره از مینکلِ پَگِ قَوم های که خُداوند، خُدای شُمو، شُمو ره دَ
اونجی تیتپَرَک کده، پس جم مُونه. ^۴ حتی اگه شُمو تا آخرِ زمی ام آواره شُده بشید،
خُداوند، خُدای شُمو، امزونجی ام شُمو ره جم مُونه و پس میره. ^۵ و خُداوند، خُدای شُمو،
شُمو ره دَ سرزمینی که دَ بابه کلونای شُمو تعلق داشت پس میره و شُمو صاحبِ ازو مُوشید؛
او دَ حق شُمو خُوبی مُونه و تعداد شُمو ره از بابه کلونای شُمو کده کلوتر مُوکنه. ^۶ علاوه
ازی، خُداوند، خُدای شُمو دِل از شُمو و دِل بچکیچای شُمو ره ختنه مُونه تا خُداوند، خُدای
خُو ره قد تمامِ دِل و تمامِ جان خُو دوست داشته بشید و زِنده بُمنید. ^۷ خُداوند، خُدای شُمو
پَگِ امزی نالت ها ره دَ بَلِه دُشمنا و مُخالفای شُمو که شُمو ره آزار-و-اذیت کد میره.
اوخته شُمو بسم از آید خُداوند مُوشید و پَگِ احکامِ ازو ره که ما امروز دَز شُمو امر ^۸
مُونم، دَ جای میرید ^۹ و خُداوند، خُدای شُمو، شُمو ره دَ پَگِ کارای دِست شُمو کامیاب
مُونه و دَ ثَمِرِ رَحْم شُمو، دَ ثَمِرِ چارپایای شُمو و دَ حاصلاتِ زمین شُمو برکت میدیه، چون
خُداوند از کامیاب کدون شُمو بسم خوشحال مُوشه، امُو رقم که از کامیاب کدون
بابه کلونای شُمو خوشحال شُد، ^{۱۰} دَ شرطی که از آید خُداوند، خُدای خُو شُنید و احکام و
دستورای شی ره که دَ امزی کتابِ شریعت نوشتہ شُده، دَ جای بیرون و قد تمامِ دِل و تمامِ
جان سُون خُداوند، خُدای خُو پس بیید.

إِنْتِخَابِ زِنْدَگَى يَا مَرَگ

۱۱ امی حکم ره که ما یمروز دز شُمو امر مُونم، بَلَدِه شُمو کَلو مُشَكِّل نِيَسته و از دِسْتَرس شُمو ام دُور نِيَيه.^{۱۲} ای دَ عَالَم باله نِيَسته که بُكِيد: کَيِ بَلَدِه ازمو دَ عَالَم باله موره و او ره بَلَدِه ازمو میره تاکه مو بِشَنَوی و دَ جَای بِيرَى؟^{۱۳} دَ او طرفِ دریا ام نِيَسته که بُكِيد: کَيِ بَلَدِه ازمو دَ او طرفِ دریا تیر مُوشَه و او ره بَلَدِه ازمو میره تاکه مو بِشَنَوی و دَ جَای بِيرَى؟^{۱۴} بَلَكِه ای کلام غَدر دَ نَزَدِيک شُمو آسته؛ دَ دان شُمو و دَ دِل شُمو، تا ای ره دَ جَای بِيرَىد.

۱۵ اينه، ما یمروز ام زِنْدَگَى و کاميابى ره دَ پیشِ رُوي شُمو ايشتُم و ام مَرَگ و تباھي ره.
۱۶ چون ما یمروز دز شُمو امر مُونم که خُداوند، خُدای خُو ره دوست داشته بشِيد، دَ مُطابِق راه ها-و-طريق هاي ازو رفتار کُنِيد و احکام، قانُونا و دستُوراي ازو ره دَ جَای بِيرَىد تا زِنْده بُمنِيد و تعداد شُمو کَلو شُنه و تا خُداوند، خُدای شُمو، شُمو ره دَ سرزِمِيني که بَلَدِه تَصَرُّف کدون شى دَزُو داخِل مُوشِيد، بَرَكَت بِدِيه.^{۱۷} ليکِن اگه دِل شُمو از راه بُر شُنه و از آيد نَشَنِيد و گُمراه شُده خُدايونِ بِيَگَنه ره سَجَدَه و عِبَادَت کُنِيد،^{۱۸} یمروز دز شُمو اعلان مُونم که شُمو حتماً از بَيَن مورِيد و دَ سرزِمِيني که بَلَدِه تَصَرُّف کدون شى از دریاى اُرْدُن تیر شُده داخِل مُوشِيد، عُمرِ دراز نَمِيدَشته بشِيد.^{۱۹} یمروز آسمو و زمى ره دَ بَلَه شُمو شاهد مِيگِيرُم که ما زِنْدَگَى و مَرَگ ره دَ پیشِ رُوي شُمو ايشتيم و بَرَكَت و نَالَت ره. پس زِنْدَگَى

ره اِنتِخاب کُنید تا شُمو و اَولادِه شُمو زِنده بُمَنِيد. ^{٢٠} آرَه، خُداوند، خُدای خُوره دوست دَشته بَشِيد، از آيد شی شُنِيد و دَزو مَحْكَم بِچَسِيد، چراکه او زِندگی و درازی عمر شُمو آسته، تا دَ سرزِمینی که خُداوند بَلَدِه بابه کَلونای شُمو، إبراهِيم و إسحاق و يعقوب قَسَم خورد که او ره دَزوا مِيديه، جای-دَ-جای شُنِيد. ”

خُدا بَلَدِه يوشِع وظِيفه مِيديه

^{٣١} مُوسَى اِدامه دَده اينى تورا ره دَپَگِ قَومِ إِسرائِيل بِيان کد ^٢ و دَزوا گُفت: ”ما آلی گ صد و بِيَسَت ساله أَسْتُم و دِيگَه تَوانِ بُرُّ-و-دَر شُدو ره نَدْرُم و خُداوند ام دَز مه گُفته که، ”تو امزى دریای اُردُن تير نَمُوشى. ^٣ خُداوند، خُدای شُمو خود شی پيش پيش شُمو از دریای اُردُن تير مُوشه و او امى مِلت ها ره از پيش رُوي شُمو نابُود مُونه تا سرزِمین ازوا ره تَصَرُّف کُنید. يوشِع ام پيش پيش شُمو از دریای اُردُن تير مُوشه، اُمو رقم که خُداوند گُفته. ^٤ خُداوند دَ حقِ ازوا اُمو کار ره مُونه که دَ حقِ سِيَحُون و عوج پادشايونِ أموريَا و دَ حقِ سرزِمین ازوا کد وختيکه اُونا ره نابُود کد. ^٥ خُداوند اُونا ره دَ دِست شُمو تسلِيم مُونه و شُمو قد ازوا دَ مُطابِق تمام حُكمی که ما دَز شُمو امر کُدم رفتار کُنید. ^٦ قَوی و دليل بَشِيد؛ ازوا ترس نَخورِيد و وَحْشَت نَكُنِيد، چراکه خُداوند، خُدای شُمو خود شی قد شُمو موره؛ او شُمو ره تنها نَمِيله و شُمو ره ايله نَمِيديه. ”

اوخته مُوسىٰ یوشِع ره کُوي کد و دَ پیشِ نظرِ پگِ قومِ اسرائیل دَزُو گفت: ”قوی و دلیر بش، چراکه تُو قد امزي قوم دَ سرزمینی موری که خُداوند دَ بابه کلونای ازیا قسم خورد که دَزیا میدیه؛ و تُو او ره دَ عنوانِ مُلکیت بلده امزیا میدی. ^{۱۰} خُداوند خود شی پیش پیش تُو موره و قد تُو آسته؛ او تُو ره تنها نمیله و تُو ره ایله نمیدیه. پس ترس نخور و وحشت زده ”^{۱۱} بش.

اوخته مُوسىٰ امی شریعت ره نوشتہ کده دَ پیشوایو، یعنی دَ اولاًدِ لاوی که مسئول بُردونِ صندوقِ عهدِ خُداوند بُود و دَ پگِ ریش سفیدای قومِ اسرائیل دَد. ^{۱۰} و مُوسىٰ دزوا امر کده گفت: ”دَ آخرِ هر هفت سال، دَ سالِ بخشیدونِ قرض ها که تعیین شده، دَ غیتِ عیدِ چپری ها، ^{۱۱} وختیکه پگِ قومِ اسرائیل دَ حضورِ خُداوند، خُدای شُمو دَ جایی که او انتخاب مُونه حاضر مُوشه، شُمو باید ای شریعت ره دَ پیشِ تمامِ قومِ اسرائیل بخانید تا دَ گوشِ ازوا برَسه. ^{۱۲} قوم ره یعنی مردا، خاتونو، بچکیچا و بیگنه های ره که دَ شارای شُمو زندگی مُونه جم کنید تا اونا بِشنوه و یاد بِگیره که از خُداوند، خُدای شُمو بترسه و تمامِ تورای امزي شریعت ره دَ دقت دَ جای بیره ^{۱۳} و تا بچکیچای ازوا که امی شریعت ره نمیدانه، ام بِشنوه و یاد بِگیره تا بلده تمامِ عمر خُو دَ سرزمینی که شُمو بلده تصرف کدون شی از دریای اردن تیر مُوشید و دَ اونجی زندگی مُونید از خُداوند، خُدای شُمو بترسه.“

^{۱۴} خُداوند دَ مُوسىٰ گفت: ”اینه، وختِ مُردون تُو نزدیک آسته؛ یوشِع ره کُوي کُو و دَ

خَيْمَه مُلَاقَات حَاضِر شُنِيد تَأْوِي رَه وَظِيفَه بِدِيمُ. ”پَس مُوسَى وَيُوشِعْ أَمَدَه دَخَيْمَه مُلَاقَات حَاضِر شُنِيد. ^{١٥} اَوْختَه خُداونَد دَسْتُونِ آُور دَخَيْمَه ظَاهِر شُنِيد وَسْتُونِ آُور دَدْرَكَه خَيْمَه اِيْسَتَه وَخُداونَد دَمُوسَى گُفت: ”دَزُودَى تُوفَوت كَدَه قَد بَابَه كَلُونَى خُويَّجَاهِي مُوشِى. بَعْد اَزُو اِيْ قَوم بَالَه شُنِيد از خُدايونِ بِيَكِنَه پَيَّروِي مُونَه، از خُدايونِ اَمْزُو سَرْزَمَى كَه اُونَا دَأُونَجَى دَمِينَكِل اِزوا دَاخِل مُوشَه؛ قَد اَمْزَى كَار اُونَا خَود رَه فَاحِشَه جَوْر مُونَه؛ اُونَا مَرَه اِيلَه مُونَه وَعَهْدَى رَه كَه قَد اِزوا بَسْتَه كَدِيم، مَيَّدَه مُونَه. ^{١٦} دَامْزُو رَوز آتِيشِ قَار مَه دَبَلَه اِزوا دَاغ مُوشَه وَما اُونَا رَه اِيلَه مُونَم وَرُؤَى خُورَه اِزوا تَاشَه مُونَم؛ اُونَا نَابُود مُوشَه وَمُصِيبَتَه وَمُشَكِّلَاتِ كَلو دَبَلَه اِزوا مَيَّيَه، دَانْدَازَه كَه اُونَا دَامْزُو رَوز مُوَگِيه؛ ^{١٧} اِيَا اَمِي مُصِيبَتَه اَمْزَى خَاطِر دَبَلَه موَنَمَه كَه خُدَى مو دَمِينَكِل مو نِيَسَتَه؟ ^{١٨} لِيَكِن دَامْزُو رَوز ما حَتَمًا رُؤَى خُورَه اِزوا تَاشَه مُونَم، بَخَاطِرِ پَكِ شَارَات-وَبَدَى كَه اُونَا كَدَه و بَخَاطِرِي كَه سُون خُدايونِ بِيَكِنَه رَفَته. ^{١٩} پَس آلَى اِي سُرُود رَه بَلَدِه خُونِوَشَتَه كُنِيد وَتُو اِي رَه دَبَنَى إِسْرَائِيل تَعْلِيمِي بَدَى تَأْوِي اِي رَه اِزْبَر كُنَه وَتَأْوِي سُرُود بَلَدِه اِزمَه دَخِلَافِ بَنَى إِسْرَائِيل يَك شَاهِد بَشَه. ^{٢٠} چُون وَخَتَى اُونَا رَه دَسَرْزَمِينَى كَه دَبَابَه كَلُونَى اِزوا وَعَدَه كَدِيم بِرَسَنَمُ، دَسَرْزَمِينَى كَه از شَى شِير وَعَسل جَارِي أَسْتَه، اَوْختَه اُونَا خَورَدَه سَيَر وَچَاقِ مُوشَه وَسُون خُدايونِ بِيَكِنَه مُورَه وَأُونَا رَه عِبَادَت مُونَه وَدَز مَه تَوَهِينَ كَدَه عَهْد مَرَه مَيَّدَه مُوكُنَه. ^{٢١} وَخَتِيكَه مُصِيبَتَه وَمُشَكِّلَاتِ كَلو دَبَلَه اِزوا مَيَّيَه، اَوْختَه اِي سُرُود رَقَمِ يَك شَاهِد دَبَلَه اِزوا شَاهِدَى مَيَّدَيَه، چَراَكَه اِي سُرُود از دَانِ أَولَادِه اِزوا پُرْمُشَت نَمُوشَه. چُون دَ بَارِه خِيَالَاتِ اِزوا ما اَمِي آلَى مَيَّدَنَم، پَيَش اَزِي كَه اُونَا رَه دَسَرْزَمِينَى كَه دَبَارِه شَى قَسَم

خورديم، داخل كنم.“^{۲۲} پس د امزُو روز مُوسى اى سُرود ره نوشته کد و دَبَنی إسرائیل تعلیم دَد.

اوخته خداوند د يوشع باچه نُون وظیفه دَد و گفت: “قوی و دلیر بش، چراکه تُوبَنی إسرائیل ره د سرزمینی که ما بَلِدِه ازوا وعده کدیم داخل مُونی و ما قد تُواستم.“^{۲۳}

وختی مُوسى تورای امزی شريعت ره دِيگ کتاب تا آخر نوشته کده خلاص کد،^{۲۴} او دِ لاويای که مسئولِ بُردونِ صندوقِ عهدِ خداوند بُود، أمر کده گفت:^{۲۵} “ای کتابِ شريعت ره بِگيريد و د پالوی صندوقِ عهدِ خداوند، خدای خُوبیلید تا د أونجی د عنوانِ شاهدِ خلاف بَنی إسرائیل بشه.^{۲۶} چون ما میدَنُم که شُمو چيقس ياغی و سرکش استید. اينه، امروز که ما هنوز زِنده و د مينكل شُمو آستم، شُمو د خلافِ خداوند شورش کدید، پس چيقس کلوتر بعد از مُردون مه شورش مُونيد!^{۲۷} پگِريش سفيدای طایفه های خُو و کله کلونای خُو ره د پيش مه جَم کنيد تا اى تورا ره د گوشِ ازوا برسنُم و آسمو و زمى ره د بَلِه ازوا شاهدِ بِگيرم.^{۲۸} چون ما میدَنُم که بعد از مُردون مه شُمو خودون ره كاملًا فاسد مُونيد و از راه-و-طريقى که دَز شُمو أمر کدیم میگردید. د زمانای آينده مُصیبت د بَلِه شُمو میيه، چون شُمو چيزى ره انجام میديد که د نظرِ خداوند بدَسته و قد کاراي دست خُو قارِ خداوند ره باله ميريد.“^{۲۹}

سُرُودِ مُوسَىٰ

۳۰ اوخته مُوسَىٰ تورای امزی سُرُود ره دَ حَالِيكه تمامِ جماعتِ إِسرائِيل گوش مِيگِرفت تا آخر خاند:

۳۱ آی آسمونا، گوش بِگِيرید که ما توره مُوگِيم:

آی زمی، تورای دان مَره بِشَنَو!

۳۲ بیل که تعليیم مه رقمِ بارو آلی بُياره

و تورای مه رقمِ شَبَنَم وری بِشِينه،

رقمِ قطره های نَرَم بارو دَ بَلَه عَلْفِ تازه

و رقمِ بارِش ها دَ بَلَه گیاه های نَو-بُر-شُدَه،

۳۳ چراکه ما نامِ خُداوند ره إعلان مُونم:

بُزُرگی خُدای مو ره تَوصِيف كُنید!

۱۴ او قاده-و-پناهگاه آسته، کارای شی کامل،

و پگِ راه های شی پُر از انصاف.

او خُدای وفادار آسته و دُور از حِيله-و-مَكر،

او عادل و راست آسته.

۱۵ قَوم شی دَ برابِر اُزو فِساد کد؛

عَيْب های ازوا ثابت کد که اُونا بچکِيچای اُزو نِبيه،

بَلکِه يگِ نسلِ كَجَرو و گُمراه آسته.

۱۶ آی قَومِ جاهِل و نادو،

آيا نیکی های خُداوند ره امى رقم آدا مُونيد؟

آيا او آته و صاحِب شُمو نِيسته؟

او شُمو ره خَلق کده أُستوار کد.

۷ روزای قدیم ره دیاد خو بیربید

و د باره سال های گذشته فکر کنید.

از آته خو پُرسان کنید تا دز شمو بیان کنه،

و از ریش سفیدای خو تا دز شمو نقل کنه.

۸ وختیکه خدای متعال تقسیم ملّت ها ره دزوا دد

و بنی آدم ره د هر جای تیت کد،

۹ او سرحدِ قوم ها ره د مطابقِ تعدادِ بنی اسرائیل تعیین کد.

چون تقسیم خداوند قوم ازو آسته

و یعقوب حصّه خاصِ ازو.

۱۰ خداوند او ره دیگ زمین بیابونی پیدا کد،

دیگ بیابون خشک و سوزان.

او ره پناه دد و فِکر خُو ره سُون اُزو گِرفت

و اُزو رقمِ تُخِمِ چیم خُو حِفاظَت کد.

۱۱ رقمی که بُرگُج چوچه های خُو ره از وور خُو پرواز میدیه

و دَبَلِه چوچه های خُو پَر میزنه،

رقمی که بال های خُو ره واز کده اُونا ره باله مُونه

و اُونا ره دَبَلِه پرهای خُو مُوبره،

۱۲ اُمو رقم خُداوند تنهاي خُو او ره رهبری کد؛

هیچ خُدای بیگنے قد اُزو نبود.

۱۳ خُداوند او ره دَبَلندی های زمی سوار کد

و از حاصلاتِ زمی دَزُو خورند؛

او از قَرَخ دَزُو عسل دَد که بِچشَهه،

و از سنگِ خارا روغو.

^{۱۴} مسکِه گله و شیر رمه ره

قد چربی باره‌گو و قُوج های باشان و بُز ها

و خوبترین دانه های گندم، دَزو دَد.

و او شراب از خون انگور وُچی کد.

^{۱۵} لیکن یشُورُون چاق شده لَغه زَد؛

او چاق، دَبل و بَرتُو شُد.

او خُدای ره که او ره خلق کد، ایله کد

و قادِه نِجات خُو ره خار-و-حقیر حِساب کد.

^{۱۶} اونا قد پَرستِشِ خُدایون بیگنه غَیرَتِ خُداوند ره د شور آورد

و قد کارای نفرت‌انگیز خُو قارِ اُزو ره باله آورد.

۱۷ اُونا بَلِدِه جِنیات قُربانی تقدِیم کد، نَه دَ خُدا،

بَلِدِه خُدایونی که اُونا هیچ نَمیشَنَخت،

بَلِدِه خُدایون نَو که تازه پَیدا شُده،

بَلِدِه خُدایونی که بابه کَلونای شُمو ازوا هیچ ترس نَدَشت.

۱۸ خالِقی که اُونا ره دَ وجود آورَد، پَروای شی ره نَکد؛

و خُدای که اُونا ره پَیدا کد، اُونا او ره پُرمُشت کد.

۱۹ خُداوند اِی کار ره دِید و ازوا بَدْبُر شُد،

چراکه باچه ها و دُخترون شی قار ازُو ره باله آورَد.

۲۰ پس او گفت: 'ما رُوى خُوره ازوا تاشه مُونُم،

تا بِنگرُم که عاقبَتِ ازوا چی مُوشَه؟

چون اُونا يگ نسل گمراه-و-شیر آستَه،

بچکیچای که وفا دز شی وجود ندره.

۲۱ اونا قد پرستش چیزای که خُدا نییه مَره سِر غَیرَت کد

و قد بُت های خُو قار مَره باله آُرد.

پس ما اونا ره د وسیله کسای که هیچ قوم حساب نَمُوشَه سِر غَیرَت مُونُم

و تَوْسُطِ یگ مِلَّتِ جاهِل قارِ ازوا ره باله میرُم.

۲۲ چون یگ آتش د وسیله غَضَب مه داغ شده

که آنگه شی تا غَوْجی های عالمِ مُرده ها مِیرَسَه؛

او زمی ره قد حاصل شی قُورت مُونَه

و بُنيادِ کوه ها ره آتش مِيزَنه.

۲۳ ما بَلَاهَا ره د بَلَه ازوا جم مُونُم

و خلطه تیرهای خُو ره د بَلَه ازوا خالی مُونُم.

۲۴ اُونا از گُشَنگی تَلَف مُوشَه،

و دَ وسِيله آتِشِ تَو و مَرَضِ وُبَای تَلَخ از بَيْن مورَه؛

ما دَندونای جانورای وَحشی ره دَ خِلافِ ازوا رَیی مُونُمْ

و زارِ جاندارای ره که دَ خاک خَرَک مُونَه.

۲۵ شمشیر اُونا ره دَ بُرو بَسِ أولاد مُونَه

و وَحَشت دَ داَخِل دَ بَلَه ازوا حاِكم مُوشَه.

مَرَدَای جوان و دُخترُونِ جوان،

نِلغَهَگونِ شِيرخور و نفرَای مُوي سَفِيد پَگ شَى نابُود مُوشَه.

۲۶ ما گُفتُم که اُونا ره تِيتپَرَك كُنم

و نَام ازوا ره از مينكلِ إنسان ها گُل كُنم؛

۲۷ ليِكن از طعنه دُشمو ترسِيدُم

که نَشْنَه مُخَالِفًا غَلَطٌ فِكْرٌ كُنْه

و بُكَيْه: ”دِسْتِ ازْمُو پِيرُوز شُدَّه؛“

و خُداوند پَكِ امْزِي كَارَا رَه نَكَدَه.“^{۲۸}

أُونَا يَكْ قَوْمٍ بِعَقْلٍ أَسْتَه
^{۲۸}

و دَرْزَا هِيج دَانَايِي وَجْود نَدْرَه.

كَشِكِه أُونَا عَقْلٌ مِيدَشَتٌ وَ امِي تُورَه رَه مُوفَامِيدٌ^{۲۹}

و پَيْ مُوبُرْدٌ كَه عَاقِبَتِ ازوَا چَى مُوشَه!

چِطُور يَكْ نَفَر مِيتَنَه هَزار نَفَر رَه دُمْبَال كَنَه
^{۳۰}

و دُو نَفَر دَه هَزار نَفَر رَه دُوتَلْجِي كَنَه،

اَگَه قَادِه پِناهَگَاهِ ازوَا أُونَا رَه سَوْدَا نَكَدَه بَشَه،

و خُداوند أُونَا رَه تَسْلِيمٌ نَكَدَه بَشَه!

۳۱ چُون پناهگاه دشمنا رقم قاده پناهگاه ازمو آلی نیسته،

حتی دشمنای مو ای ره تصدیق مونه.

۳۲ تاک های انگور ازوا از تاکستان های سدوم مییه

و از باع های انگور عموره.

انگورای ازوا انگورای زاردار آسته

و خوشه های ازوا تلخ.

۳۳ شراب ازوا زار مار آسته،

زار کشنده تیرمار.

۳۴ آیا ای چیزا د پیش مه ذخیره نییه

و د دیخانه های مه مهر-و-لاک نشده؟

۳۵ انتقام گرفتو و جرا ددو کار ازمه یه؛

پای های ازوا د وختی مُعین مِيلخشه،

چراکه روز تباھی ازوا نزدیک آسته

و نابُودی که د بَلِه ازوا آمدنی يَه، عَجله مُونه.

^{٣٦} چُون خُداوند قَوم خُو ره دَ حق شی مِيرسنہ

و د خِدمتگارای خُو دِل مُوسوَزنه،

دُرُست دَ غَيْتی که او مِينگره که قُوت ازوا از بَین رفته

و هیچ کس باقی نَمَنده، نَه غُلام و نَه آزاد.

^{٣٧} اوخته خُداوند دَ قَوم خُو مُوگیه: 'كُجا آسته خُدايون ازوا،

قاده های پناهگاهی که اُونا دَزوا پناه گِرفُتد،

^{٣٨} خُدايونی که چربی قُربانی های ازوا ره مُوخرد

و شراب هدیه های وُچی کَدَنی ازوا ره وُچی مُوكد؟

اینه، بِنگرید که ما خود مه امُو آسْتُم!

و دَ پَالُوی مه هیچ خُدای دِیگه وجود نَدره.

ما مُوكُشُم و ما زِنده مُونُم،

ما زخمی مُونُم و ما شفا مِیدیم،

و هیچ کس از دِست مه خلاص شُدہ نَمیتَنہ.

چُون ما دِست خُوره دَ آسمو باله مُونُم و مُوكِیم:

”ما تا آبَد زِنده آسْتُم.

ما شمشیر جَلوی خُوره تیز مُونُم

و دِست مه او ره بَلَدِه قضاوت مِیگِیره.

ما از دُشمنای خُو انتقام مِیگِیرم

و کسای ره که از مه بَد مُوبِره جَزا مِیدیم.

تیرهای خُو ره قد خُون مَست مُؤْنُم

قد خُون کُشته شُدھا و اسِيرا؛

شمშير مه گوشت مُخوره

گوشت سِر قومَنْدَانَى دُشْمُو ره. ”

آي مِلَّت ها قد قَوْم ازُو خوشحالی کُنيد،

چراکه او إنتقام خُون خدمتگاراي خُو ره مِيگيره؛

او از دُشمناي خُو إنتقام مِيگيره

و سرزمى و قَوْم خُو ره از گناه پاك مُونه. ”

دَمَزِي رقم مُوسِى أَمَدَه پَگِ توراي امزي سُرُود ره دَ حاليكه قَوْم گوش مِيگِرفت خاند، او
و يوشع باچه نون. ^{٤٥} و ختييکه مُوسِى پَگِ امزي تورا ره دَ تمام قَوْم إسرائييل خاند و خلاص
شُد، ^{٤٦} او دَزوا گُفت: “پَگِ توراي ره كه ما إمروز بَحَيَثِ شاهِد دَز شُمُو إعلان كُدم دِل
خُو جاي بِدِيد و دَ بَچِكِيچاي خُو امر کُنيد كه تمام توراي امزي شريعت ره دَ دِقت دَ جاي

بیره، چراکه ای بَلِدِه شُمو توره ایله‌بی نیسته، بَلِکه زِندگی شُمو یه؛ دَ وسیله امزی توره شُمو دَ امزُو سرزمی که بَلِدِه تَصْرُف کدون شی از دریای اُردُن تیر مُوشید، عُمرِ دراز میداشته بشید. ”

خُداوند مُوسیٰ ره از مَرگ شی باخبر مُونه

دَ امزُو روز خُداوند دَ مُوسیٰ گفت:^{۴۹} ”دَ امزی کوه عَبارِیم، یعنی کوه نبو که دَ سرزمین موآب رُوی دَ رُوی شارِ آربِحا آسته بُر شُو و سرزمین کِنعان ره که ما دَ بنی اسرائیل دَ عنوانِ مُلکیت میدیم توخ کُو. ^{۵۰} تو دَ امزُو کوه که بُر مُوشی دَ امونجی فَوت مُونی و قد قَوم خُو یَكْجاي مُوشی، امُو رقم که بِرار تُو هارُون دَ کوه هور فَوت کد و قد قَوم خُو یَكْجاي شُد، ^{۵۱} چراکه شُمو دَ مینکلِ بنی اسرائیل دَ پیش آو مِربیا قادِش دَ بیابونِ صین از مه نااطاعتی کدید، چون مُقدَّس بُودون مره دَ مینکلِ بنی اسرائیل ثابت نَکدید.

امزی خاطر امُو سرزمی ره تنها از دور مِینگری، لیکن دَ اونجی دَ سرزمینی که دَ بنی اسرائیل میدیم، داخل نَمُوشی. ”

دُعای بَرکتِ مُوسیٰ بَلِدِه قَومِ اسرائیل

^۱ اینمیا توره های بَرکتی آسته که مُوسیٰ، مَرِدِ خُدا، پیش از مُردون خُو قد شی قَوم

إِسْرَائِيلَ رَه بَرَكَتْ دَدَه ^۲ گُفت:

”خُداوند از کوهِ سِینا آمَد،

أُو از سَعِيرَ دَبَلِه ازوَا طُلوعَ كَد

و از کوهِ پاران روشنَى دَد.

أُو قد هزاران هزار مُقَدَّسِينَ آمَد

و از دِستِ راستِ شَى بَلَدِه ازوَا شريعتَ آتِشى بُرْ شُند.

^۳ راستى كه أُو قومَ خُوره دوست دَره؛

پَكِ مُقَدَّسِينَ شَى دَ دِستِ ازُو يَه.

أُونا دَپِيشِ پایایِ اُزُو مِيشِينه

و هر كُدم شَى از توره هَاي ازُو برخوردار مُوشَه.

^۴ مُوسَى دَزِ مو شريعتى ره أَمرَ كَد

که میراثِ جماعتِ یعقوب آسته.

۵ او دَ بَلِه يَشُورُون پادشاه شُد

دَ غَيْتَى که رهبرای قَوم قد طایفه های إسرائیل قَتَى جم شُد.

۶ بَيل که رئویین زِنده بُمنه و نَمره

و تِعدادِ مَرَدَى شَى كَم نَبَشَه.

۷ وَ دَ بَارِه يَهُودَا اينى رقم گُفت:

”آى خُداوند، آوازِ يَهُودَا ره ېشنو“

و او ره دَ پِيشِ قَوم شَى بَير.

او قد دِستَاي خُو بَلَدِه خُو جنگ مُونه

و تو او ره دَ خِلافِ دُشمنَى شَى كومَك كُو.“

۸ دَ بَارِه لاوی گُفت:

“آی خُداوند، تُمِيم-و-أوريٰم تُو دَ مرِد وفادار تُو تعلُق دَرَه

که تُو أُو ره دَ مَسا آزمایش کده

دَ پیش آـوِ مِربِبا قد ازْو جنجال کدی؛

^۹ قد امزُو که دَ بارِه آته و آـیه خُو گُفت:

‘ما أُونا ره نَمِيتَخْشُم،’

و بِرارون خُو ره نادیده گِرفت

و دَ بچِکِچای خُو اهمیت نَداد،

چراکه كلام ازْتُو ره دَ جای أُورَد

و عهد ازْتُو ره نِگاه کد.

^{۱۰} أُونا احکام تُو ره دَ يعقوب تعليِيم مِيدیه،

شريعت تُو ره دَ إسرائیل.

أونا د حُضُور تُو بُخورِ خوشبوی تقدیم مُونه

و قُربانی های سوختنی دَبَلَه قُربانگاهِ تُو.

١١ آی خُداوند، دَ مال-و-دارایی ازوا برکت ېدی

و کارای دستای ازوا ره قبُول کُو.

کمرِ مُخالفای ازوا ره مَیده کُو،

کمرِ کسای ره که ازوا بد مُوبره،

تا أونا دِیگه باله نَشْنَه. ”

١٢ دَ بارِه بِنيامِين گُفت:

”دوستِ خُداوند دَ پیشِ خُداوند دَ آمنیت جای-د-جای مُوشه،

چون قادرِ متعال تمامِ روز او ره دَ پناهِ خُو مِیگیره

و او دَ مینکلِ شانه های شی آرام مُونه.“

د باره یوسف گفت:

”خُداوند سرزمین اُزو ره بَرَكَتِ بَدِيه،

قد نعمت های آسمو، و شَبَنَم

و قد آو ها از غَوْجَى های تَى زَمِى؛

قد بِهٗترِين ثَمَر های آفَتو

و قد بِهٗترِين حاصلات که از ماه ها د وجود مییه؛

قد بِهٗترِين نِعمت های کوه های قدِیم،

و حاصلاتِ تِپه های همیشگی؛

قد بِهٗترِين نِعمت های زَمِى و پُری شَى؛

و قد لُطفِ امْزو که د بُوْلَه سوزان بُود.

بیل که پِگِ امزیا د سِر یوسف قرار بِگیره،

دَ تولغِه كسى که از مينکل پِرارون خُو انتِخاب شُد.

^{١٧} اولبارى گله شى شِكوه-و-بُزْرگى اُزو يه،

شاخای شى رقم شاخای گاو وَحشى،

أو قد ازوا قَوم ها ره مِيزَنه،

پگِ ازوا ره تا آخِر زمى.

شاخای شى دِسته هاي ده هزار نفرى إفرايم

و هزار نفرى مَنَسّى أَسته. ”

^{١٨} دَ بارِه زِيُولُون و يسّاكار گُفت:

”آي زِيُولُون، دَ سَفَر هاي خُو خوشحال بش

و تو آي يسّاكار، دَ خَيمه هاي خُو.

^{١٩} أونا قَوم ها ره دَ كوه دعَوت مُونه

و د اونجى اونا قُربانى هاي مُناسِب ره تقدِيم مُونه؛

چون اونا از پَريمونى دريا ها

و از خزانه هاي تاشه ريگزار ها مِيچشه. ”

٢٠ د باره جاد گفت:

”حمد-و-ثنا د امزُو كه آبادى جاد ره كله مُونه!

جاد رقم شير زندگى مُونه

و بازو و تولغه ره پاره مُونه.

٢١ او بِهترین حصّه ره بَلده خُو إنتِخاب كد،

چون د اونجى تقسيم يگ حکمران نِگاه شُدد.

او قد كله کلوناي قوم آمد،

و عدالت خُداوند

و دستورای شی ره بَلِدِه إِسْرَائِيلَ دَجَای أَوْرُدَ.

۲۲ دَبَارِه دَانَ گُفتَ:

”دان چُوچِه شیر آسته“

که از باشان ٹوپ مُونه.

۲۳ دَبَارِه نَفَتَالِی گُفتَ:

”آی نَفَتَالِی که از لُطفِ خُداوند بَرخُوردار شُدَه“

از بَرَكَتِ ازو پُر شُدَه،

”غَرب و جُنُوب ره تَصَرُّفِ كُو.“

۲۴ دَبَارِه أَشِيرَ گُفتَ:

”أَشِيرَ از پَگِ باچَه ها کده کَلَوْتَر بَرَكَت يَا فَتَه مُوشَه؛“

بَيْلَ كَه او بَلِدِه بِرَارُون خُو قَابِلِ قَبُول بَشَه

و پای خو ره د روغۇ غۇڭە كنه.

۲۵ پُشتىندەھاى درگەشى از آپىن و برونز بَشە

و د روزاى زىندگى خو قوى-و-زورتۇ بَشە.”

۲۶ د آخر گفت:

”آى يشۇرۇن، هيچ كس رقم خُدا نىيستە

كە بىلە كوماك تۇ آسمونا ره سوار شۇنە

و د بىزىرىگى-و-جلال خو د بىلە آورها بىيە.

۲۷ خُدai ازلى-و-آبىدى پناھگاھ تۇ أستە

و بازۇھاى آبىدى شى تۇ ره أستوار نىگاھ مۇنە.

أو دشمناي تۇ ره از پىش رۇي تۇ هى مۇنە

و مۇگىھ: ’نابۇد كۇ!‘

پس إِسْرَائِيلَ دَأَمْنِيَتْ زِنْدَگِي مُونَه،

چشمِه يعْقُوبُ دُور از بَلَّا هَا،

دَيْكَ سَرْزَمِينِ پُر از غَلَّه و شِيرِه انگُور

كَه از آسمُون شَى شَبَنَم مُوبَارَه.

نِيكَ دَبَختُ تُو، أَيِ إِسْرَائِيلَ!

رَقْمِ ازْتُو الَّى كَى أَسْتَه

آيِ قَومِي كَه دَ وَسِيلَه خُداونَدِ نِجَاتِ پَيَدا كَدى؟

أُو سِپَرِي أَسْتَه كَه تُو رَه كُومَك مُونَه

و شَمْشِيرِ پِيرَوْزِي تُو!

دُشْمنَى تُو دَ پِيشُ تُو سَرْخَم مُونَه

و تُو دَبِلَه پُشتَهَاي ازوا لَغَه مُونَى. ”

^١ اوخته مُوسَى از دَشْت های موآب دَکوه نِبو دَقِيلی پیسگه که رُوى دَرُوى شارِ
 آريحا آسته باله شُد و خُداوند تمام سرزمی ره بَلِدِه ازُو نِشو دَد: از جِلعاد تا دان، ^٢ پَگِ
 منطقه نفتالی، سرزمین افرايم و مَنَسَّى و پَگِ سرزمین يهودا ره تا دريای غَرب، ^٣ جنوب و
 آواری های دَرِه آريحا ره که شارِ درختون خُرما آسته تا صوغَر. ^٤ و خُداوند دَزُو گُفت: "إِي
 سرزمینی آسته که ما بَلِدِه إِبراهِيم، إِسحاق و يعقوب قَسْم خورده گُفتُم که دَأَولادِه تُو
 مِيدِيم." ما دَزْ تُو إِجازه دَدُم که أُو ره قد چیمای خُوبِنگری، لیکِنْ تُو از دريای أَرْدَن تیر
 نَمُوشی تا دَأُونجی داخل شُنی."

^٥ پس مُوسَى خِدمتگار خُداوند دَأُونجی دَ سرزمین موآب دَ مُطابِق توره خُداوند فَوت کد.
^٦ او دَ سرزمین موآب رُوى دَرُوى بَيْت-فِغور، دَدَرِه دَفَن شُد، لیکِنْ قَبِر ازُو ره تا إِمروز
 هيچ کس نَمِيدَنه. ^٧ مُوسَى يَكِنْ صد و بِيَسْت ساله بُود که فَوت کد؛ چیمای ازُو هنوز خِيره
 نَشَدَد و قُوت شی کَم نَشَدَد. ^٨ و بَنَى إِسرائِيل بَلِدِه مُوسَى دَشْت های موآب سی روز ماتَم
 گِرفته دَورِه ماتَم و چخرا ره بَلِدِه مُوسَى تكميل کد.

^٩ يوشع باچه نُون پُر از روح حِكمت بُود، چراکه مُوسَى دِستای خُوره دَبَلِه ازُو ايشتُد. و
 بَنَى إِسرائِيل از آيِدِ ازُو شُد و مُطابِق چیزای که خُداوند دَمُوسَى امر کُدد، عمل کد.

تا آلی ره هیچ پیغمبری رقم موسی الی د اسرائیل ظهور نکده که خداوند او ره روی د رُوی دیده بشه.^{۱۱} موسی د تمام معجزه ها و چیزای عجیب که خداوند او ره ریی کد تا اونا ره د سرزمین مصر د خلاف فرعون، پگ خدمتگارای شی و تمام سرزمین شی انجام بدهیه،^{۱۲} و د تمام کارای دست قوی و د تمام هیبت بزرگ که د پیش نظر پگ بنی اسرائیل نشو دد بے جوره استه.